



陽春白雪



江蘇古籍出





四庫未收書提要

琴經室外集卷三

陽春白雪八卷外集一卷提要

宋趙聞禮編聞禮字立之臨濮人案文淵閣書目月
字號載陽春白雪一冊乃闕佚之本此從舊鈔依樣
倣寫所選凡二百餘家宋代不傳之作多萃于是去
取亦復謹嚴絕無猥濫之習聞禮著有釣月軒詞周
密絕妙好詞嘗采其作是編亦自錄一二如玉漏遲
法曲獻仙音瑞鶴仙等闕字鍊句琢非專以柔媚為
工者可比也



陽春白雪第一卷目錄

解語花

探春

木蘭花慢

賀新涼四

傾盃

渡江雲

憶舊遊

應天長

鎖窓寒

雙雙燕

孟家蟬

祝英臺近三

喜遷鶯二

六醜

大酺

綺羅香

綠頭鴨

念奴嬌三

過秦樓

宴清都二

花犯

沁園春

花心動

掃花遊

八聲甘州

木蘭花慢

無悶

臨江仙

醉桃源

秋蕊香

月中行

風入松二

玉樓春六

瑞鷓鴣

漁家傲

憶少年令

喜遷鶯令

青玉案

菩薩蠻八

釵頭鳳

少年遊

浣溪沙

南歌子

江神子
二

謁金門

西江月

好事近

五、

10

詞源目錄

卷上

五音相生 陽律陰呂合聲圖 律呂隔八相

生圖 律呂隔八相生 律生八十四調

古今譜字 四宮清聲 五音宮調配屬圖

十二律呂 管色應指字譜 宮調應字譜

律呂四犯 結色正訛 謳曲指要

卷下

音譜 拍眼 製曲

句法 字面 虛字

陽春白雪第二卷目錄

瑞龍吟

惜黃花慢

惜餘春慢

花心動

法曲獻仙音

燕山亭

波羅門引

喜遷鶯

玉蝴蝶

月下笛

石州影

洞仙歌
四

江神子慢
二

慶清朝

瑞鶴仙

齊天樂

望海潮
三

揚州慢

金人捧露盤 三

水龍吟 二

永遇樂 二

漢宮春 二

玉蝴蝶

聲聲慢

高陽臺 二

鷓鴣天 六

柳梢青 六

夜行船 三

霜天曉角 二

臨江仙

浣溪沙 八

西江月 五

琴調相思引

蝶戀花 六

感皇恩

青玉案

陽春白雪第三卷目錄

摸魚兒 三

風流子 六

瑞鶴仙

新荷葉

撲蝴蝶

齊天樂

賀新涼

解連環

霓裳中序第一

醜奴兒慢 二

夜飛鵲慢

石州影

三姝媚

喜遷鶯

燭影搖紅 四

天香

燕春臺

東風第一枝 二

夢橫塘

解連環

瑞鶴仙

金盞子

木蘭花慢

四

瑞鶴仙令

杏花天

二

臨江仙

糖多令

二

卜算子

三

南鄉子

三

眼兒媚

四

清平樂

二

梅花引

三

朝中措

三

戀繡衾

二

夜行船

小重山

玉樓春

瑞鶴仙令

浣溪沙二

烏夜啼

更漏子

朝中措

南歌子二

夜遊宮

生查子

陽春白雪第四卷目錄

暗香

疎影

桂枝香

鶯啼序

蘭陵王

賀新郎 三

徵招

角招

八寶粧

氐州第一

齊天樂 四

玲瓏四犯

八聲甘州 二

宴山亭

水龍吟 二

滿江紅

錦堂春

滿江紅

念奴嬌

水龍吟

木蘭花慢

念奴嬌 二

瑞鶴仙 二

青房並蒂蓮

錦堂春

念奴嬌

長相思慢

清平樂 十二

阮郎歸 四

菩薩蠻 二

好事近 三

浪淘沙 三

醉落魄 二

謁金門

浣溪沙

清平樂 二

春光好

點絳脣 五

陽春白雪第五卷目錄

瑞龍吟

龍山會

秋霽

金盞子

孤鸞

高陽臺

玉漏遲

二

倦尋芳

念奴嬌

風流子

喜遷鶯

倦尋芳

齊天樂

二

過秦樓

綠頭鴨

漢宮春

木蘭花慢

畫錦堂

隔浦蓮

洞仙歌

念奴嬌

聲聲慢

花心動

齊天樂

玉漏遲

法曲獻仙音

念奴嬌

風流子

瑞鶴仙

二

清夜遊

春歸怨

齊天樂

瑞鶴仙

三

摸魚兒

五

桂枝香

八聲甘州

永遇樂

滿庭芳

塞翁吟

意難忘

青玉案

二

風入松

祝英臺近

採桑子

玉樓春

柳梢青

菩薩蠻

阮郎歸

謁金門

朝中措

南鄉子

踏莎行

三

菩薩蠻

二

好事近

二

清平樂

小重山

菩薩蠻

眼兒嬌

四字令

如夢令 二

長相思 五

玉樓春 四

陽春白雪第六卷目錄

六州歌頭 二

摸魚兒 四

芙蓉月

三姝媚

夜合花

西牕燭

大酺

歸朝歡

多麗

滿庭芳

滿江紅

揚州慢

孤鸞

宴清都

徵招

齊天樂

祝英臺近

二郎神

綺寮怨

側犯

春聲碎

八聲甘州

四

八六子

瑣窓寒

桂枝香

華胥引

漢宮春

東風第一枝

渡江雲

慶清朝

小重山

三

點絳脣

三

戀繡衾

五

伊州三臺令

烏夜啼

二

拋球樂

如夢令

二

醉太平

憶王孫

楊柳枝

昭君怨

長相思
四

望江南
三

謁金門
三

菩薩蠻
三

浣溪沙
六

搗練子
二

樓心月
三

[illegible]

陽春白雪第七卷目錄

憶舊游慢

霓裳中序第一

花心動

梅花引四

蘭陵王三

玲瓏四犯二

水調歌頭

洞仙歌

揚州慢

念奴嬌

洞仙歌

滿庭芳

驀山溪二

聲聲慢二

過秦樓二

齊天樂三

徵招

賀新郎二

鳴梭

解連環

瑞鶴仙 三

疎影

翻香令

摘紅英

夢江南

秋蕊香令

夜行船

虞美人

鬪鷄回

踏沙行 二

鷓鴣天 三

謁金門 六

菩薩蠻 五

訴衷情

阮郎歸 二

畫堂春

南鄉子

朝中措

青門怨

少年游

柳梢青

更漏子
二

少年游

採桑子

一叢花令

江城子令

漁家傲
二

眼兒媚

霜天曉角
五

陽春白雪第八卷目錄

瑞龍吟

霓裳中序第一 二

沁園春

隔浦蓮近

玲瓏四犯

燭影搖紅

解連環 二

憶舊游

氏州第一

一萼紅

雨淋鈴

塞翁吟

畫錦堂

風流子 三

風入松

宴清都

蘭陵王

念奴嬌 二

夜飛鵲 二

解語花

瑣窓寒

齊天樂 二

眞珠簾

蘭陵王

祝英臺近 二

鶯啼序

應天長 十

滿庭芳 二

繞佛閣

梅子黃時雨

魚游春水

風入松

摸魚兒

桂枝香

念奴嬌

沁園春

醉蓬萊

永遇樂

宴瑤池

西江月 四

踏莎行 二

憶秦娥

戀繡衾

南歌子 二

柳梢青

謁金門 二

長相思 三

卷一百一十五

陽春白雪卷第一

臨濮 趙 聞禮 立之選

解語花 元宵 周美成

風銷燭蠟露浥洪爐花市光相射桂華流瓦纖雲散
耿耿素娥欲下衣裳淡雅看楚女宮腰一把簫鼓喧
人影參差滿路飄蘭麝 因念都城放夜望千門如
畫嬉笑遊冶鈿車羅帕相逢處自有暗塵隨馬年光
是也惟只有舊情哀謝清漏移飛蓋歸來從舞休歌
罷

探春

田不伐

小雨分山斷雲鏤日丹青難狀清曉柳眼窺晴
糝粧迎暖林外幽禽啼早煙徑潤如酥正濃淡
遙看隄草望中新景無窮最是一年春好騎馬
黃金絡腦爭探得東君何處先到萬錢飛觴
千金倚玉不肯輕辜年少桃李怯殘寒半吐芳
心猶小謾教蜂蝶多情未應知道

木蘭花慢

少游

過秦淮曠望迴蕭灑絕纖塵愛清景風蛩吟
鞭醉帽時度疎林秋來政情味淡更一重煙
水一重雲千古行人舊恨盡應分付今人
漁村望斷衡門蘆荻浦

雁先聞對觸目淒涼紅凋岸蓼翠減汀蘋憑高正千
嶂黯便無情到此也銷魂江月知人念遠上樓來照
黃昏

賀新涼

水仙

辛幼安

雲臥衣裳冷看蕭然風前月下水邊幽影羅襪塵生
凌波步湯沐烟波萬頃愛一點橋黃成暈不記相逢
曾解珮甚多情為我香成陣待和淚搵殘粉 靈均
千古懷沙恨恨當時忽忽忘把此仙題品煙雨淒迷
傷愁損翠袂搖搖誰整謾寫入瑤琴幽憤弦斷招魂
無人賦但金杯的皪銀臺潤愁殢酒又獨醒

又梅

俞國寶

夢裏驂鸞鶴，覺三山不遠。依前海風吹落，浮到五湖烟月上。剛被梅香醉著，粲玉樹輕明，疎薄十萬瓊瑤。天女隊，捧冰壺，玉液琉璃杓。來伴我薦清酌。恍然夢斷，渾非昨。昨問溪邊竹外，新來爲誰開，却無限冰魂。招不得，擬把離騷喚，覺待抖擻紅塵雙腳。萬里瑤臺終一到，想玉奴不負東昏約。留此恨，寄殘角。

又

潘元質

篆縷銷香鼎，翠沉沉庭陰轉。午畫堂人靜，芳草王孫知何處。惟有楊花，糝徑正玉枕。瞢騰初醒，門外殘紅

春已去鎮無聊殢酒厭厭病雲髻髻未忺整 江南
舊事休重省但天涯尋消問息斷鴻難倩月滿西樓
憑欄久依舊歸期未定便只恐瓶沉金井嘶騎不來
銀燭暗枉教人立盡梧桐影誰伴我對鸞鏡

又

史邦卿

花落臺池靜自春衫閑來老了舊香荀令酒既相違
詩亦可此外雲沉夢冷又催喚官河蘭艇輒岸烟霏
吹不斷望樓陰欲帶朱橋影和草色入輕暝 裙邊
竹葉多應賸怪南溪見後無个再來芳信蝴蝶一生
花裏活難制竊香心性便有段新愁隨定落日年年

宮樹綠墮新聲玉笛西風勁誰伴我月中聽

傾盃

沈會宗

梅英弄粉尚淺寒臘雪消未盡布綵箔層樓高下燈
火萬點金蓮相照映香徑縱橫聽畫鼓聲聲隨步緊
漸宵漢無雲月華如水夜久露清風迅輕車趁馬
微塵雜霧帶曉色綺羅生潤花陰下瞥見仍回但時
聞笑音中香陣陣奈酒闌人困殘漏裏年年餘恨歸
來沉醉何處一片笙歌又近

渡江雲

周美成

晴嵐低楚甸暖回雁翼陣勢起平沙驟驚春在眼借

問何時委曲到山家
塗香暈色盛粉飾
爭作年華千萬絲
陌頭楊柳漸漸可藏鴉
堪嗟清江東注畫舸
西流指長安日下愁
宴闌風翻旗尾潮
濺烏紗今宵正對初
弦月傍水驛深艤
蒹葭沉恨處但時
時自別燈花

憶舊游

前人

記愁橫淺黛淚洗紅鉛
門掩秋宵墜葉驚離思
聽寒蟬夜泣亂雨蕭蕭
鳳釵半脫雲鬢窓影燭
光搖漸暗竹敲涼踈螢
照晚兩地魂銷迢迢問
音信道徑底花陰時認
鳴鑣也擬臨朱戶歎因
郎憔悴羞見郎招

舊巢更有新燕楊柳拂河橋但滿眼驚座東風竟日
吹露桃

應天長 寒食

前人

蕙風布暖霏霧弄晴池臺徧滿春色正是夜堂無月
沉沉暗寒食梁間燕社前客似笑我閉門岑寂亂花
過隔院芸香滿地狼籍長記那回時解后相逢郊
外駐油壁又見漢宮傳燭飛烟五侯宅青青草迷路
陌強載酒細尋前迹市橋遠柳下人家猶自相識

鎖窓寒 寒食

前人

暗柳啼鴉單衣竚立小簾朱戶桐花半畝靜鎖一庭

愁雨洒空階。夜闌未休。故人剪燭西窓。語似楚江暝。
宿風燈零亂。少年羈旅遲莫。嬉遊處。正店舍無烟。
禁城百五。旗亭喚酒。付與高陽儔侶。想東園桃李。自
春小。脣秀靨。今在否。到歸時。定有殘英待客。携尊俎。

雙雙燕

史邦卿

過春社了。度簾幙。中間去年塵冷。差池欲住。試入舊
巢相並。還相雕梁藻井。又軟語。商量不定。飄然快拂。
花梢翠尾。分開紅影。芳徑。芹泥雨潤。愛貼地。爭飛
競誇輕俊。紅樓歸晚。看足柳昏花暝。應自棲香正穩。
便忘了。天涯芳信。愁損玉人。日日畫闌獨凭。

孟家蟬蝶

潘元質

向賣花檐上落絮橋邊春思難禁正暖日溫風裏鬪
採遍香心夜夜穩棲芳草還處處先暎春禽滿園林
夢覺南華直到如今情深記那人小扇撲得歸來
繡在羅襟芳意贈誰應費萬線千針謾道滕王畫得
枉謝客多少清吟影沉沉舞入梨花何處相尋

祝英臺近

辛幼安

寶釵分桃葉渡烟柳暗南浦怕上層樓十日九風雨
斷腸片片飛紅都無人管是誰勸啼鶯聲住鬢邊
覷試把花卜心期才簪又重數羅帳燈昏鳴咽夢中

語是他春帶愁來春歸何處却不解和愁將去

又

王季夷

柳烟濃花露重合是醉時候樓倚花梢長記小垂手
誰教釵燕輕分鏡驚慵舞是孤負幾番春晝 自別
後聞道月底花前多是兩眉皺又說新來比似舊時
瘦須知兩意長存相逢終有莫謾被春光僞懣

又

不知名

客羶寒蘭房悄金爐藝紅獸好个霜天消遣正宜酒
嫩橙初截鶯肪肌膚香透又還記吳姬纖手 事難
偶墨凍空染梨牋新詞謾題就酒薄愁濃歌枕聽寒

漏可堪霜月亭亭照人無寐映窓外一枝梅瘦

喜遷鶯

雁

康伯可

秋寒初勁看雲路鴈來碧天如鏡湘浦烟深衡陽沙
遠風外幾行斜陣回首塞門何處故國關河重省漢
使老認上林欲下裴徊清影江南烟水暝聲過小
樓燭暗金猊冷送目鳴琴裁詩挑錦此恨此情無盡
夢想洞庭飛下散入雲濤千頃過盡也奈杜陵人遠
玉關無信

又

史邦卿

月波疑滴望玉壺天近了無塵隔翠眼園花冰絲織

練黃道寶光相直自憐詩酒瘦難應接許多春色最
無賴是隨香趁燭曾伴狂客 踪跡謾記憶老了杜
郎忍聽東風笛柳院燈疎梅廳雪在誰與細傾春碧
舊情拘未定猶自學當年游歷怕萬一誤玉人夜寒
簾隙

六醜落花

周美成

正單衣試酒恨客裏光陰虛擲願春暫留春歸如過
翼一去無迹為問花何在夜來風雨葬楚宮傾國釵
鈿墮處遺香澤亂點桃蹊輕翻柳陌多情為誰追惜
但蜂媒蝶使時扣窓隔東園岑寂 漸蒙籠暗碧靜

遶珍叢祇成歎息長條故惹行客似牽衣待話別情
無極殘英小強簪巾情終不似一朵釵頭顫裏向人
歌側飄流處莫趁潮汐恐斷紅上有相思字無由見
得

大酺 春雨

前人

對宿烟收春禽靜飛雨時鳴高屋牆頭青玉旆洗鉛
霜都盡嫩梢相觸潤逼琴絲寒侵枕障蟲網吹粘簾
竹卸亭無人處聽簷聲不斷困眠初熟奈愁極頻驚夢
輕難記自憐幽獨 行人歸意速最先念流潦妨車
轍怎奈向蘭成憔悴樂廣清羸等閒時易傷心目未

怪平陽客雙淚落笛中哀曲況蕭索青蕪國紅糝鋪
地門外荆桃如菽夜游共誰秉燭

綺羅香 春雨

史邦卿

做冷欺花將烟困柳千里偷催春莫盡日冥迷愁裏
欲飛還住驚粉重蝶宿西園喜泥潤燕歸南浦最妨
他佳約風流鈿車不到杜陵路沉沉江上望極還
被春潮晚急難尋官渡隱約遙峯和淚謝娘眉嫵臨
斷岸新綠生時是落紅帶愁流處記當日門掩梨花
剪燈深夜語

綠頭鴨 中秋

晁次膺

晚雲收紺天一片琉璃爛銀盤來從海底皓色千里
澄輝瑩無塵素娥澹佇靜可數丹桂參差玉露初零
金風未凜一年無似此佳時露坐久踈螢時度烏鵲
正南飛瑤臺冷闌干凭暖欲下遲遲 念佳人音塵

別後對此應解相思最闕情漏聲正永暗斷腸花影
偷移料得來宵清光未減陰晴天氣又爭知共凝戀
如今別後還是隔年期人強健清尊素影長願相隨

念奴嬌

田不代

嫩冰未白被霜風換却滿院秋色小閣深沉圍坐促
初擁紅爐宜窄簾密收香窓明遲夜硯冷凝新滴無

人知道个中多少岑寂
翻念一枕高唐當年仙夢
覺難尋消息睡起微醒
衣袖重不管腰支猶索
旋暖銀黃時添酥字笋
玉寒無刀如今腸斷莫
雲依舊凝碧

又

辛幼安

野棠花落甚匆匆過了
清明時節剗地東風欺
客夢一夜銀屏寒怯曲
岸持觴垂楊繫馬此地
曾經別樓空人去舊遊
飛燕能說聞道綺陌東
頭行人曾見簾底纖纖
月舊恨春江流不斷新
恨雲山千疊料得明朝
尊前重見鏡裏花難折
也應驚問近來多少華

髮

又荷花

姜堯章

開紅一舸記來時
嘗與鴛鴦為侶
三十六陂人未到
水珮風裳無數
翠葉招涼
玉容銷酒
更洒菰蒲雨
嫣然搖動
冷香飛上詩句
日莫青蓋亭亭
情人不見
爭忍凌波去
只恐舞衣寒易落
愁入西風南浦
高柳垂陰
老魚吹浪
留我花間住
田田多少
幾回沙際歸路

過秦樓

水浴清蟾
葉喧涼吹
巷陌馬聲初斷
閒依露井
笑撲

流螢惹破畫羅輕。扇人靜夜久，凭闌愁不歸眠。立殘
更箭數年華。一瞬人今千里，夢沉書遠。空見說髩
怯瓊梳。容銷金鏡，漸懶趁時勻。染襟風地濕，虹雨苔
滋。一架舞紅都變。誰信無憀，爲伊才減江淹，神傷荀
倩。但明河影下，還看稀星數點。

宴清都

前人

地僻無鐘鼓。殘燈滅、夜長人倦。難度寒吹斷梗，風翻
暗雪。洒窓填戶。賓鴻謾說傳書算。過盡千傳萬侶。始
信得庾信愁多。江淹恨極須賦。淒涼病損，文園微
絃乍拂。音韻先苦。淮山夜月，金城莫草夢魂飛去秋。

陽春賦卷一
霜半入清鏡歎帶眼都移舊處更久長不見文君歸
時認否

又

盧申之

春訊飛瓊筦風日薄度墻啼鳥聲亂江城次第笙歌
翠合綺羅香煖溶溶澗谷水泮醉夢裏年華暗換料
黛眉重鎖隋堤芳心還動梁苑新來鴈澗雲音鸞
分鑑影無計重見啼春細雨籠愁澹月恁時庭院離
腸未語先斷算猶有凭高望眼更那堪芳草連天飛
梅弄晚

花記梅花

周美成

粉牆低梅花照眼依然舊風味露痕輕綴疑淨洗鉛
華無限清麗去年賸賞曾孤倚冰盤同宴喜最好是
雪中高樹香篝薰素被今年對花最恁恁相逢似
有恨依依愁悴吟望久青苔上旋看飛墜相將見脫
丸薦酒人正在空江烟浪裏但夢想一枝蕭洒黃昏
斜照水

沁園春

少游

宿靄迷空膩雲籠日晝景漸長正蘭皋泥潤誰家燕
喜蜜脾香少觸處蜂忙盡日無人簾幕掛更風遶遊
絲時過牆微雨後有桃愁杏怨紅淚淋浪風流寸

心易感但依依佇立回盡柔腸念小奩瑤鑑重勻絳
蠟曲籠金斗時熨沉香柳下相將游冶處便回首青
樓成異鄉相憶事縱蠻牋萬疊難寫微茫

花心動

潘元質

啼鳥驚心怨年華羞看杏梢桃萼映柳小橋芳草閑
庭處處舊遊如昨斷腸人在東風裏遮不盡幾重簾
幙舊巢穩呢喃燕子笑人漂泊應是素肌瘦削空
望斷天涯信音難託半污淚痕重整餘香夜夜翠衾
寒薄倦游只怕春歸去怎忍見水流花落夢魂遠韶
華又還過却

掃花游

周美成

曉陰翳日正霧靄烟橫遠迷平林暗黃萬縷聽鳴琴
按曲小腰欲舞細遶回隄駐馬河橋避雨信流去想
一葉怨題今到何處春事能幾許任占地持盃掃
花尋路淚珠濺俎歎將愁度日病傷幽素恨入金徽
見說文君更苦黯凝竚掩重閨徧城鐘鼓

八聲甘州

柳耆卿

對瀟瀟暮雨洒江天一番洗清秋漸霜風淒瑟關河
冷落殘照當樓是處紅衰翠減苒苒物華休惟有長
江水無語東流惆悵登高臨遠望故鄉眇邈歸思

難收數年年踪跡何事苦淹留想佳人粧臺凝望誤
幾回天際識歸舟爭知我玉闌斜倚正為人愁

木蘭花慢清明

全前

折桐花爛熳乍疎雨洗清明正艷杏燒空綃桃繡野
芳景如屏傾城盡尋勝去驟雕鞍紺轡出郊坰風暖
繁弦脆管萬家競奏新聲盈盈闌草踏青人艷冶
遞逢迎向路傍往往遺簪墮珥珠翠縱橫懽情對佳
麗地任金罍罄竭玉山傾併却明朝永日畫堂一枕
春醒

無悶

丁葆光

風急還收雲凍又開海澗無人剪水弄六出工夫怎
教容易剛被郢歌楚舞鎮獨向尊前誇輕細想謝庭
詩詠梁園賦賞未成歡計天意是則是便下得控
持柳梢梅蕊又爭奈看看漸回春意好趁東君未覺
預先把園林都粧綴看是處玉樹瓊枝勝却萬紅千
翠

臨江仙

晏叔原

夢後樓臺高鎖酒醒簾幕低垂去年春恨却來時落
花人獨立微雨燕雙飛記得小顰初見兩重心字
羅衣琵琶弦上說相思當時明月在曾照彩鸞啼

醉桃源

周美成

冬衣初染遠山青
雙絲雲鴈綾
夜寒袖濕欲成冰
都緣珠淚零
情黯黯悶騰騰
身如秋後蠅
若教隨馬逐郎行
不辭多少程

秋藥香

前人

乳鴨池塘水暖風
緊柳花迎面
午粧粉指印窓眼
曲裡長眉翠淺
聞知社日停針線
探新燕寶釵落枕
春夢遠簾影參差滿院

月中行

前人

蜀絲趁日染乾紅
微煖面脂融
博山細篆靄房櫳
靜

看打窓蟲 愁多胆怯疑虛幕聲不斷暮景疎鐘圓
圍四壁小屏風淚盡夢魂中

風入松

康伯可

畫橋流水欲平闌雨後青山去年芳草今年恨恨香
車不逐雕鞍紅杏牆頭院落綠楊樓外秋千 謝娘
別後憶前懽淚滴春衫柔莢共折香紅處勸東風且
與流連早是相思瘦損梅花謝了春寒

又

俞國寶

一春長費買花錢日日醉花邊玉驄慣識西湖路驕
嘶過沽酒爐前紅杏香中簫鼓綠楊影裏秋千 暖

風十里麗人天花壓髻雲偏畫船載取春歸去餘情
寄湖水湖烟明日重扶殘醉來尋陌上花鈿

玉樓春

康伯可

青牋後約無憑據誤我碧桃花下語誰將消息問劉
郎悵望玉溪溪上路春來無限傷情緒擬欲題紅
都寄與東風吹落一庭花手把新愁無寫處

又

江開之開月湖

風前簾幕沾飛絮家在垂楊深處住倚樓無語憶郎
時恰是去年今日去帝城蕭鼓青春暮應有多情
游冶處爭知日日小闌干望斷斜陽芳草路

又

王輔道

秋閨思入江南遠
簾幕低垂閑不卷
玉珂聲斷曉屏空
好夢驚回還起懶
風輕只覺香烟短
陰重不知天色晚
隔窓人語下朝歸
旋整宿粧勻睡眠

又

史邦卿

遊人等得春晴也
處處旗亭堪繫馬
雨前穠杏尚娉婷
風後殘梅無顧藉
忌拈針線還逢社
聞草嬴多裙欲卸
明朝雙燕定歸來
叮囑重簾休放下

又擬宮詞

高賓王

幾雙海燕來金屋
春滿離宮三十六
春風剪草碧纖纖

纖春雨浥花紅撲撲 衛姬鄭女腰如束齊唱陽春
新製曲曲終移宴起笙簫花下晚寒生翠縠

又

晏叔原

小憐未解論心素狂似秦箏弦底柱臉邊霞散酒初
醒眉上月殘人欲去 舊時家近章臺住盡日東風
吹柳絮生憎繁杏欲陰時正礙粉牆偷眼處

瑞鷓鴣

徐道暉

雨多庭石上苔文門外春光老幾分為把舊書藏寶
帶誤翻殘酒濕綃裙 風頭花片難裝綴愁裏鶯聲
怯聽聞恰似剪刀裁破恨半隨妾處半隨君

漁家傲

周美成

仄暖香融銷永晝蒲桃上格春藤秀曲角闌干羣雀
聞清明後風梳萬縷亭前柳日照釵梁光欲溜循
堦竹粉沾衣袖拂拂面紅新着酒沉吟久昨宵正是
來時候

憶少年令

元夕應制

康伯可

雙龍燭影千門夜色三五宴瑤臺舞蝶隨香飛蟬撲
鬢人自蘂宮來太平簫鼓宸居曉清漏玉壺催步
輦歸時綺羅生潤花上月徘徊

喜遷鶯令

應制

夏英公

霞散綺月沉鉤簾捲未央樓夜涼銀漢截天流宮闕
鎖清秋玉階風金莖露鳳髓香盤烟霧三千粉黛
擁宸游水殿按梁州

青玉案

辛稼軒

東風未放花千樹早吹落星如雨寶馬雕車香滿路
鳳簫聲動玉壺光轉一夜魚龍舞蛾兒雪柳黃金
縷笑靨盈盈暗香去衆裏尋他千百度驀然回首那
人却在燈火闌珊處

菩薩蠻

謝明遠

春風春雨花經眼石泉槐火春容晚流水自無情回

波聚落英 問春何處去春向天邊住舉酒欲銷愁
酒闌愁更愁

又

陳子高

綠蕪牆遶青苔院中庭日澹芭蕉卷蝴蝶上階飛烘
簾自在垂 玉鉤雙語燕寶甃楊花轉幾處簸錢聲
綠窓春睡輕

又

范至能

梅黃時節春蕭索羅衣香潤紗衣薄斜日雨絲明柳
梢紅未晴 多愁多病後不識曾中酒愁病送春歸
恰如中酒時

又

辛稼軒

青山欲共高人語
聯翩萬馬來
無數烟雨却低回
望來終不來
人言頭上髮
總向愁中白
拍手笑沙鷗
一身都是愁

又商婦怨

江開之

春時江上蘆纖雨
張帆打鼓開船去
秋晚恰歸來看
看船又開
嫁郎如未嫁
長是淒涼夜
情少利心多
郎如年少何

又

陳子高

赤欄橋盡香街直
籠街細柳嬌無力
金碧上春空
花

晴簾幕紅 黃衫飛白馬 日日青樓下 醉眼不逢人

午香吹暗塵

又

聞人武子

晴風吹暖枝頭雪 露華香沁庭中月 屏上小江南 雨
昏天際帆 翠釵香霧濕側鬢 雲鬆立燈背 欲眠時
曉鶯還又啼

又

劉叔擬

吹簫人去行雲杳 香篝翠被都閑了 疊損綈金衣 是
他渾不知 冷烟寒食夜 澹月梨花下 猶是軟心腸
為他燒夜香

釵頭鳳

陸游

紅酥手黃縢酒滿城春色宮牆柳東風惡歡情薄一
懷愁緒幾年離索錯錯錯春如舊人空瘦淚痕紅
浥鮫綃透桃花落開池閣山盟雖在錦書難託莫莫
莫

少年遊 荊州作

周美成

南都石黛掃晴山衣薄耐朝寒一夕東風海棠花謝
樓上捲簾看而今麗日明如洗南陌暖雕鞍舊賞
園林喜無風雨春鳥報平安

浣溪沙

全前

日薄塵飛官路平
眼明喜見汴河傾
地遙人倦莫兼
程
下馬先尋題壁字
入門閑記榜村名
早收燈火
夢傾城

南歌子

范至能

悵望梅花驛凝情杜若洲
雪雲低處有高楼
可惜高樓不近水
蘭舟
緘素雙魚遠題紅一葉秋
欲憑江水寄離愁
江已東流那肯更西流

江神子

東坡

翠蛾羞黛怯人看
掩霜紉淚偷彈
且盡一杯收淚唱
陽關
漫道帝城天樣遠
天易見見君難
畫堂新締

近孤山曲闌干為誰安飛絮落花春色屬明年欲掉
小舟尋舊事無處問水連天

又

盧申之

畫樓簾幕卷新晴掩銀屏曉寒輕墜粉飄香日日喚
愁生暗數十年湖上路能幾度著娉婷年華空自
感飄零擁春醒對誰醒天濶雲閑無處覓簫聲載酒
買花年少事渾不似舊心情

謁金門

賀方回

李黃門夢得一曲前遍二十言後遍
二十二言而無其聲余采其前遍
一橫字已續二
十五字寓之云

楊花落燕子橫穿朱閣常恨春醪如水薄閑愁無處
著綠野帶江山路角桃葉參差前約歷歷短檣沙
外泊東風晚來惡

又春雪

韓无咎

春尚淺誰把玉英裁剪儘道梅梢開未遍捲簾花滿
院樓上酒融歌暖樓下水平烟遠却似湧金門外
見絮飛波影亂

又

趙德莊

休相憶明夜遠如今日樓外綠烟村幕幕花飛如許
急柳岸晚來船集波底斜陽紅濕送盡去雲成獨

立酒醒愁又入

西江月

趙德麟侯鯖錄云司馬溫公剛風勁
節聳動朝野疑其金心鍊意不善吐
婉嫕辭今觀此闌雅亦風情不薄又
見楊元素本事曲

寶髻鬆鬆梳就鈿華淡淡粧成青烟紫霧罩輕盈飛
絮游絲無定相見爭如不見有情何似無情笙歌
散後酒初醒深院月斜人靜

好事近

宋子京

睡起玉屏空鶯去亂紅猶落天氣驟生輕暖襯沉香
羅薄珠簾約住海棠風愁拖兩眉角昨夜一庭明
月冷秋千紅索

陽春白雪卷第一終

陽春白雪卷第二

臨濮 趙 聞禮 立之選

瑞龍吟 周美成

章臺路還見褪粉梅梢試華桃樹悵悵坊陌人家定
巢燕子歸來舊處黯凝竚因記個人癡小乍窺門戶
侵晨淺約宮黃障風映袖盈盈笑語前度劉郎重到
訪鄰尋里同時歌舞惟有舊家秋娘聲價如故吟
箋賦筆猶記燕臺句知誰伴名園露飲東城閑步事
與孤鴻去探春盡是傷離意緒官柳低金縷歸騎晚
纖纖池塘飛雨斷腸院落一簾風絮

惜黃花慢

田不伐

雁空浮碧印曉月露洗重陽天氣望極樓外澹烟半
隔疎林掩映斷橋流水黃金籬畔白衣人更誰會淵
明深意晚風低落日亂鴻飛起無際情多對景淒
涼念舊賞步履登高迢遞興滿東山共携素手持杯
勸泛玉漿雲蕊此時霜鬢欲歸心謾老盡悲秋情味
向醉裏免得又成憔悴

惜餘春慢

魯逸仲

弄月餘花團空飛絮露濕池塘春草鶯鶯戀友燕燕
將雛惆悵睡殘清曉還似初相見時攜手旗亭酒香

棣小向登臨長是傷春滋味淚彈多少 因甚却暫
許風流終非長久又說分飛煩惱羅衣瘦損繡被香
銷那更亂紅如掃門外無窮路岐天若有情和天須
老念高唐歸夢淒涼何處水流雲繞

花心動

連昌宮之感

無名氏

碧瓦朱甍鎖千門沉沉麗日初旭畫棟暗塵錦瑟空
弦窈窕故窓紅綠御柳宮花依然好春不管為誰粧
束翠華遠風光盡屬野樵夷牧 指似行人慟哭尚
能道先朝聖游不足鳳輦路荒龍沼波乾猶有棄珠
遺玉禁廊人靜風琴響祇疑是霓裳遺曲斷魂晚寒

鴉又啼古木

法曲獻仙音

姜堯章

虛閣籠寒小簾通月暮色偏憐高處樹隔離宮水平
馳道湖山盡入尊俎奈楚客淹留久砧聲帶愁去屢
回顧過西風未成歸計誰念我重見冷楓紅舞喚
起澹粧人問逋仙今在何許象筆鸞箋甚而今不道
秀句怕平生幽恨化作沙邊烟雨

燕山亭

杏花

仲殊

裁翦冰綃輕疊數重澹著胭脂勻注新樣倩粧艷溢
香融羞殺蕊珠宮女易得凋零更多少無情風雨愁

苦閑院落淒涼幾番春莫
憑寄離恨重重這雙燕
何曾會人言語天遙地遠萬水千山知他故宮何處
怎不思量除夢裏有時曾去無據和夢也新來不做

波羅門引

楊如晦

帳雲莫捲漏聲不到小簾櫳銀潢夜洗晴空皓月當
軒高掛秋入廣寒宮正金波不動桂影玲瓏佳人
未逢悵此夕與誰同對酒當歌追念霜滿愁紅南樓
何處想人在橫笛一聲中凝望眼立盡西風

喜遷鶯曉行

劉行簡

曉光催角聽宿鳥未驚鄰雞先覺迤邐烟村馬嘶人

起殘月尚穿林薄淚痕帶霜微凝酒力衝寒猶弱歎
倦客諠不禁重染風塵京洛 追念人別後心事萬
重難覓孤鴻託翠幌嬌深曲屏春暖爭念歲華飄泊
怨月恨花煩惱不是不曾經着這情味望一成銷減
新來還惡

玉蝴蝶

潘元質

睡起日高鶯轉畫簾低卷花影重重醉眼羞攢嬌困
猶自未惺鬆繡床近強來描翠粧鏡掩不肯勻紅錦
屏空對花無語獨怨春風 恁恁庾郎去後香銷玉
減是事疎慵縱縱蠻箋封了何處問鱗鴻臉中淚萬行

難盡眉上恨一點偏濃香無蹤夜來惟有幽夢相逢

月下笛

姜堯章

與客携壺梅花過了夜來風雨幽禽自語啄香心度
牆去春衣都是柔荑剪尚沾惹殘茸半縷悵玉鈿似
掃朱門深閉再見無路凝佇曾游處但繫馬垂楊
認郎鸚鵡揚州夢覺共彩雲飛過何許多情須倩梁
間燕問吟袖弓腰在否怎知道誤了人年少自恁暗
度

石州影

賀方回

薄雨收寒斜照弄晴春意空濶長亭柳蓓纔黃倚馬

何人先折烟橫水漫映帶幾點歸鴻平沙銷盡龍荒
雪猶記出關來恰如今時節將發畫樓芳酒紅淚
清歌便成輕別回首經年杳杳音塵都絕欲知方寸
共有幾許新愁芭蕉不展丁香結憔悴一天涯兩厭
厭風月

洞仙歌

一年春物惟梅柳間意味最深至鶯
花爛熳時則春已衰遲使人無復新
意作此因使探春者
歌之無復後時之悔

李元膺

雪雲散盡放曉晴池苑楊柳于人便青眼更風流多
處一點梅心相映遠約畧顰輕笑淺一年春好處
不在濃芳小艷疎香最嬌軟到清明時候百紫千紅

花正亂已失春風一半蚤占取韶光共追游但莫管
春寒醉紅自暖

洞仙歌

宜春潘明叔云蜀王與花蕊夫人避暑摩訶池上賦洞仙歌其辭不

見於世東坡得老尼口誦兩句遂足之蜀帥謝元明因開摩訶池得古石

刻遂見全篇

冰肌玉骨自清涼無汗貝闕琳宮恨初遠玉闌干倚
遍怯盡朝寒回首處何必留連穆滿芙蓉開過也
樓閣香融千片紅英泛波面洞房深深鎖莫放輕舟
瑤臺去甘與塵寰路斷更莫遣流紅到人間怕一似
當時誤他劉阮

又 荷花

康伯可

若耶溪路別岸花無數欲斂嬌紅向人語與綠荷相
倚恨回首西風波淼淼三十六陂烟雨新粧明照
水汀渚生香不嫁東風被誰誤遣踟躕騷客意千里
絲綿烟浪遠何處凌波微步想南浦潮生畫橈歸正
月曉風清斷腸凝佇

又 月

晁无咎

青烟幕處碧海飛金鏡永夜閑階卧桂影露涼時零
亂多少寒蛩神京遠惟有藍橋路近水晶簾不下
雲母屏開冷浸佳人淡脂粉侍都将許多明付與金

尊投曉共流霞傾盡更携取胡床上南樓看玉做人
間素秋千頃

江神子慢

田不伐

玉臺掛秋月鉛素淺梅花傳香雪水姿潔金蓮襯小
小凌波羅襪雨初歇樓外孤鴻聲漸遠遠山外行人
音信絕此恨對語猶難那堪更寄書說教人紅銷
翠減覺衣寬金縷都為輕別太情切銷魂處畫角黃
昏時節聲嗚咽落盡庭花春去也銀蟾迥無情圓又
缺恨伊不似餘香惹鴛鴦結

又睡香

蔡伯堅

紫雲點風葉岩樹小婆娑歲寒節占高格纖包暖釀
出梅魂蘭魄照濃碧茗椀添春花氣重雲窓晚濛濛
浮霽月小眠鼻觀先通廬山夢舊清絕 蕭閑平生
澹泊獨芳溫一念猶未衰歇種陳迹而今老但覓茶
烟禪榻寄閑寂風外天花無夢也鴛鴦債從渠千萬
劫夜寒回施幽香與春愁客

慶清朝

王通叟

調雨為酥催冰做水化工分付春還何人便將輕暖
點破殘寒結伴踏青去好平頭鞋子小雙鸞烟郊外
望中秀色如有無間 晴則箇陰則箇便瑞得芳心

有許多般空教鏤花撥柳須要先看不道吳綾繡襪
香泥斜沁幾行斑東風巧畫收嫩綠吹上眉端

瑞鶴仙梅

辛稼軒

鴈霜寒透幙正護月雲輕嫩冰猶薄溪奩照梳掠想
含香弄粉艷粧難學玉肌瘦弱更重重龍綃襯著倚
東風一笑嫣然轉盼萬花羞落寂寞家山何在雪
後園林水邊樓閣瑤池舊約鱗鴻更仗誰託粉蝶兒
只解尋花覓柳開遍南枝未覺但傷心冷落黃昏數
聲畫角

齊天樂

周美成

綠蕪彫盡臺城路殊鄉又逢秋晚暮雨生寒鳴蛩勸
織深閨時聞裁剪雲窓靜掩歎重拂羅袖頓疎花萼
尚有綵囊露螢清夜照書卷 荆江留滯最久故人
相望處離思何限渭水西風長安亂葉空憶詩情宛
轉凭高眺遠正玉液新菊蟹螯初薦醉倒山翁但愁
斜照斂

望海潮

黃岩叟

梅天雨歇柳堤風定江浮畫鷁縱橫瀛女弄蕭馮夷
伐鼓雲間鳳咽鼉鳴波面走長鯨捲怒濤來往攪碎
滄溟兩岸遊人笑語羅綺間簪纓 靈均逝魄無憑

但湘沅一水到底澄清
菰黍萬家絲桐五絲
年年弔古深情錦幟
片霞明使操舟妙手
翻動心旌向晚魚龍
戲罷千里浪花平

又

柳耆卿

東南形勝江吳都會
錢塘自古繁華烟柳
畫橋風簾翠幕參差
十萬人家雲樹遠堤
沙怒濤卷霜雪天塹
無涯市列珠璣戶盈
羅綺競豪奢重湖疊
巘清嘉有三秋桂子
十里荷花羌管弄晴
菱歌泛夜嬉嬉釣叟
蓮娃千騎擁高牙乘
醉聽簫鼓吟賞烟霞
異日圖將好景歸去
鳳池誇

又

秦少游

星分斗斗疆連淮海揚州萬井提封花發路香鶯啼
人起珠簾十里東風豪俊氣如虹曳照春金紫飛蓋
相從卷入垂楊畫橋南北翠烟中 追思故國繁雄
有迷樓掛斗月觀橫空紋錦製帆明珠濺雨寧論爵
馬魚龍往事逐孤鴻但亂雲流水縈帶離宮最好揮
豪萬字一飲拚千鍾

揚州慢

姜堯章

淮左名都竹西佳處解鞍少駐初程過春風十里盡
薺麥青青自胡馬窺江去後廢池喬木猶厭言兵漸

黃昏清角吹寒都在空城。杜郎俊賞，而今重到，
須驚縱。豈尅詞工，青樓句好，難賦深情。二十四橋，仍
在波心，蕩冷月無聲。念橋邊紅藥，年年知爲誰生。

金人捧露盤

送范東叔給
事帥維揚

高續古

下明光，違宣曲，上揚州。玉帳煖，十萬貔貅。梅花照雪，
月隨歌吹到江頭。牙檣錦纜，聽鴈聲，夜宿瓜洲。南

山客，東山妓，蒲萄酒，鸕鶿裘。占何遜，杜牧風流。瓊花
紅藥，做珠簾十里，遶頭竹。西歌吹，理新曲。人在春樓。

又梅

高賓王

念瑤姬，翻瑤佩，下瑤池。冷香夢，吹上南枝。羅浮夢香

憶曾清曉見仙姿
天寒翠袖可憐是倚竹依依
溪痕淺雲痕凍
月痕淡粉痕微
江樓怨一笛休吹芳音
待寄玉堂烟驛雨
淒迷新愁萬斛為春瘦却怕春知

又水仙

前人

夢湘雲吟湘月
弔湘靈有誰見羅襪塵生
凌波步穩背人羞整六銖
輕娉婷裊裊暈嬌黃玉色
輕明香心靜波心冷
琴心怨客心驚怕珮解却
返瑤京盃擎清露醉春蘭
友與梅兄蒼烟萬頃
斷腸是雪冷江清

水龍吟梨花

周美成

素肌應怯餘寒艷
陽占立青蕪地樊川照日
靈闕遮

路殘紅斂避傳火樓臺妬花風雨長門深閉亞簾櫳
半濕一枝在手偏勾引黃昏淚別有風前月底布
繁陰滿園歌吹未鉛退盡潘妃却酒昭君乍起雪浪
翻空粉裳縞夜不成春意恨玉容不見瓊英漫好與
何人比

又三峯閣

韓无咎

雨餘疊巘浮空望中秀色都仙市洞天未鎖人間春
好玉妃曾墜錦瑟繁弦鳳簫清響九霄歌吹問分香
舊事劉郎去後還誰共風前醉回首暝烟千里但
霏霏落紅如淚多情易老青鸞何在詩成難寄月轉

參橫半簾花影一溪寒水漲行雲夢斷飛鴻路杳有
三山翠

永遇樂

李易安

落日鎔金暮雲合壁人在何處染柳烟濃吹梅笛怨
春意知幾許元宵佳節融和天氣次第豈無風雨來
相召香車寶馬謝他酒朋詩侶中州盛日閨門多
暇記得偏重三五鋪翠冠兒撚金雪柳簇帶爭濟楚
如今憔悴風鬟霜鬢怕見夜間出去不如向簾兒底
下聽人笑語

又

次韻弔青樓

高賓王

淺暈修蛾脆痕紅粉猶記窺戶香斷簾空塵生砌冷
誰喚青鸞舞春風花信秋宵月約歷歷此心曾許街
芳恨千年怨結玉骨未應成土 木蘭艇子莫愁何
在漫繫寒江烟樹事逐雲沉情隨珮冷短夢分今古
一盃遙夜孤光難曉多少碎人腸處空淒黯西風細
雨盡吹淚去

漢宮春

辛幼安

春已歸來看美人頭上裊裊春旂無端風雨未肯收
盡餘寒年時燕子料今宵夢到西園渾未辨黃柑薦
酒更傳青韭堆盤 却笑東風從此便薰梅染柳更

沒些閑閑時又來鏡裏轉變朱顏清愁不斷問何人
會解連環生怕見花開花落朝來塞鴈先還

又秋風亭

前人

秦望山頭看亂雲急雨倒立江湖不知雲者為雨雨
者雲乎長安萬里被西風變滅須臾回首聽月明天
籟人間萬竅號呼誰問若耶溪上倩美人西去麋
鹿姑蘇至今故國人望一舸歸歟歲云莫矣問何不
鼓瑟吹竽君不見王亭謝館冷烟寒樹啼烏

玉蝴蝶

史邦卿

晚雨未摧宮樹可憐閑葉猶抱涼蟬短景歸秋吟思

又接愁邊漏初長夢魂難禁人漸老風月俱寒想幽
歡土花庭甃蟲網闌干無端啼蛄攪夜恨隨團扇
苦近秋蓮一箇當樓謝娘懸淚立風前故園晚強留
詩酒新鴈遠不致寒暄隔蒼烟楚香羅袖誰伴嬋娟

聲聲慢 九日送客

吳君持

檀欒金碧婀娜蓬萊游雲不蘸芳洲露柳霜蓮十分
點綴殘秋新彎畫眉未穩似含羞低度牆頭愁送遠
駐西臺車馬共惜臨流知道池亭多宴掩庭花長
是驚落秦謳膩粉闌干猶聞凭袖香留輸他翠連拍
甃瞰新粧時浸明眸簾半捲帶黃花人在小樓

高陽臺

王通叟

紅入桃腮青回柳眼韶華已破三分人不歸來空教
草怨王孫平明幾點催花雨夢半闌歌枕初間問東
君因甚將春老了閑人東郊十里香塵滿旋安排
玉勒整頓雕輪趁取芳時共尋島上紅雲朱衣引馬
黃金帶筭到頭總是虛名莫閑愁一半悲秋一半傷
春

又除夜

韓子耕

寥
蕭閒

頻聽銀籤重燃絳蠟年華衮衮驚心餞舊迎新能消
幾刻光陰老來可慣通宵飲待不眠還怕寒侵掩清

尊多謝梅花伴我微吟
鄰娃已試春粧了更蜂腰
簇翠燕股橫金勾引東風也知芳思難禁朱顏那有
年年好逞艷游羸取如今恣登臨殘雪棲臺遲日圍
林

鷓鴣天

晁子止

或云戴平之

笑擘黃柑酒半醒
玉壺金斗夜生冰
開窓盡見千山雪
雪未消時月正明
蘭爐短麝煤輕
畫樓鐘鼓已三更
倚欄誰唱清真曲
人與梅花一樣清

又

辛稼軒

撲面征塵去路遙
香篝漸覺水沉銷
山無重數周遭

碧花不知名分外嬌 人歷歷馬蕭蕭旌旗又過小
紅橋愁邊剩有相思句 搖斷吟鞭碧玉梢

又元正

姜堯章

柏綠椒紅事事新 隔籬燈影賀年人 三茅鐘動西窓曉
詩鬢無端又一春 慵對客緩開門 梅花開伴老
來身 嬌兒學作人間字 鬱壘神荼寫未真

又

張功甫

御路東風拂翠衣 賣燈人散燭籠稀 不知月底梅花
冷 只憶橋邊步韞歸 閑夢澹舊游 非夜深誰在小
簾幃 呆愚兒下圍爐坐 明處行人立地時

又

高賓王

剪翠衫兒穩四停最憐一曲鳳簫吟同心羅帕輕藏
素合字香囊半影金春思悄畫窓深誰能拘束少
年心鶯來驚碎風流胆踏動櫻桃葉底鈴

又

史邦卿

睡袖無端幾摺香有人丹臉可占霜半窓月印梅猶
瘦一律餅笙夜正長情灑灑酒汪汪小屏誰與畫
鴛鴦解衣恰恨敲金釧驚起春風傍枕囊

柳梢青

楊補之

傲雪凌霜却回寒力攬借春光步繞西湖興餘東閣

可奈詩腸 娟娟月轉回廊悄無處安排暗香一夜
相思幾枝疎影落在寒窓

又

月轉牆東幾枝寒影一點香風清不成眠醉憑詩興
起遶珍叢 平生只个情鍾漸老矣無愁可供最是
難忘倚樓人在橫笛聲中

又

玉骨冰肌為誰偏好特地相宜一段風流廣平休賦
和靖無詩 綺窓睡起春遲困無力菱花笑窺嗅蕊
吹香眉心貼處鬢畔簪時

又

駐馬橫塘水光搖曳山色微茫冷蕊寒枝疎疎沉影
細細吹香臨風惱斷回腸漫立盡烟村夕陽指點
吟鞭安排詩句不入思量

又元日立春

吳雲壑

居父
琚

綵仗鞭春驚毛飛管斗柄回寅拂面東風雖然料峭
畢竟寒輕戴花折柳心情怎捱得元宵放燈不是
今朝有些殘雪先去踏青

又西湖

趙子真汝愚

水月光中烟霞影裏湧出樓臺空外笙簫雲間笑語

人在蓬萊 天香暗逐風回正十里荷花盛開買个
扁舟山南遊遍山北歸來

夜行船 梅

劉行簡

十頃疎梅開半就折芳條嫩香沾袖今度何郎尊前
重見花共那人俱瘦 測測輕寒吹散酒巖城近怕
聽更漏可惜溪橋月明風細長是在人歸後

又

盧申之

暖入新梢風又起秋千外霧縈絲細鳩侶寒輕燕泥
香重人在杏花窓裏 十二銀屏山四倚春醪困共
篝沉水却說當時柳啼花怨魂夢為君迢遞

又

史邦卿

不剪春衫愁意態過燒燈有些寒在小雨空簾無人
深巷已早杏花先賣白髮潘郎寬沈帶怕看山憶
他眉黛草色拖裙烟光惹鬢尚記故園挑菜

霜天曉角

蛾眉亭

韓无咎

倚天絕壁直下江千尺天際兩蛾凝黛愁與恨幾時
極暮潮風正急酒醒聞塞笛試問謫仙何處青山
外遠烟碧

又

高賓王

春雲粉色春水和雲濕試問西湖楊柳東風外幾絲

望極連翠陌，蘭橈風正急。欲訪莫愁何處，旗亭在畫橋側。

臨江仙

陳簡齋

憶昔午橋橋上飲，坐中多是豪英。長溝流月去無聲。杏花疎影裏，吹笛到天明。
二十餘年如一夢，此身雖在堪驚。閑登小閣看新晴。古今多少事，漁唱起三更。

浣溪沙

李易安

澹蕩春光寒食天，玉爐沉水裊殘烟。夢回山枕隱花鈿。
海燕歸來人闕草，江梅已過柳生綿。黃昏疎雨

濕秋千

又

賀方回

鸚鵡無言理翠衿
杏花零落畫陰陰
畫橋流水半篙深
芳徑與誰期
闌草繡床終日罷
拈針小牋香管寫春心

又

一色烟雲澹不銷
兩峯眉黛為誰嬌
莫寒猶在木蘭桡
燕子似甘愁
寂寞海棠未肯醉
妖嬈小園嫩約尚蕭條

又

張安國

鷓鴣樓高晚雪融
鴛鴦池暖暗潮通
鬱金黃染柳絲風
油壁不來春草綠
雕闌倚遍夕陽紅
江南山色有無中

又

趙子發

疎蔭搖搖趁岸移
驚鷗點點過帆飛
船分水打嫩沙回
斷夢不知人去處
卷簾還有燕來時
日斜風緊掉灣西

又

李次山

花圃紫回曲徑通
小亭風捲繡簾重
秋千閑倚畫橋東
雙蝶舞餘紅面旋
交鶯啼處綠葱蘢
遠山眉黛

晚來濃

又

蔡伯堅

溪雨空濛洒面涼
莫春初見柳梢黃
綠陰空憶送春忙
芍藥弄香紅撲暖
荼蘼趁雪翠綃長
夢為蝴蝶亦還鄉

又

耿時舉

露壓薔薇金井欄
轆轤聲斷碧絲乾
遼陽無信帶圍寬
花落池塘春夢靜
月生簾幕夜香寒
閑愁無力凭闌干

西江月

張安國

問訊湖邊春色重來又是三年東風吹我過湖船楊
柳絲絲拂面 世事如今已慣此心到處悠然寒光
亭下水連天驚起沙鷗一片

又

滿載一船秋色平鋪十里湖光波神留我看斜陽吹
起鱗鱗細浪 明日風回更好今朝露宿何妨水晶
宮裏奏霓裳準擬岳陽樓上

又

張武子

四壁空圍恨玉十香淺捻啼綃殷雲度雨井桐凋鴈
鴈無書又到 別後釵分燕股病餘鏡減鸞腰蠻江

荳蔻影連梢不道參橫易曉

又

盧申之

燕掠晴絲裊裊魚吹水葉翻翻
禁街微雨灑香塵寒食清明相近
漫著宮羅試暖閑呼社酒酬春晚
風簾幕悄無人二十四番花訊

又

梁上喃喃燕語紙間戢戢蠶生
滿城風雨近清明不道有人新病
春事一溪流水楊花千點浮萍好
風一霎為吹晴獨步小園清影

琴調相思引

許忱甫

組繡盈箱錦滿機
倩誰縫作護花衣
恐花飛去無復
上芳枝
已恨遠山迷
望眼不須更盡遠
山眉正無聊
賴花外一鳩啼

蝶戀花

何惜之

又出清真集

魚尾霞收明遠樹
翠色粘天一葉迎
風舉
一笑相逢蓬海路
人間風月如塵土
剪水雙眸雲鬢吐
醉倒天瓢笑語生
香霧
此會未聞須記取
蟠桃幾度吹紅雨

又

賀方回改徐冠卿詞

幾許傷春春復莫
楊柳清陰偏礙遊絲度
天際小山

桃葉步白蘋花滿浦裙處 竟日微吟長短句簾影
燈昏心寄胡琴語數點雨聲風約住朦朧淡月雲來
去

又

洪覺範

碧瓦籠晴烟霧繞水殿西偏小立聞啼鳥風度女牆
吹語笑南枝破臘應開了 道骨不凡江瘴曉春色
通靈醫得花重少曝暖釀寒空杳杳江城畫角催殘
照

又紅梅

真西山

兩岸月橋花半吐紅透肌香暗把遊人誤畫道武陵

溪上路不知迷入江南去 先自冰霜真態度何事
枝頭點點胭脂污莫是東君嫌淡素問花花又嬌無
語

又

劉武子

團扇題詩春又晚小夢驚殘碧草池塘滿一曲銀鈎
簾半捲綠窓睡足鶯聲軟 瘦損衣圓羅帶減前度
風流從覺心情懶誰品新腔拈翠管畫樓吹徹江南
怨

又蓮

宋景文

雨過蒲萄新漲綠蒼玉盤傾碎墮珠千斛姬監擁前

紅簇簇溫泉初試真妃浴
驛使南來丹荔熟故剪
經綃一色頒時服嬌汗易晞凝醉玉清涼不用香綿
撲

感皇恩

晁叔用

寒食不多時牡丹初賣小院重簾燕飛礙昨宵風雨
只有一分春在今朝猶自得陰晴快
熟睡起來宿
醒微帶不惜羅襟揜眉黛日高梳洗看著花陰移改
笑摘雙杏子連枝戴

青玉案

史邦卿

蕙花老盡離騷句漸綠染遍江頭樹日午酒消聽驟

附卷第二
雨青榆錢小碧苔錢古難買東君住 遺鞭不礙官
河路被芳草將愁去多定紅樓簾影暮蘭燈初上夜
香初炷猶自聽鸚鵡

陽春白雪卷第二終

陽春白雪卷第三

臨濮 趙 聞禮 立之選

摸魚兒

辛幼安

更能消幾番風雨。匆匆春又歸去。惜春長恨花開早。
何況落紅無數。春且住。見說道天涯芳草無歸路。怨
春不語。算只有殷勤。畫檐蛛網。盡日惹飛絮。長門
事。準凝佳期。又誤蛾眉。曾有人妬。千金莫買。相如賦。
脉脉此情誰訴。君莫舞。君不見玉環飛燕皆塵土。閑
愁最苦。休去倚危闌。斜陽正在烟柳斷腸處。

又潮

前人

望飛來半空鷗鷺須臾動地鼙鼓截江組練驅山去
鏖戰未收貔虎朝又暮悄悄慣得吳兒不怕蛟龍怒風
波平步看紅旆驚飛跳魚直上感踏浪花舞憑誰
問萬里長鯨吞吐人間兒戲千弩滔天力倦知何事
白馬素車東去堪恨處人道是子胥冤憤終千古功
名自誤漫教得陶朱五湖西子一舸弄烟雨

又九日登姑蘇臺

盧申之

怪西風曉來歌帽年華還是重九天機袞袞山新瘦
客子情懷誰剖微雨後更鴈帶邊寒裊裊欺羅袖慵
倚倦柳悄不似黃花田田照眼風味儘如舊登臨

地寂寞崇臺最久闌干幾度搔首翻雲覆雨無窮事
流水斜陽知否吟未就但衰草寒烟商畧愁時候開
愁浪有總輸與淵明東籬醉舞身世付盃酒

風流子

賀方回

何處最難忘方豪健放樂五雲鄉絲筆賦詩禁池芳
草杏鞦調馬輦路垂楊綺筵上扇偎歌黛淺汗裛舞
羅香蘭燭伴歸繡輪同載閑花別館隔水深坊零
落少年場琴心漫流怨帶眼偷長無奈占牀燕月欺
髻吳霜念北里音塵魚封永斷便橋烟雨鶴表相望
好在後庭桃李應記劉郎

又

康伯可自叙云昔賀方回作此道都咸舊游僕謫居嶺海醉中忽有歌之者用其聲律再賦一闋恨方回久下世不見此作

結客少年場繁華夢當日賞風光紅燈九街買移花
市盡樓十里特地梅粧醉魂蕩龍跳撈萬字鯨飲吸
三江嬌隨鈿車玉驄南陌喜搖雙槳紅袖橫塘天
涯歸期阻衡陽鴈不到路隔三湘難見謝娘詩好蘇
小歌長漫自惜鸞膠朱弦何在暗藏羅結紅綬消香
歌罷淚沾宮錦襟袖淋浪

又

陸務觀

佳人多命薄初心慕德耀嫁梁鴻記綠窓睡起靜吟

閑詠句翻離合格變玲瓏更乘興素紈留戲墨纖玉
撫孤桐蟾滴夜寒水浮微凍鳳牋春麗花研輕紅
人生誰能料堪悲處身落柳陌花叢翻羨畫堂鸚鵡
深閉金籠向寶鏡鸞釵臨粧常晚繡茵牙版催舞還
慵腸斷市橋月笛燈院霜鐘

又

史邦卿

紅樓橫落日蕭郎去幾度碧雲飛記窓眼遞香玉臺
粧罷馬蹄敲月沙路人歸如今但一鶯通信息雙燕
說相思入耳舊歌怕聽金縷斷腸新句羞染烏絲
相逢南溪上桃花嫩嬌樣淺澹羅衣恰是怨深腮赤

愁重聲遲悵東風巷陌草迷春恨軟塵庭戶花悞幽
期多少寄來芳字都待還伊

又

孫花翁

三疊古陽關輕寒喋清月滿征鞍記玉笋攬衣翠囊
親贈繡巾搵臉金柳初攀自回首燕臺雲掩萼鳳閣
雨闌珊天有盡頭水無西注髻難留黑帶易成寬
啼妝東風悄菱花在擬倩錦字封還應想恨蛾凝黛
慵髻堆鬟奈情逐事遷心隨春老夢和香冷歡與花
殘閑煞唾茸窓閣十二屏山

又

吳彥高

書劍憶遊梁當時事底處不堪傷
蘭棹嫩漪向吳南
浦杏花微雨窺宋東牆鳳城外燕隨青步障
絲惹紫
遊韁曲水古今禁烟前後綠楊樓閣芳草池塘
回首斷柔腸年芳但如霧鏡髮成霜猶賴蟻尊陶寫蝶
夢悠揚聽出塞琵琶風沙浙瀝寄書鴻鴈烟月微茫
不似海門潮信猶到潯陽

瑞鶴仙 壽細君

趙介菴

記長亭折柳問畫堂樂事燕鴻難偶十年漫回首但
亭亭紫蓋差差南斗傳聞小有種桃花親煩素手待
歸來道骨仙風縹緲迥然非舊
清畫江南如畫紫

菊冬前翠橙霜後扁舟渡口佳客至奉名酒喚青鸞
起舞雲窓月檻一曲山明水秀笑相看玉海別來淺
如故否

新荷葉

全 前

欲暑還涼如春有意重歸春若歸來任他鶯老花飛
輕霜澹雨似晚風欺得單衣檐聲驚醉起來新綠成
圓 回首分携光風冉冉菲菲曾幾何時故山疑夢
還非鳴琴再撫將清恨都入金徽永懷橋下繫船溪
柳依依

撲蝴蝶

晏小山

風梢雨葉綠遍江南岸思歸倦客尋芳來最晚酒邊
紅日初長陌上飛花正滿淒涼數聲弦管怨春短
玉人應在明月樓中畫眉懶魚箋錦字多時音信斷
恨如去水空長事與行雲漸遠羅衾舊香餘暖

齊天樂 蟋蟀

姜堯章

庾郎先

去聲

自吟愁賦淒淒更聞私語露濕銅鋪苔侵

石井都是曾聽伊處哀音似訴正思婦無眠起尋機
杼曲曲屏山夜涼獨自甚情緒西窓又吹暗雨為
誰頻斷續相和砧杵候館吟秋離宮弔月別有傷心
無數幽詩漫與笑離落呼燈世間兒女寫入琴絲一

聲聲更苦

宣政間有士大夫製蟋蟀吟

賀新涼

劉後村

深院榴花吐。畫簾開、練衣絢扇。好風清暑。兒女紛紛
誇結束。新樣釵符艾虎。早已有、遊人觀渡。老大逢場
慵作戲。任奪標、年少爭旗。鼓溪雨。急浪花舞。靈均
標致高如許。憶生平、既纫蘭佩。更懷椒醑。誰信騷魂
千載後。波底垂涎角黍。又說是、蛟饒龍怒。把似而今
醒到了。料當年、醉死差無苦。聊一笑、吊千古。

解連環

陸務觀

淚淹粧薄。背東風、佇立柳綿池閣。漫細字書滿芳牋。

恨釵燕筍鴻總難憑託風雨無情又顛倒綠苔紅萼
仗香醪破悶怎禁夜闌酒醒蕭索 劉郎已忘故約
奈重門靜院光景如昨儘做它別有留心便不念當
時兩意初著京兆眉殘怎忍為新人梳掠儘今生拚
了為伊任人道錯

霓裳中序第一

姜堯章

亭臯正望極亂落江蓮歸未得多病都無氣力況紈
扇漸疎羅衣初索流光過隙歎杏梁雙燕如客人何
在一簾淡月彷彿照顏色 幽寂亂蛩吟壁動庾信
清愁似織沉思年少浪迹笛裏關山柳下坊陌墜紅

無信息漫暗水涓涓溜碧漂零久而今何意醉卧酒
壚側

醜奴兒慢

潘元質

愁春未醒還是清和天氣對濃綠陰中庭院燕語鶯
啼數點新荷翠鈿輕泛水平池一簾風絮纔晴又雨
梅子黃時 忍記那回玉人嬌困初試單衣共攜手
紅窓描繡畫扇題詩怎有如今半牀明月兩天涯章
臺何處應是為我感損雙眉

又

盧申之

湘筠展夢還是帶恨歌枕對千頃風荷涼艷水竹清

陰半掩龜紗幾回小語月華侵娉婷何處回首畫橋
朱戶沈沈聞道近時題紅傳素長是霑襟想當日
冰弦彈斷總廢清音準擬歸來扇鸞釵鳳巧相尋如
今無奈七十二峯剗地雲深

夜飛鵲慢

盧申之

驕嘶破清曉分恨臨期花下恁月明知餘光是處散
離思最憐香靄霏霏牽衣搵彈淚粉問淒風愁露剗
地東西留鞭換珮怕匆匆已是遲遲涼怯幾番羅
袂還燕別文梁螢點書帷一自秋娘迢遞黃金對酒
爭忍輕攜新來院落燕難尋簾幕長垂怕彫梧敲徑

驚回舊夢應也顰眉

石州引

謝勉仲懋靜寄

日脚斜明秋色半陰人意淒楚飛雲特地凝愁做弄
晚來微雨誰家別院舞困幾葉霜紅西風送客聞砧
杵鞭馬出都門正潮平洲渚無語匆匆短棹滿載
離愁片帆高舉京洛紅塵因念幾年羈旅淺顰輕笑
舊時風月逢迎別來誰畫雙眉嫵回首一銷凝望歸
鴻容與

三姝媚過都城舊居

吳君持

湖山經醉慣漬春衫啼痕酒痕無限又客長安歎斷

襟零袂浣塵誰浣紫曲門荒
訟敗井風搖青蔓對語
東隣猶是曾巢謝堂雙燕
春夢人間須斷但怪得
當時夢緣能短繡屋秦箏
傍海棠偏愛夜深開宴舞
歌歌沈花未減紅顏先變
貯久河橋欲去斜陽淚滿

喜遷鶯 曉行

孫居敬

宿醒初愈更花燭頻催葉蕉重舉
濃露沾叢酸風入
樾黃葉馬頭飛舞夢結尚依征旆
笛怨誰教漁譜村
路轉見寒機燈在晨炊人語
無據堪恨處殘月滿
襟不念人羈旅天接山光雲拖鴈影
多少別離情緒
繡被香溫密疊羅帕粉痕重護
這滋味最不堪兩鬢

菱花羞覩

燭影搖紅

吳大年億

臘雪初消麗譙吹罷單于晚使君千騎起班春歌吹
香風暖十里珠簾盡卷正人在蓬壺間苑賣薪買酒
立馬傳觴昇平重見誰識遨頭去年曾侍傳柑宴
至今衣袖帶天香行處氤氲滿已是春宵苦短且莫
遣歡遊意懶細聽歸路壁月光中玉蕭聲遠

又

趙虛齋

乍冷還暄小春時候今朝轉三分歷日二分休鏡裏
清霜滿雲幕低垂不捲矮窓明紅麟初暖老來活計

白酒三盃黃庭一卷 萬里關河朔風吹到邊聲遠
倚樓脉脉數歸鴻誰會愁深淺最苦山寒日短但梅
花相看歲晚何人金屋巧轉歌鶯慢調箏鴈

又

孫花翁

一朵鞋紅寶釵壓髻東風溜年時也是牡丹時相見
花邊酒初試夾紗半袖與花枝盈盈開秀對花臨景
為景牽情因花感舊 題葉無憑曲溝流水空回首
夢雲不入小山屏真个歡難偶別後知他安否軟紅
街清明還又絮飛春盡天遠書沉日長人瘦

又

翁賓暢

樓倚春城瑣窓曾共巢春燕人生好夢比春風不似
楊花健舊事如天漸遠奈情緣素絲未斷鏡塵埋恨
帶粉栖香曲屏寒淺環珮空歸故園羞見桃花面
輕烟殘照下闌干獨自踈簾捲一信狂風又晚海棠
花隨風滿院亂鴉歸後杜宇啼時一聲聲怨

天香 牡丹

趙虛齋

蜀錦移芳巫雲散彩天孫剪取相寄金屋看嬌玉臺
凝眄尚憶舊家風味生香絕艷說不盡天然富貴臉
嫩渾疑看損肌柔只愁吹起花神為誰著意把韶
華總歸姝麗可是老來心事不成春思却羨錦袍帝

子調曲曲清平似翻水早晚金鸞東風歡醉

燕春臺

張子野

麗日千門紫烟雙闕瓊林又報春回殿閣風微當時
去燕還來五侯池館屏開探芳菲走馬天街重簾人
語鞦韆車轆遠近輕雷 雕觴霞艷翠幙雲飛楚腰
舞柳宮面妝梅金猊夜暖羅衣暗裊香煤洞府人歸
放笙歌燈火樓臺下蓬萊猶有花上月清影裴徊

東風第一枝 元夕

史邦卿

酒館歌雲燈街舞繡笑聲喧似蕭鼓太平京國多歡
大酺綺羅幾處東風不動照花影一天春聚耀翠光

金縷相交冉冉細吹香霧 羞醉玉少年丰度懷艷
雪舊家伴侶閉門明月闌心倚窓小梅索句吟情欲
斷奈嬌俊知人無據想袖寒珠絡藏香夜久帶愁歸去

又春雪

巧沁蘭心偷粘草甲東風欲障新暖漫疑碧瓦難留
信知暮寒較淺行天入鏡做弄出輕鬆纖軟料故園
不捲重簾誤了乍來雙燕 青未了柳回白眼紅欲
斷杏開素面舊遊憶著山陰厚盟遂妨上苑寒爐重
煖便放慢春衫針線恐鳳靴挑菜歸來萬一灞橋相
見

夢橫塘 晚行

劉行簡

浪痕經雨髻影吹寒曉來無限蕭瑟野色分橋剪不
斷溪山風物船繫朱藤路迷煙寺遠鷗浮沒聽疎鐘
斷鼓似近還遙驚心事傷羈客 新醅旋壓驚黃拚
清愁在眼酒病紫骨繡閣嬌慵爭解說短封傳憶念
誰伴塗粧綰髻嚼蕊吹花弄秋色恨對南雲此時悽
斷有何人知得

解連環

謝勉仲

鴈空遼邈襯魚鱗浪淺護霜雲薄念故人千里音塵
正山月朦朧水村依約見說瑤姬擁十二碧峯如削

倚孤芳澹佇冷笑歲華可堪寂寞 情多為誰瘦弱
愛吹簫弄粉斜簪珠箔自然林壑精神想回首東風
萬花羞落夢遶南樓對皓月忍思量著但銷凝夜闌
酒醒數聲畫角

瑞鶴仙

郭從範

雲階連月地記舊遊身在溫柔鄉裏花陰透窓綺羅
衾擁殘夢流鶯驚起銀瓶水沸待梳粧屏風共倚看
情眉恨眼宿粉賸香亂愁無際 長記多情消減宋
玉連牆茂陵同里離懷似水天涯路歎愁悴想鴛機
織錦鸞臺窺鏡秦絲幽怨未已好歸去共把琴書倚

嬌扶醉

金盞子

王聖與

兩葉吟蟬露草流螢歲華將晚對靜夜無眠稀星散
時度絳河清淺甚處畫角淒涼引輕寒催燕西樓外
斜月未沉風急鴈行吹斷 此際怎消遣要相見除
非待夢見盈盈洞房淚眼看人似冷落過秋紈扇痛
惜小院桐陰空啼鴉零亂獸獸地終日為伊香愁粉
怨

木蘭花慢 大聲集不載 万俟雅言

恨鶯花漸老但芳草綠汀洲縱岫壁千尋榆錢萬疊

難買春留梅花鄉來始別又忽忽結子滿枝頭門外
垂楊岸側畫橋誰繫蘭舟悠悠歲月如流歎水覆
香難收凭盡闌往往擡頭舉眼都是春愁東風晚來
更惡怕飛紅拍絮入書樓雙燕歸來問我怎生不上
簾鉤

又

于湖先生

紫簫吹散後恨燕子只空樓念壁月長虧玉簪中斷
覆水難收青鸞送碧雲句道霞扃霧鎖不堪憂情與
文梭共織怨隨宮葉同流人間天上兩悠悠暗淚
洒燈篝記谷口園林當時驛舍夢裏曾遊雲屏低聞

笑語奈醉時言語醒時愁擬把菱花一半試尋高價
皇州

又別西湖詩僧

盧申之

嫩寒吹客棹載酒去載詩歸政紅葉漫山清泉漱石
多少心期三生溪橋話別悵薜蘿猶惹翠雲衣不似
今番醉夢帝城幾度斜暉鴻飛烟水瀾瀾回首處
只君知念吳江鷺憶孤山鶴怨依舊東西高峯夢醒
雲起是瘦吟窓底憶君時何日還尋舊約為余先寄
南枝

又

朱希真

折芙蓉弄水動玉珮起秋風正柳外開雲溪頭淡月
晚帶疎鐘人間厭謫墮久恨霓旌未返碧樓空且與
時人度日自憐懷抱誰同當時種玉五雲東露冷
夜耕龍念瑞草成畦瓊蔬未採塵染衰容誰知素心
未已望清都絳闕有無中寂寞歸來隱几夢聽帝樂
冲融

瑞鶴仙令

補足李重光詞

康伯可

櫻桃落盡春歸去蝶翻金粉雙飛子規啼恨小樓西
曲屏朱箔晚惆悵卷金泥門巷寂寥人去後望殘
烟草低迷閑尋舊曲玉笙悲闕山千里恨雲漢月重

規

杏花天 慈寧殿春晚出遊

□城柳色藏春絮嫩綠滿遊人歸路殘紅賸蕊留春
住無奈霏微細雨 南陌上玉轡鈿車悵紫陌青門
日暮黃昏院落人歸去猶有流鶯對語

又

史直翁

魂夢飛過屏山曲見依舊如花似玉天寒翠袖依脩
竹兩點春山聞綠 披衣起開愁萬斛正月澹梅花
照屋重溫繡被薰清馥不管明燒畫燭

臨江仙

全前

憶昔來時雙髻小如今雲鬢淮鴉綠窓冉冉度年華
秋波嬌殢酒春筍慣分茶居士近來心緒懶不堪
老眼看花盡堂明日隔天涯春風吹柳絮知是落誰
家

糖多令

劉改之

蘆葉滿汀洲寒沙帶淺流二十年重到南樓柳下繫
船猶未穩能幾日又中秋黃鶴斷磯頭故人今在
不舊江山都是新愁欲買桂花重載酒終不似少年
遊

又

吳君特

何處合成愁。離人心上秋。縱芭蕉不雨也飈飈。都道晚涼天氣好。有明月。怕登樓。年事夢中休。花空烟水流。燕辭歸客尚淹留。垂柳不繫裙帶住。漫長是繫行舟。

卜算子 詠梅

陸務觀

驛外斷橋邊。寂寞開無主。已是黃昏獨自愁。更著風和雨。無意苦爭春。一任羣芳妒。零落成泥碾作塵。只有香如故。

又

康伯可

潮生浦口雲。潮落津頭樹。潮本無心落又生。人自來

還去 今古短長亭送往迎來處老盡東西南北人
亭下潮如故

又

高賓王

屈指數春來彈指驚春去檐外蛛絲網落花也要留
春住 幾日喜春晴幾日愁春雨十二雕闌一曲屏
題偏傷春句

南鄉子

晏叔原

綠水帶春潮水上朱樑小渡橋橋上女兒雙笑靨妖
嬌倚著闌干弄柳條 月夜落花朝減字偷聲按玉
簫柳外行人回首處迢迢若比銀河路更遙

又

吳大年

江上雪初消暖日晴烟弄柳條認得裙腰芳草路魂
銷曾折梅花過斷橋 潘髻為誰彫長恨金闌閑阿
嬌遙想晚粧呵手罷天饒更傍朱脣暖玉蕭

又

薛子新

柳色鏤重樓樓上輕寒不滿鉤堆徑落紅深半指悠
悠飛絮簾櫳幾許愁 逐日望歸舟煖藕全寬玉臂
韞待得君來春去也休休未老鴛鴦早白頭

眼兒媚

賀方回

蕭蕭江上荻花秋做弄許多愁半竿落日兩行新鴈

一葉扁舟 惜分長怕郎先去直待醉時休今宵眼
底明朝心上後日眉頭

又

高續古

翠簾低護鬱金堂猶自未忺粧梨花新月杏花新雨
怎奈昏黃 春今不管人相憶欲去又相將只消相
約與春同去須到伊行

又梅

求退翁 齊愈

霏霏疎影轉征鴻人語暗香中小橋斜渡曲亭深院
水月朦朧 人間不是藏春處玉笛曉霜空江南樹
樹黃垂密雨綠漲薰風

又

洪平齋

平沙芳草渡頭村
綠過去年痕
遊絲下上流鶯來往
無限銷魂
綺窓深靜人歸晚
金鴨水沉溫
海棠影下子規聲裏立
盡黃昏

清平樂

劉武子之翰

萋萋芳草怨得王孫老
瘦損腰圍羅帶小
長是錦書來少
玉簫吹落梅花曉
寒猶透輕紗
驚起半屏幽夢
小窓淡月啼鴉

又

全前

鶯鶯翡翠小小池塘水
落絮遊絲花滿地
日闌干

獨倚金刀裁就春衫起來初試輕寒滿把相思清
恨題詩欲寄江南

梅花引

蔡伯堅

春陰薄花冥漠金銜三月初行樂碧紗春玉奩人蟬
飛霧鬢風前立畫裙浮花酒浪分餘瀝嬌甚春愁
生遠碧犀心通暖芙蓉此時不恨蓬山千萬重

又

清陰陌狂踪跡朱門團扇香迎客牡丹風數苞紅冰
香撲蕊新粧誰為容蠟燈春酒風光夕錦浪龍鬚
花六尺月波寒玉琅玕無情又是華星送寶鞍

又

王公明

裁征衣寄征衣萬里征人音信稀
朝相思暮相思滴盡真珠如今無淚垂
閨中幼婦紅顏少應是玉關人
更老幾時歸幾時歸開盡牡丹看看到荼蘼

朝中措

代譚得稱作

陸務觀

怕歌愁舞懶逢迎
粧晚託春酲總是向人深處當時
枉道無情
關心近日啼紅密訴剪綠深盟
杏館花陰恨淺畫堂銀燭嫌明

又

王武子

畫眉人去掩蘭房
金鴨懶薰香有恨只彈珠淚無人

與說衷腸 玉顏雲鬢春花夜月辜負韶光閑看枕
屏風上不如畫底鴛鴦

又

蕭則山

半山社雨欲黃昏燕子不過門楊柳染深綠意海棠
啼損紅痕 綺寮粧束寶釵歌舞玉枕溫存一段舊
情有味十分新恨無言

戀繡衾

不知名

元宵三五酒半醺馬蹄前步步是春鬧市裏看燈去
喜金吾不禁夜深 如今老大都休也未黃昏先閉
上門待月到牕兒上對梅花如對故人

又

史邦卿

吳梅初試澗谷春夜幽幽江鴈叫雲人正在孤窓底
被濃愁薰破醉魂 雨窓只剩殘燈影伴羅衣無限
淚痕瘦骨怕紅綿冷記年時斗帳夜分

夜行船

曲水濺裙三月二馬如龍鈿車如水風颭游絲日烘
晴畫人共海棠俱醉 客裏光陰難可意掃芳塵舊
游誰記午夢醒來小窓人靜春在賣花聲裏

小重山

漳州紅梅

姜堯章

人遠湘皋月墜時斜橫花樹小浸愁漪一春幽事有

誰知東風冷香遠茜裙歸 鷗去昔游非遙憐花可
可夢依依九疑雲香斷魂啼相思血都沁綠筠枝

玉樓春

王初寮

飛鴻只解留筇柱終寄青樓書不去手因夢裏有携
時眼到花梢無著處 金泥小字相思句淚濕羅衣
今在否不知無定向來雲又作多情何處雨

瑞鶴仙令

徐因子

西子湖邊春正好輸他公子王孫落花香趁馬蹄溫
暖烟桃葉渡晴日柳枝門 中有能詩狂處士閑將
一鶴隨軒百錢買隻下湖船就他弦管裏醉過杏花

天

浣溪沙

韓子師彥古

一縷金香永夜清殘編未掩古琴橫繡衾寒擁寶缸明
坐聽竹風敲石磴旋傾花水漱春醅落梅和雨打簾聲

又

耿時舉元鼎

獨鶴山前步藥苗青山只隔過溪橋洞宮深處白雲飄
碧井卧花人寂寂畫廊鳴葉雨瀟瀟漫題詩句滿芭蕉

烏夜啼

陸放翁

金鴨餘香尚暖綠窓斜日偏明蘭膏香染雲鬟膩釵溜滑無聲冷落秋千伴侶闌珊打馬心情繡屏驚斷瀟湘夢花外一聲鶯

更漏子

王聖與

日銜山山帶雪笛弄晚風殘月湘夢斷楚魂迷金河秋鴈飛別離心思憶淚錦帶已傷憔悴蛩韻急杵聲寒征衣不用寬

朝中措

郭從範

青燈聽雨夜荒涼歸夢苦難長坐想玉奩鴛錦空餘臂粉衣香枕邊共語腮前執手簾外啼粧也是平

生薄倖須還幾度思量

南歌子

前人

玉醺浮瓊蟻金盞吐翠虬醉鄉歸路接溫柔暗卜幽
期低約笑藏闌索去眉先鎖將言淚已流小窓移
火更遲留自剔燈花油澆玉搔頭

又

徐山民

簾影從金線爐烟篆翠絲菰芽新出滿盆池喚取玉
瓶漆水養魚兒意取釵蟲碧慵梳髻翅垂相思無
處說相思笑把畫羅小扇覓春詞

夜游宮

陸永仲 維之

東風裡就腰兒細繫滴粉裙兒不起從來只慣掌中
看怎忍在花燭影裏酒紅應是鉛華褪暗感損眉
峯雙翠夜深點鞦繡鞋兒靠那个屏風立地

生查子

放翁妾某氏

只知愁上眉不識愁來路窓外有芭蕉陣陣黃昏雨
逗曉理殘粧整頓教愁去不合畫春山依舊留連
住

陽春白雪卷第三終

陽春白雪卷第四

臨漢 趙 聞禮 立之選

暗香

姜堯章

辛亥之冬予載雪詣石湖止既月授
簡索句且徵新聲作此兩曲石湖祀
玩不已使工技肄習之音節諧婉乃
命之曰暗香疎影 仙呂宮

舊時月色算幾番照我梅邊吹笛喚起玉人不管清
寒與攀摘何遜如今漸老都忘却春風詞筆但怪得
竹外疎花香冷入瑤席 江國正寂寂歎寄與路遙
夜雪初積翠尊易泣紅萼無言耿相憶長記曾攜手
處千樹壓西湖寒碧又片片吹盡也幾時見得

疎影

苔枝綴玉有翠禽小小枝上同宿客裏相逢籬角黃
昏無言自倚脩竹昭君不慣胡沙遠但暗憶江南江
北想瓊環月夜歸來化作此花幽獨 猶記深宮舊
事那人正睡裏飛近蛾綠莫似春風不管盈盈早與
安排金屋還教一片隨波去又却怨玉龍哀曲等恁
時再覓幽香已入小窓橫幅

桂枝香

張宗瑞

梧桐雨細漸滴作秋聲被風驚碎潤逼衣篝線裊蕙
鑪沈水悠悠歲月天涯醉一分秋一分憔悴紫蕭吟

斷素牋恨切夜寒鴻起 又何苦淒涼裏負草堂春
綠竹溪空翠落葉西風吹老幾番塵世從前諳盡江
湖味聽商歌歸興千里露侵宿酒疎簾淡月照人無
寐

鶯啼序

高疎寮

屈原九歌東皇太一春之神也其詞淒
惋含意無盡略采其意以度春曲

青旂報春來了玉鱗鱗風旒陳瑤席新奏琳琅窈窕
來薦嘉祉桂酒洗瓊芳麗景暉暉日夜催紅紫湛青
陽新沐人聲澹蕩花裏 光汎崇蘭圻遍桃李把深

心料理共攜手衡室蘭房奈何新恨如此對佳時芳
情脉脉眉黛蹙羞零瓊珥析微馨聊寄相思莫愁如
水青蘋再轉淑思菲菲春又過半矣細雨濕香塵
未曉又止莫教一鵲無聊羣芳疊疊傷情漠漠淚痕
輕洗曲瓊桂帳流蘇暖望美人又是論千里佳期香
渺香風不肯為媒可堪玩此芳芷春今漸歇不忍
零花猶戀餘綺度美曲造新聲樂莫樂此新知思美
人兮有花同倚年華做了功成如委天時相代何日
已悵春功非與他時比殷勤舉酒酬春春若能留口
還亦喜

蘭陵王

高賓王

鳳簫咽花底寒輕夜月蘭堂靜香霧翠深曾與瑤姬
恨輕別羅巾淚暗疊情入歌聲怨切殷勤意欲去又
留柳色和愁為重折十年迴淒絕念髻怯瑤簪衣
褪香雪雙鱗不度烟江濶自春來人見水邊花外羞
倚東風翠袖怯正愁恨時節南陌阻金勒甚望斷
青禽難倩紅葉春愁欲解丁香結整新歡羅帶舊香
宮簾淒涼風景待見了盡向說

賀新郎

劉改之

老去相如倦向文君說似而今怎生消遣衣袂京塵

曾染處空有香紅尚軟料彼此魂消腸斷一枕新涼
眠客舍聽梧桐夜雨秋聲顫燈暈冷記初見樓高
不放珠簾捲晚妝殘翠鈿狼籍淚痕凝臉人道愁來
須殢酒無奈愁多酒淺但寄恨焦琴紉扇莫鼓琵琶
江上曲怕荻花楓葉俱淒怨雲萬疊寸心遠

又

全前

水浴芙蓉淨護濃香遲開半斂靚粧臨鏡長憶耶溪
薰風裏年少紅顏照映夜露冷酒隨香醒回首當時
同舟侶為相思怕折瓊瑤柄千萬縷意難整玻璃
三萬六千頃洗精神塵埃盡絕曼然端整浪蕩年來

都慵問愛此濃情淡性待移種雲根玉井太一真人
今何在取高花十丈供烟艇來伴我泛清影

右改之荷花辭予得于王樂道家所藏
墨蹟愛其老手飄然塵外恐與深山大
澤俱理特拈出以示識者云

又贈建康鄭玉脫籍

劉叔擬仙倫

鄭玉非娼女歎塵緣未了依然被春留住腸斷胭脂
坡上路有甚心情意緒生怕入梨園歌舞寂寞陽臺
雲雨散算人間誰是吹簫侶空買斷兩眉聚新來
鏡裏驚如許暗傷懷柳老花殘幾番春莫事逐孤鴻

人已去月落千山杜宇念修竹天寒何處不戀瑣窓
并繡戶妾從前薄命甘荆布誰為作解條主

徵招

張宗瑞

飛鴻又作秋空字悽悽舊游湘浦涼思帶愁深眇蒼
茫何許歲華知幾度奈雙鬢不禁吟苦獨倚危樓葉
聲搖莫玉欄無語尺素欲傳將故人遠天涯屢驚
回顧心事只琴知漫閒相爾汝甚時江海去算空負
白蘋鷗侶更誰與剪燭西窓且醉聽山雨

角招

曉寒薄苔枝上剪成萬點冰萼暗香無處著立馬斷

魂情雪蘼落橫溪略約恨寄驛音書遶遶夢遶揚州
東閣風流舊日何郎想依然林壑離索引杯自酌
相看冷淡一笑人如削水雲寒漠漠十萬游仙同驂
霜鶴幾多幽約正月滿瑤臺珠箔夢斷闌干寂寞盡
分付許多愁城頭角

八寶粧

吳夢窓

夢醉芙蓉風簷近渾疑珮玉丁東翠微流水都是惜
別行蹤宋玉秋花相比瘦賦情更苦似春濃小黃昏
紺雲暮合不見征鴻宜城當時故客認燕泥舊迹
返照樓空夜闌心事燈外敗壁哀蛩江寒夜楓怨莫

怕流作題情腸斷紅行雲遠料澹蛾人在秋香月中

氐州第一

劉天游

冰縮寒流川凝凍靄前迴鶯渚冬晚燕閣紅爐駝峯
翠釜曾憶花柔酒軟雲海滄洲甚又寄南來客鴈洒
雪朱門回橈剡曲鏡華霜滿萬里銀霄凝望眼倦
吟袖畫闌空暖樹帶潮壖笳鳴古戍簇仲宣幽怨想
愁思春近也隨宮繡時寬一線昨夜扁舟夢湖山眉
橫黛淺

齊天樂

史邦卿

闌干只在鷗飛處年年怕吟秋興斷浦沈雲空山攬

雨中有詩愁千頃波聲未定望舟尾拖涼渡頭籠暝
正好登臨有人歌罷翠簾冷悠然魂墮故里奈閑
情未了還被吹醒拜月虛簷聽蛩壞砌誰復能憐嬌
俊憂心耿耿寄桐葉芳題冷楓新咏莫遣秋聲樹頭
喧夜永

又

高賓王

碧雲缺處無多雨愁與去帆俱遠倒葦沙閑枯蘭渚
冷寥落寒江秋晚樓陰縱覽正魂怯清吟病多依黯
怕揖西風袖羅香自去年減風流江左久客舊游
得意處朱簾曾捲載酒春晴吹簫夜約猶憶玉嬌香

怨塵棲故苑，歎壁月空簷。
夢雲飛觀，送絕征鴻，楚峯
烟數點。

又游明園書感

翁時可

曲廊連苑，吹笙道重來，暗塵都滿。
種石主雲移，花帶月猶欠藏。
春庭院，年年過眼，便梅謝蘭銷，舞沈歌斷。
露井寒蛩，為誰清夜訴幽怨。
人生樂事最少，有時得意處，光陰偏短。
樹色凝紅，山眉弄碧，不與朱顏相戀。
臨風念遠，歎蝶夢難追，鷺盟重換。
一片斜陽，送人歸騎晚。

又

吳君特

烟波桃葉西陵渡十年斷魂潮尾古柳重攀輕鷗叙
別陳迹危亭獨倚涼颼乍起渺烟磧飛帆暮山橫翠
但有江花共臨秋鏡照憔悴華堂燭暗送客眼波
回盼處芳艷流水素骨凝冰柔葱蘸雪猶憶分水深
意清尊未洗夢不濕行雲漫沾殘淚可惜秋宵亂蛩
疎雨裏

玲瓏四犯

李肩吾

子我號峭洲

初撥琵琶未肯信知音真個稀少盡日芳情紫繫玉
人懷抱須待化作楊花特地過舊家池沼想綺窓刺
繡遲了半縷茜茸微繞舊時眉嬾貪相惱到春來

為誰濃掃新歸燕子都曾識不敢教知道長是倦出
繡幙向夢裏重謀一笑怎得同攜手花惜月地把愁
勾了

八聲甘州 秋登靈岩

吳夢聰

渺空烟四遠是何年青天墜長星幻蒼崖雲樹名娃
金屋殘霸宮城箭逕酸風射眼膩水染花腥時鞞雙
鴛響廊葉秋聲 宮裏吳王沈醉倩五湖倦客獨釣
醒醒問蒼波無語華髮柰山青水涵空闌干高處送
亂鷗斜日落漁汀連呼酒上琴臺去秋與雲平

又過松江

馮深居

買扁舟載月過長橋回首夢耶非問往日三高
清風萬古繼者伊誰惟有茶烟輕颺零露濕
蕤絳西子知何處鴻怨蛩悲遙想家山好在正
倚天青壁石瘦雲肥甚拋奇躡秀猿鶴互猜疑
歸去好散人相國迥升沈畢竟搃塵泥須還我
松間舊隱竹上新詩

宴山亭

張功甫

幽夢初回重陰未開曉色吹成疎雨竹檻氣寒
蕙晚聲搖新綠暗通南浦未有人行纔半啟迴
廊朱戶無緒空望極霓旌錦書難據苔徑追憶
曾游念誰伴秋千絲繩芳柱犀奩黛捲鳳枕雲
孤應也幾番凝竚

記得伊來花霧繞小堂深處留住直到老不教歸去

水龍吟

曾純甫

楚天千里無雲露華洗出秋容淨銀蟾臺榭玉壺天
地參差桂影鴛瓦寒生畫簷光射碧梧金井聽昭華
半夜江梅三弄風嫋嫋良宵永攜手西園宴罷下
瑤臺醉魂初醒吹簫仙子驂鸞歸路一襟清興鷓鴣
棲高建章門迥星河耿耿看滄江潮上丹楓葉落浸
關山冷

又登惠山酌泉

吳夢窓

艷陽不到青山古陰冷翠成秋苑英娃點黛江妃擁

髻空濛遮斷樹密藏谿草深迷市峭雲一片二十年
舊夢輕鷗素約霜絲亂朱顏變 龍吻春霏玉瀝煮
銀瓶羊腸車轉臨泉照影清寒沁骨客塵都浣鴻漸
重來夜深華表露零鶴怨把閑愁換與接前晚色棹
滄波遠

滿江紅

岳肅之

小院深深悄鎮日陰晴無據春未足閨愁難寄琴心
誰與曲徑穿花尋蛺蝶虛欄傍日教鸚鵡笑十三楊
柳女兒腰東風舞 雲外月風前絮情與恨長如許
想綠窓今夜為誰凝佇洛浦夢回留珮客秦樓聲斷

吹簫侶正黃昏時候杏花寒魚纖雨

錦堂春 七夕

王聖與

桂嫩傳香榆高送影輕羅小扇涼生正鴛機梭靜鳳
渚橋成穿線人來月底曝衣花入風庭看星殘靨碎
露滴珠融笑掩雲局 綵盤凝望仙子但三星隱隱
一水盈盈暗想憑肩私語鬢亂釵橫蛛網飄絲冒恨
玉籤傳點催明算人間待巧似恁匆匆有甚心情

滿江紅 茶蘼

趙德莊

千種繁春春已去翩然無迹誰信道荼蘼枝上靜中
留得曉鏡洗粧非粉白晚衣弄舞餘衫碧翠寶鈿珠

珥不勝持濃陰夕 金剪度還堪惜霜蝶睡無從覓
知多少好辭清夢釀成冰骨天女散花無酒聖仙人
種玉慙香德悵攀條記得鬢絲青東風客

念奴嬌

郭從範

光風轉蕙泛崇蘭漠漠滿城飛絮金谷樓危山共遠
幾點亭亭烟樹枝上殘花胭脂滿池亂落如紅雨青
春將暮玉蕭聲在何處 無端天與娉婷簾鉤鸚鵡
夢斷聞殘語玉骨瘦來無一把手挹羅衣看取江北
江南靈均去後誰采蘋花與香銷雲散斷魂分付潮
去

水龍吟

丁基仲

鴈風吹裂雲痕小。樓一線斜陽影殘。蟬抱柳寒蛩入
戶。淒音忍聽。愁不禁秋夢還驚。客青燈孤枕。未更深
早。是梧桐泣露。那堪度蘭宵永。空歎銀瓶罍并醉
鄉醒。溫柔鄉冷。征塵倦撲。閑花漫舞。何心管領。葱指
冰絃。蕙懷春錦。楚梅風韻。恨芙蓉。城香藍雲依黯。鎖
巫峯暝。

木蘭花慢

劉隨如

看纖雲護月。湛河漢。夜聲收。政玉塵生風。銀床墜露
涼葉。颼颼襟懷靜吞八表。莫登山臨水。易驚秋。閑想

多情宋玉舊來空替人愁
溫柔鄉解老秋不絲竹
間秦謳向橙橘香邊持螯把酒聊伴清游騷人自應
念遠與黃花評泊晉風流明日莼鱸興動待尋江上
歸舟

念奴嬌 秋娘之感

蔡伯堅 蕭閒

念奴玉立記連昌宮裏春風相識雲海茫茫人換世
幾度梨花寒食華萼霓裳沈香水調一串驪珠濕九
天飛上叫雲遏斷箏笛 老子陶寫平生清音裂耳
覺庾愁都釋澹澹長空今古夢只有此聲難得湔浦
心情落花時節還對天涯客春溫玉盃一聲洗盡冰

雪

又

棋聲特地把十年春夢恍然驚覺楊柳樓心歌舞地
曾寄一枝柔弱翠幌重來玉環不見鸚鵡言猶昨秦
箏別後知他幾換弦索前度顧曲周郎尊前重見
千種愁難著猶勝元都人去後空怨殘紅零落綠葉
成陰桃花貪子在恨東風惡盈盈淚眼向人欲下還
閣

瑞鶴仙

俞國寶

春衫和淚著又燕入江南鴈歸衡岳東風曉來惡遶

西園無緒淚隨花落愁鐘怕角夢無憑難成易覺到
春來易感韓香頓減沈腰如削離索挑燈占信聽
鵲求音不禁春弱雲輕雨薄陽臺遠信難託念盟釵
一股鸞光兩破已負秦樓素約但莫教嫩綠成陰把
人誤却

又

吳夢窓

晴絲牽緒亂對滄江斜日花飛人遠垂楊暗吳苑正
旗亭烟冷河橋風暖蘭情蕙畹惹相思春根酒畔又
爭知吟骨縈銷漸把舊衫重剪淒斷流紅千浪缺
月孤棲總難留燕歌塵凝扇待憑信拚分鈿試挑燈

欲寫依還不忍牋幅偷和淚卷記殘雲剩雨蓬萊也
應夢見

青房並蒂蓮

王聖與

明本誤附
美成集後

醉凝眸是楚天秋曉湘岸雲收草綠蘭紅淺淺小汀
洲菱荷香裏鴛鴦浦恨菱歌驚起眠鷗望去帆一片
孤光棹聲伊軋櫓聲柔 愁窺汴堤翠柳曾舞送富
時錦纜龍舟擁傾國纖腰皓齒笑倚迷樓空令五湖
夜月也羞照三十六宮秋正朗吟不覺回桡水花楓
葉兩悠悠

錦堂春 中秋

前人

露掌秋深花叢漏永那堪此夕新晴正纖塵飛盡萬
籟無聲金鏡開奩弄影玉壺盛水侵稜縱簾斜樹隔
燭暗花殘不礙虛明美人凝恨歌黛念經年間阻
只恐雲生早是宮鞋鴛小翠鬢蟬輕蟾潤粧梅夜發
桂熏仙骨香清看姮娥此際多情又似無情

念奴嬌 四聖觀涼堂

奚秋厓

踏破秋痕向虛堂細問新涼蹤跡野客從來無管領
獨鶴自還空碧紅日重開翠華曾對應恨湖光窄游
龍別後兩山依舊南北無語野草間花似嗔人問
萬事今非昔古木蒼烟無限意只有吟魂知得歌舞

百年是非一醉未必西風識浩歌歸去滿船風雨淒
惻

長相思慢

前人

日折霜落寒欺霧幕晴枝淺弄春華驚回綺夢獨擁
綾衾腮痕微印朝霞倦起心情念風移霜換依舊天
涯鴈影水雲斜真相思一點愁賒問橘楚橙吳舊
香猶在別後襟袖輸他琴心知未許想鈿釵流落誰
家怕上高樓歸思遠斜陽暮鴉幾多年江湖浪識知
心只許梅花

清平樂

山谷

春歸何處寂寞無行路若有人知春去處喚取歸來
同住春無蹤跡誰知除非問取黃鸝百轉無人能
解因風飛過薔薇

又

朱希真

春寒雨妥花萼紅難破繡線金針慵不作要見秋千
無那西隣姊妹丁寧尋芳更約清明畫箇丙丁帖
子前街後院求晴

又

徐山民

綠圍紅遶一枕屏山曉怪得今朝偏起早笑道牡丹
開了迎人捲上珠簾小螺未拂眉尖貪教玉龍鸚

鷓鴣花飛滿粧奩

又

孫花翁

秋娘窻戶夢入陽臺雨小別殷勤
留不住恨滿落花飛絮一天曉月
落西馬嘶風拂羅衣分付許多風
致送人行下樓兒

又

趙退齋 汝先

錦屏香褪寒隱輕衫嫩燕子護泥
飛不穩庭掩百花難認雙雙繡帶
微風海棠此夜簾櫳愁口一番寒
食小牕淡月殘紅

又

石瑤林

香搖穗碧梅巧紅酥滴雲浣寶釵蟬墜翼嬌小爭禁
酒力 繡窓芳思遲遲無端又歛雙眉貪把蘭亭學
字一冬忘了彈棋

又

後山

秋聲□地葉葉無留意冰簟光流團扇墜驚起雙棲
燕子 夜堂簾合回廊風惟吹亂凝香卧看一庭明
月曉衾不耐初涼

又

俞國寶

數聲烏鵲院宇寒蕭索楊柳梢頭秋過却無葉可供
風落 可人猶有芙蓉向人冷澹粧梳雲外征鴻過

畫夕陽依舊平蕪

又

徐抱獨

風韶雨秀春已平分後
陡頓故人疎把酒閑凭盡闌
搔首 □□ 携手蹋青人生幾度
清明待得燕慵鶯
嬾楊花點點浮萍

又

許忱甫

鳳雙鸞偶天上人間有
落玉無聲花影瘦夜淺春濃
時候 別來幾度寒宵六橋風月
迢迢燈下有誰相
伴一方紅濕鮫綃

又

張宗瑞

新涼窓戶閑對琴言語彈到無人知得處兩袖五湖
風雨坐中斗轉參橫珠璣碎落瑤觥憶著故山蘿
月今宵應為誰明

又

羅子遠

明虹收雨兩漿能吳語人在江南荷葉浦採得蘋花
無數夢中舞燕栖鸞起來烟渚風灣一點愁眉天
未憑誰刻却春山

阮郎歸

周紫芝 少隱

月榭疎影照嬋娟閑臨小玉盤棗花金釧出纖纖
暮聲敲夜寒飛電冷水晶圓夜深人未眠笑催爐獸

月
媛衾鴛莫教銀漏殘

又

徐道暉

綠楊庭戶靜沉沉楊花吹滿襟晚紅閑向水邊尋
驚飛雙浴禽分別後忍重臨暮寒天色陰妾心移得
在君心方知人恨深

又

孫季繁

滿階紅影月昏黃玉爐催換香碧牕嬌困懶梳粧粉
沾金縷裳鸞髻聳黛眉長燭光分兩行許誰騎鶴
上維揚溫柔醉鄉

又

翁賓暘

月高樓外柳花明單衣怯露零小橋鐙影落殘星寒
烟蘸水萍歌袖窄舞鬟輕梨花夢滿城落紅啼鳥
兩無情春愁添曉醒

菩薩蠻

翁時可

元龍
號處靜

春心莫共花爭發花開不管連環缺夢斷小樓空杜
鵑啼曉紅眼看連理樹纖手移箏柱調偏錯成聲
無人知此情

又

玉纖閑捻花間集赤闌干對芭蕉立蘼葉晚生涼竹
陰移小床攏蓮牽藕線藕斷絲難斷彈水沒鴛鴦

教尋波底香

好事近

汴京賜宴聞
教坊樂有感

韓南澗

凝碧舊池頭一聽管絃淒切多少梨園聲在總不堪
華髮杏花無處避春愁也傍野烟發唯有御溝聲
斷似知人嗚咽

又

雷北湖

梅片作團飛雨外柳絲金濕客子短篷無據倚長風
挂席回頭流水小橋東烟掃畫樓出樓上有人疑
佇似舊家曾識

又

劉小山

花底一聲鶯花上半鉤斜月月落鶯啼何處點飛英
如雪東風吹盡去年愁解放丁香結鶯動小亭紅
雨舞雙雙金蝶

浪淘沙

吳雲壑 居父

雲葉弄輕陰屋角鳩鳴青梅著子欲生仁冷落江天
寒食雨花事闌情池館晝盈盈人醉寒輕一川芳
草只銷凝時有入簾新燕子明日清明

又

韓子畊

莫上玉樓看花雨斑斑四垂羅幙護朝寒燕子不知
人去也飛認闌干回首幾闌山後會應難相逢祇

有夢魂間可奈夢隨春漏短不到江南

又豐樂樓

裙色草初青鴨鴨波輕試花霏雨濕春晴三十六梯
人不到獨喚瑤箏艇子憶逢迎依舊多情朱門只
合鐫娉婷却逐彩鸞歸處路香陌春城

醉落魄

范至能

雪晴風作松梢片片輕鷗落玉樓天半寒珠箔一箇
梅花吹裂凍雲幕去年小獵灘山脚弓刀濕遍猶
橫槊今年翻怕貂裘薄寒似去年人比去年覺

又

阮姪
出為戌婦主

吳夢隱

柔懷難託老天如水人情薄燭痕猶刻西窓約歌斷
梨雲留夢遶羅幙寒更唱徧吹梅角香銷臂趁弓
弰削主家衣在羞重著獨掩營門春盡柳花落

謁金門

盧申之

風不定移去移來簾影一雨林塘新綠淨杏梁歸燕
並翠袖玉屏金鏡薄日綺疏人靜心事一春疑酒
病鳥啼花滿徑

浣溪沙

郭從範

幾點胭脂印指紅一雙蛾綠斂眉濃夜寒綃帳燭花
融
賸炷龍涎熏骨冷旋調銀液鎮心忪整鬟羞顧

半嬌慵

清平樂

周紫芝

青春欲暮柳下將飛絮月到堦前梅子樹啼得杜鵑
飛去人歸不掩朱門一口過了黃昏只有瑣窓紅
蠟照人獨自銷魂

又

李仲鎮

亂雲將雨飛過鴛鴦浦人在小樓空翠處分得一襟
離緒片帆隱隱歸舟天邊雪卷雲浮今夜夢魂何
處青山不隔人愁

春光好

張才父

烟濛濛雨濛濛水溶溶帖水落花飛不起小橋東
翩翩怨蝶愁蜂遶芳口戀餘紅不恨無情橋下水恨
東風

點絳脣

姜堯章

金谷人歸綠楊低掃吹笙道數聲啼鳥也學相思調
月落潮生擬送劉郎老淮南好甚時重到陌上生
春草

又

史邦卿

花落苔香斷無人肯行鵲覓晚風翻繡吹醒東窓酒
獨卧鸞衾明月知人瘦香銷後亂愁依舊閑損胡

酥手

又

馮可遷

秋滿孤蓬翠蒲紅蓼留人住一簾香縷邊影驚鴻度
小據胡床舊事新情緒憑誰訴蠟燈屏塵擬共西
風語

又

吳君特

時霎清明載花不過西湖路嫩陰綠樹正是春留處
燕子重來往事東流去征衫貯舊寒一縷淚濕風
簾絮

又

趙野雲

又是年時冷烟寒食梨花院柳金拖線一曲珠歌轉
翠口雕梁風軟簾通燕何須勸酒豪詩健逸韵今
重見

浣溪沙

辛亥正月二十四日發合肥

姜堯章

釵燕籠雲晚不忺擬將裙帶繫郎船別離滋味又今
年楊柳夜寒猶自舞鴛鴦風急不成眠些兒閑事
莫紫牽

又

王輔道

扇影輕搖一線香斜紅初過晚來粧嬌多無事做淒
涼借問誰教春易老幾時能勾夜何長舊歡新恨

總思量

卜算子 蘭

曹元寵

松竹翠交寒。遲日江山暮。幽迳無人獨自芳。此恨憑誰訴。似共梅花語。尚有尋芳侶。著意間時不肯香。香在無心處。

又

俞國寶

剪燭寫香牋。撥火溫寒醅。門外東風將我愁。吹作三更雨。夜夜玉樓心。日日長亭路。豆蔻花開信不來。塵滿金釵股。

浪淘沙

吳雲壑 居父

岸柳可藏鴉路轉溪斜忘機鷗鷺立汀沙只尺中山
迷望眼一半雲遮臨水整烏紗兩鬢蒼華故鄉心
事在天涯幾日不來春便老開盡桃花

採桑子

張武子

佳人滿勸金蕉葉夜玉春溫別後黃昏燕子樓高月
一痕年年依舊梨花雨粉淚空存流水孤村不著
寒鴉也斷魂

踏莎行

謝明遠

楚樹芊綿江雲蕪漫曉風吹墮梅千片驚禽飛去響
春空平沙月落光零亂人意傷離物華驚換武夷

此去如天遠臨分為我少留連柳條猶在江南岸

陽春白雪卷第四終

陽春白雪卷第五

臨濮

趙

聞禮

立之選

瑞龍吟

清明日
觀競渡

吳君特

大溪面遙望繡羽衝烟錦梭飛練桃花三十六陂蛟
宮暗起嬌雷乍轉去如箭催趁戲旗游鼓素瀾雪濺
東風冷濕蛟腥濬陰送晝輕霏弄晚洲上青蘋生處
闌春不管懷沙人遠殘日半開一川花影零亂山
屏醉纈連棹東西岸闌干倒千紅粧靨鈴香不斷傍
暝疎簾捲翠連絢淨笙歌未散簪柳門歸懶猶自有
玉龍黃昏吹怨重雲暗閣春霖一片

龍山會

南豐
登高

趙虛齋

重整登高屐，羣玉峯頭萬里秋。
無極遠山青欲滴，新鴈過縹緲孤雲天。
北烟入小橋，低水痕退寒流。
澄碧對佳辰，驚心客裏鬢絲堪摘。
風流晉宋諸賢騎臺，龍山俛仰皆陳迹。
憑闌看落日，嗟往事惟有黃花如昔。
醉袖舞西風，任教笑參差鳬舄。
但回首東籬久負，有誰知得。

秋霽

盧蒲江

虹雨纔收，政抱葉殘蟬漸老。
雲水銀漢飛星，玉壺零露萬里素秋如沐。
倚顰抱獨盼，嬌曾記郎心目。
向艷

歌偏愛賦情多處寄衷曲
淒涼漫有舊月闌干夜
涼無因重照顏玉扇
紉收鸞孤蠹損一番愁緒暗相
觸回首塞雲空鴈足露井零亂
已是負了桐陰可堪
輕誤滿籬種菊

金盞子

水仙

趙虛齋

得水能仙向漢皋遺珮
碧波涵月藍玉暖生烟
稱縞袂黃冠素姿冰潔
亭亭獨立風前奈香多愁絕
當時事琴心妙處難傳
有誰堪說歲晚眇無人更短景
繁雲天欲雪瀟湘烟水茫茫
但萬里相思寒江空濶
殷勤折向梅邊聽玉龍吹徹
丁寧道百年兄弟相看

晚節

孤鸞梅

前人

江南春早問江上寒梅占春多少幾點寒星細萬里
春風到幽香不知甚處但迢迢滿汀烟草回首誰家
竹外有一枝斜好記當年曾共花前笑念玉雪襟
期有誰知道喚起羅浮夢正參橫月小淒涼更吹塞
筇漫相思鬢華驚老待覓西湖半曲對霜天清曉

高陽臺

落梅

吳夢窓

宮粉雕痕仙雲墮影無人野水荒灣古石埋香金沙
鎖骨連環南樓不恨吹橫笛恨曉風千里關山半飄

零庭院黃昏月冷闌干 壽陽空理愁鸞問誰調玉
髓暗補香瘢細雨歸鴻孤山無限春寒離魂難倩招
清些夢縞衣解珮溪邊最愁人啼鳥清明葉底青圓

玉漏遲

和趙立之

林玉谿

表民

並湖遊冶路垂堤萬柳麴塵籠霧草色將春離思暗
傷南浦舊日惜惜坊陌尚想得畫樓窓戶成遠阻鳳
箋空寄燕梁何許 淒涼瘦損文園記翠筩聯吟玉
壺通語事逐征鴻幾度悲歡休數鶯□亂花深裏悄
難替愁人分訴空院宇東風晚來吹雨

又

史籀泉

綠樹深庭院侵簾暝草沿砌幽蘚問訊餘芳糝
紅千點暗有芹香墮几認杏棟營巢新燕晴口軟春
光幾許費人裁剪梅陰地濕無塵但密袖薰虬靜
看詩卷半掬羈心似翠蕉難展花事因循過了漸愁
入薰風團扇屏晝掩屏上數峯青遠

倦尋芳

張荃翁端義

曉聽社雨猶帶餘寒尚侵襟袖揜柳千門相近禁烟
時候鬢墜搔頭深舊恨臂寬條脫漆新瘦卷重簾看
雙飛燕羽舞庭花晝誰共語春來怕酒一段情懷
燈暗更後晷晷屏山今夜夢魂還又愁墨題牋魚浪

遠粉香染淚鮫綃透待相逢想鴛衾鳳幃依舊

念奴嬌

李草堂

鏡鸞分影望天涯腸斷悄無紅葉幾度秋風吹翠被
一縷幽香難滅燕卜新梁花移別檻回首春如客歡
情何在綠楊空鎖愁色可是今古風流小喬姝麗
只許周郎得金谷珠簾空百尺不礙夢魂飛入釵股
盟深舊緣未斷月有重圓日藍橋路近乘雲先問消
息

風流子

王樂道 咏祖

東風長是客簾櫳靜燕子一雙飛看花塢日高翠陰

護曉柳塘風細綠漲浮漪勝斷處渭城春樹遠江國
暮雲低芳徑聽鶯暗驚心事立格聞鶻試卜歸期
小樓凝佇地踈窓下幾度對說相思記得菱花交照
素手曾携有新恨兩眉向誰說破芳心一點惟我偏
知休為多情瘦却重有來時

喜遷鶯

馮深居

涼生遙渚正綠芰擎霜黃花招雨鴈外漁村蛩邊蟬
舍絳葉表秋來路世事不離雙鬢遠夢偏欺孤旅送
望眼但憑舷微笑書空無語 慵覷清鏡裏十載征
塵長把朱顏污借著青油揮毫紫塞猛譚不堪重舉

間濶故山猿鶴冷落同盟鷗鷺倦遊也使檣雲拖月
浩歌歸去

倦尋芳

翁時可

燕簾挂晚鶯檻迷晴花思零亂試覓娉婷日日傍湖
亭苑擲果牆陰窺駐馬采香深逕拋春扇醉歸來任
釵雲半落繡簾慵捲念燦錦年華如舊飛絮游絲
縈恨難剪蜀羽無情早帶怨紅啼斷厚約輕辭寒食
夜行雲空口梨花院莫凭闌正斜陽澹烟平遠

齊天樂

翁賓暘寅

幽香不受春料理青青尚餘秋髻碣曲岩隈烟梳露

浴甘與菰蒲共隱芳標瘦迥看纓結丁香帶紫晴行
恨水東流楚江憔悴亂雲暝淒涼夢游故苑縱妬
花風暴吹夢難醒艷李妖桃紆青佩紫爭似廣文官
冷塵波萬頃算誰是同心自憐孤影收斂風流素絃
清夜永

又元夕

全前

紅香十里銅駝夢如今舊遊重省節序飄零歡娛老
大慵立燈光蟾影傷心對景怕回首東風雨晴難準
曲巷幽坊管弦一片笑聲近飛棚浮動翠葆者金
釵半溜春妬紅粉鳳輦驚山雲收霧斂迤邐銅壺漏

迥霜風漸緊展一幅青綃淨懸孤鏡帶醉扶歸曉醒
春夢穩

過秦樓

和美成韵

趙白雲

崇嶠

隱枕輕潮拂塵疎雨幽夢似真還斷鶯雛燕婉依約
年時花下試翻歌扇憔悴鬢怯春寒慢掠輕絲柳風
如箭甚陽臺渺邈行雲無準楚天空遠應喚覺當
日琴心祇今詩思惆悵客衣塵染釵留股玉韞襲鈎
羅荏苒膩寒香變問訊多情別後笑巧顰嬌對誰長
情但晚來江上眼迷心想越山兩點

綠頭鴨

利碧澗

登

晚春天柳絲初透晴烟黯離懷綠房深處艷遊曾記
當年襯龍綃亭亭玉樹步鶯褰窄窄金蓮燒蜜調蜂
剪花挑蝶香雲微濕綠鸞鬟嬉遊因倚郎私語還愛
撫郎肩共攜手海棠院左翡翠簾邊 口口恨無情
錦籠鸚鵡等閑輕語花前昔相憐關山咫尺今相望
咫尺關山是妾心闌是郎意懶是郎無分妾無緣都
休問金枝雲裏何日跨金鸞深盟在香囊暗解終值
雙鴛

漢宮春

九日登豐樂樓

王□□

手撚黃花對西風無語雙髻蕭蕭韶華暗中過眼零

落心交登臨把酒更誰伴
破橋持螯惟只有潮邊鷗
鷺飛來如受人招
往事不禁重省料綰羅分鈿翠
減香銷空向畫橋古松猶繫輕橈西興渡口誤歸帆
幾信寒潮傷情處淡烟殘照倚闌人共秋高

木蘭花慢

史蘄泉 沐

畫樓簾半捲倩誰覓鳳簫音記待月梅邊籠香酒後
私語屏陰忽忽佩珠暗解斷歸鴻消息口沉沉前度
劉郎易老舊時飛燕難尋
羅襟薄有淚痕侵釵股
暗黃金向寶奩密看綾箋小字長是驚心登臨漫勞
眺遠但青山杳隔暮雲深曾傍灣橋繫馬紫騮嘶度

平林

畫錦堂 牡丹

黃玉泉

麗景融晴浮光起畫玉妃信意尋春一笑酒盃翻手
滿地祥雲寶臺艷感文綃帕郎官嬌舞鬪金裙嫣然
處況是生香微濕膩臉餘醺 煖烘肌欲透愁日炙
還銷風動成塵細為品口雪調度與朱脣翠幃晚映
真圖畫金蓮夜照越精神須拚醉回首夕陽流水碧
草如茵

隔浦蓮 荷花

全 前

瑶妃香透襪冷佇立青銅鏡玉骨清無汗亭亭碧波

千頃雲水搖扇影炎天永一國清涼境
晚粧靚微酣不語風流幽恨誰省沙鷗少事看到睡鴛雙醒蘭棹歌遙隔浦應催暝藕絲紫斷歸艇

洞仙歌

姑蘇舊臺在三十里外今臺在胥門上

前人

吳宮故墅是天開圖畫縹緲層雲出飛榭隱隱棲空翠獻水遶蕪城平時迴點染霜林彫謝
鴈聲切闌干似覓胥門怨吳霸屬錢沉香溪斷夢散雲空千年外等是漁樵閑話但極目荒臺鬱蒼烟衰草裏又還夕陽西下

念奴嬌 題馬鬼圖

程楚客 武

蜀江城遠想連雲危棧接天窮處惆悵烟塵回首地
雙闕觚稜猶故龍扈星聯羽林風肅未放鸞駝去不
堪掩面淚沾宸袖如雨底事當日昭陽吹羌鳴羯
浣却霓裳舞三十六宮春滿眼曾把色嗔香妬芳草
埋情飛花隕怨翻被蛾眉誤畫圖驚見黯然魂斷今
古

聲聲慢

奚秋厓

秋聲淅瀝楚棹吳鞭相逢易老顏色桐竹鳴騷音韻
水雲空覓炎涼自今自古信浮生有誰禁得漫回首
問黃花還念故人猶客莫管紅香狼籍蘭蕙冷便

他露知霜識木落山空心事對秋明白征衣暗塵易
染算江湖隨人寬窄正無據者寒蟾飛上暮碧

花心動

泊舟四聖觀

史蘄泉

肌雪浮香見梅花清姿漫勞凝佇淡粉最嬌羞把春
長記壽陽眉嫵綠苔深逕尋幽地誰相伴凌波微步
翠鴛冷芳塵路香舊游何處不信重城間阻終沒
个因由寄聲傳語寶炬凝珠綵筆呵冰密寫斷腸新
句月寒烟暝孤山下羞吟斷橋邊去遮愁緒丹青怎
生畫取

齊天樂

王月山

夜來疎雨鳴金井一葉舞空紅淺蓮渚收香蘭臯浮
爽涼思頓欺班扇秋光冉冉任老却蘆花西風不管
清興難磨幾回有句到詩卷長安故人別後料征
鴻聲裏盡闌凭遍橫竹吹商疎砧點月好夢又隨雲
遠閑愁似綫甚繫損柔腸不堪裁剪聽著鳴蛩一聲
聲是怨

玉漏遲

趙立之

絮花寒食路晴絲冒日綠陰吹霧客帽欺風愁滿畫
船烟浦綵柱秋千散後悵塵鎖燕簾鶯戶從間阻夢
雲無準髣霜如許夜永繡閣藏嬌記掩扇傳歌剪

燈留語月約星期細把花鬚頻數彈指一襟幽恨漫
空倩啼鵲聲訴深院宇黃昏杏花微雨

法曲獻仙音

花匣么弦象奩雙陸舊日番歡情意夢別銀瓶恨裁
蘭燭香篝夜閑鴛被料燕子重來地桐陰瑣窓綺倦
梳洗蘭芳鉤自羞鴛鏡羅袖冷烟柳畫簾半倚淺
雨壓荼蘼指東風芳事餘幾院落黃昏怕春鶯驚笑
憔悴倩柔紅約定喚取玉簫同醉

念奴嬌

柴仲山

春來多困正日移簾影銀屏深閉喚夢幽禽烟柳外

驚斷巫山十二宿酒初醒新愁□□惱得成憔悴
鬆雲髻不快鸞鏡梳洗門外滿地香風殘梅零亂
玉糝蒼苔碎乍煖乍寒渾莫擬欲試羅衣猶未鬪草
雕闌買花深院做踏青天氣晴鳩鳴處一池昨夜春
水

風流子

方君遇

春被雨禁持傷心事髣髴去年時記芳徑莫歸褪妝
微醉暗悵先寢聞笑佯癡迴首別離容易過楊柳又
依依紅燭怨歌髻花零落青綾牽夢屏影參差桃
源今何在劉郎去應念瘦損香肌誤約夜闌從前怪

我多疑但怕收殘淚對人徐語指彈新恨推戶潛窺
還是厭厭病也無計憐伊

瑞鶴仙

趙立之

客邊情味惡花漏遠春靜風鳴鳳鐸空梁燕泥落映
柔紅微冒海棠簾箔愁鐘恨角怕催人黃昏索寞擁
吟袍凭暖闌干醉怯冷香羅薄阿鵲幽芳月淡紫
曲雲昏有人說著名繻易縛歸鞭香誤期約記金泥
卜畫銀屏娛夜彈指恁恁恨錯為情多撓盡芳春帶
圍瘦覺

又立春

凍痕消夢草又招得春歸舊家池沼園扉掩寒悄倩
誰將花信偏傳深窈追游趁早便裁却春衫短帽任
殘梅飛滿溪橋和月醉眠清曉 年少青絲纖手綵
勝嬌鬟賦情誰表南樓信杳江雲重鴈歸少記衝香
嘶馬流紅迴岸幾度綠楊殘照想暗黃依舊東風霸
陵古道

清夜遊 越調

周彥良

西園昨夜又一番闌風伏雨清晨按行處有新綠照
人亂紅迷路歸吟窓底但拼几留連春住窺晴小蝶
翩翩等閑飛來似相妬 遲暮家山信杳奈錦字難

憑清夢無據春盡江頭啼鴉最悽苦薔薇幾度花開
誤風前翠樽誰舉也應念留滯周南思歸未賦

春歸怨

越調

全前

問春為誰來為誰去忽忽太速流水落花夕陽芳草
此恨年年相觸細履名園閑看嘉樹鶯翠陰成簇爭
知也被韶華換却詩人髻邊綠小花深院靜旋引
清尊自歌新曲燕子不歸來風絮亂吹簾竹誤文姬
凝望久心事想勞頻卜但門掩黃昏數聲啼鴉又喚
起相思一掬

齊天樂

儲華谷

東風一夜吹寒食枝頭紅片猶戀宿酒初醒新吟未
穩凭久闌干留暖將春買斷恨苔遲榆暗翠錢難貫
陌上秋千相逢難認舊時伴輕衫粉痕褪了絲綠
餘夢在良宵偏短柳線經烟鶯梭織霧一片舊愁新
怨慵拈象管待寄與深情難憑雙燕不似楊花解隨
人去遠

瑞鶴仙

徐南溪

暮霞紅映沼恨柳枝疎瘦不禁風攪枝林數歸鳥更
枯莖敲荻糝紅堆蓼江寒浪小鴈來多音書苦少試
看盡水邊紅葉不見有詩流到煩惱凭闌人去枕

水亭空路遙天香情深恨渺無計訴與伊道漏聲催
門外霜清風細月色今宵最好怎割捨美景良時等
閑睡了

瑞鶴仙

陸景思 獻

濕雲黏鴈影望征路愁迷離緒難整千金買光景但
踈鐘催曉亂鴉啼暝花陰暗省許多情相逢夢境便
行雲都不歸來也合寄將音信 孤迥盟鸞心在跨
鶴程高後期無準情絲待剪翻惹得舊時恨怕天教
何處參差雙燕還染殘朱積粉對菱花與說相思看
誰瘦損

又用陸湘韵

黃澹翁 中

睡餘拋倦枕憶篆鼎香銷起來滴整晴光破清冷正
柳黃梅淡染金勻粉茶甌雋永試經行桐花舊井記
前面未綠鷓鴣波近日燕芹青盡因省春風如舊人
面何歸對時傷景樓高望迥潮有信鴈無準任相如
多病沈郎全瘦都沒音塵寄問便做無阿鵲頻頻可
能睡穩

摸魚兒 海棠

劉後村

甚春來冷烟淒雨朝朝遲了芳信驀然作暖晴三日
陡覺萬姝嬌困天怎忍潘郎老不成沒個看花分才

情減盡，恨玉局飛仙。石湖絕筆，辜負這風韻。傾城
色懊惱佳人，薄命牆頭岑寂，誰問東風日。莫無聊賴，
吹得胭脂成粉。君細認花共酒，古來二事天猶吝。年
光去迅，謾綠葉成陰，青苔滿地，做取異時恨。

又次晁无咎

李文溪

啟茅亭茂林環翠苔，磯低蘸烟浦。青簑混入漁家社，
斜日斷橋船聚。真樂處，坐芳草瓦尊口酒頻頻注。鼻
禽自舞，慣松逕衝雲梅村踏雪，朗笑自來去。車乘
陸爭似脩筇穩步，前塵回首俱誤。安閑得在中年好，
抱壺尚堪蔬圃。高眼覷，算不識人間寵辱除巢許。風

簋解語應共笑群狙無端喜怒三四記朝暮

又

葉直庵閣

猗薰風畫闌亭午采蓮柔艣如語紅裙濺水鴛鴦濕
幾度雲朝雨暮游冶處最好是小橋芳樹尋幽趣繡
簾低護任涼入霜紉月侵冰簟長夏等閑度都如
夢悵望游仙舊侶遺踪今在何許愁予眇眇瀟湘浦
檻竹空敲朱戶黯無緒念多情文園曾草長門賦酒
酣自舞笑滿袖緇塵數莖霜鬢羞殺照溪鷺

摸魚兒

重過西湖

張梅深 撰

又吳塵暗口吟袖西湖深處能浣晴雲片片平波影

飛趁棹歌聲遠回首喚髣髴記春風共載斜陽岸輕
携分短悵柳密藏橋烟濃斷逕隔水語音換思量
遍前度高陽酒伴離踪悲事何限雙峯塔露書空穎
情共暮鴉盤轉歸興懶悄不似留眠水國蓮香畔燈
蘆暈滿正蠹帙逢迎沉煤半冷風雨閉宵館

又登嚴州西樓

柴秋堂望

望長江幾分秋色三分渾在烟雨傷心已怕江南樹
那更暮蟬如語帆且駐試說看羊裘釣雪今何許魚
蝦自舞但一舸蘆花數聲羌笛鷗鷺自來去年年
恨流水朝朝暮暮天涯長歎飄聚衾寒不轉釣天夢

樓外誰歌白紵君莫訴君試按纂第未必如鍾呂鄉
心最苦算只有娟娟馬頭皓月今夜照歸路

桂枝香

前人

今宵月色歎暗水流花年事非昨蕭灑江南似畫舞
楓飄柞誰家又唱江南曲一番聽一番離索孤鴻飛
去殘霞落盡怨深難託又腸斷丁香畫雀記牡丹
時候歸燕簾幙夢裏襄王想念王孫飄泊如今雪上
蕭蕭鬢更相思連夜花發柘枝猶在春風那似舊時
宋玉

八聲甘州

陳月鏡

芰荷風滌面恰夢秋應倒著春衣渡曉溪雲濕日流
塵脚露□蛛絲調翼受風雖燕弱不解爭泥襯琅玕
錦院竹外薔薇立久闌干凭暖看行魚吹沫波暈
平池蘚痕斑礎石漸雨熟梅時傍短籬成團粉蝶掠
野花相逐□高低忘言處微絃乍拂流水先知

永遇樂

為張安國賦
焦尾集不載

韓南澗

池館春歸簾櫳晝靜清漏移箭山下孤城水邊翠竹
鷓鴣聲千轉□□□綺窓人去尚有唾茸遺線點
珠筵歌檀舞扇寂寞舊家排遍青雲賦客多情多
病西掖桐陰滿院飛絮隨風馬頭月在翡翠帷空捲

平湖烟遠斜橋雨暗欲寄短書雙燕算猶憶蘭房畫
燭醉時共翦

滿庭芳

此詞宛有淮海風味惜不名世

劉吉甫

詞

鶯老梅黃水寒烟淡斷香誰與添溫寶缸初上花影
伴芳尊細細輕簾半捲憑闌對山色黃昏人千里小
樓幽草何處夢王孫十年羈旅興舟前水驛馬上
烟村記小亭香墨題恨猶存幾夜江湖舊夢空淒怨
多少銷魂歸鴉被角聲驚起微雨暗重門

塞翁吟

千里和清真詞一集可取者僅此耳

方千里

暮色催更鼓庭戶月影朧朧記舊迹玉樓東看枕上

芙蓉雲屏幾幅江南畫香篆燼煖烟空睡起處繡衾
重尚殘酒潮紅 忡忡從分散歌稀宴少懷麗質渾
如夢中苦寂寞離情萬緒似秋後怯雨芭蕉不展愁
封何時細語此夕相思曾對西風

意難忘

和清真韵

朱用之

宮額塗黃怕牋凝怨墨酒漬離觴紅樓春寄夢青瑣
夕生香花氣暖柳陰涼棹曲水滄浪愛弄嬌臨流梳
洗顧影低相 桃花結子成雙縱題紅去後枉誤劉
郎琴心挑別恨鶯羽學新絃千萬恨慙慙愁腸便憔悴
何妨待共伊平消別後幾度風光

青玉案

無名氏

年年社日停針線，怎忍見雙燕飛。今日江城春已半，
一身猶在亂山深處。寂寞溪橋畔，春衫著破誰針。
線點點行行淚痕滿。落日解鞍芳草岸。花無人戴，酒
無人勸，睡也無人管。

又和方回

姚志道

三年枕上吳中路，遣黃耳隨君去。若過吳江呼小渡，
莫驚鷗鷺。四橋都是老子經行處。輞川圖上看春
莫長憶，高人右丞句。作個歸期天未許。春衫猶是小
蠻針線，曾濕西湖雨。

風入松

康伯可

又附田中行集

一宵風雨送春歸。綠暗紅稀。畫樓盡日憑闌，意與誰同。撚花枝、門外舊薇開也。枝頭梅子酸時。玉人應是數歸期。翠斂愁眉。塞鴻不到，雙魚遠，恨樓前流水難西。新恨欲題紅葉，東風滿院花飛。

祝英臺近

史邦卿

柳枝愁桃葉恨。前事怕重記。紅藥開時，新夢又添消。此情老去須休。春風多事，便老去，越難迴避。阻幽會。應念偷剪荼蘼柔條暗紫。繫節物移人，春暮更顛。顛可堪行院題詩，蘚苔聽雨，寸心外安愁無地。

採桑子

朱野逸藻

障泥油壁人歸後，滿院花陰，樓影沈沈，中有傷春一片心。
閑穿綠樹尋梅子，斜日籠明，團扇風輕，一徑楊花不避人。

玉樓春

梅

劉隨如鎮

泠泠水向橋東去，漠漠雲歸溪上住，踈風澹月未來時，
流水行雲無覓處。佳人獨立相思苦，薄袖欺寒脩竹暮，
白頭空負雪邊香，著意問春春不語。

柳梢青

施芸隱

樞

飛露初霜冷侵金井，響到銀床，懊恨碧梧不留一葉。

月占紗窓 鴈聲做盡淒涼又陡頓衾寒夜長曲曲
屏山重重客夢無限思量

菩薩蠻

李草堂 憶

畫樓酒醒春心悄殘月悠悠芳夢曉嬌汗浸低鬟屏
山雲雨闌 香車河漢路又是念念去鸞扇護明粧
含情看綠楊

阮郎歸

王花洲 同祖與之

一簾疎雨細於塵春寒愁殺人桐花庭院近清明新
烟浮舊城 尋蝶夢怯鶯聲柳絲如妾情丙丁帖子
畫教成粧臺求晚晴

謁金門

趙竹潭 滿夫

天色晚雲外一竿斜鴈獨凭闌
千秋滿眼菊花寒尚淺
葉落香溝紅泛懶
把新詩題怨何處笛聲三弄
斷月遲簾未卷

朝中措

吳夢旸

晚粧慵理瑞雲盤
針線傍燈前燕子不歸簾
捲海棠一夜孤眠
踏青人散遺鈿滿路
雨打秋千尚有落花寒
在綠楊未褪春綿

南鄉子

孫花翁

璧月小紅樓
聽得吹簫憶舊游
霜拍闌干天似水
楊

州薄倖聲名總是愁
塵暗鸛鸛裘針線曾勞玉指
柔一夢覺來三十載休休空為梅花白了頭

踏莎行

陳芸厓壁

江濶天低樓高思迴春烟顛淡如秋景今年芳草去
年愁分明又報明年信燕子還來歸期未定可堪
醉夢紅塵境世間萬事儘消磨水流不盡青山影

又

王萬之

柳外寒輕水邊亭小昨朝燕子歸來了天涯無數舊
愁根東風種得成芳草亭畔秋千當時歡笑香肌
不滿和衣抱那堪別後更思量春來瘦得知多少

又

錢若洲

征鴈雲深亂蛩寒淺驚心怕見年華晚
蕭疎隄柳不禁霜江梅瘦影清相伴
舞暗香茵歌闌團扇月明
夢遠天涯遠斷腸人在畫樓中
東風不放珠簾捲

菩薩蠻

利碧澗

玉闌干外重簾晚流雲欲度長天遠
花草不知名春來各自春
綠鞍游冶客何處垂楊陌不信不歸來
海棠花又開

又

劉叔擬

仙倫
招山

秦樓去了東風伴一川烟草無人管
芳徑雨初晴黃

鷓鴣三兩聲 海棠花已謝春事無多也只有牡丹時
知他歸未歸

好事近

趙立之

人去綠屏閑逗曉柳絲風急簾外杏花微雨冒春紅
愁濕 單衣催賜麴塵羅中酒病無力應是繡床慵
困倚秋千斜立

又

小枕夢催閑飛雨時鳴高屋掛起西窓人靜聽春禽
聲續 鴨塘溪綠漲輕痕烟柳媚新綠誰伴瘦筇尊
酒弄品泉飛瀑

清平樂

程楚客

曳雲搖玉裙。感秋綃幅。學得琵琶。依約熟貪按鴈沙。
新曲。曲終滿院春閑。清輝移上眉山。心事怕人猜。
破折花背。揵雲鬟。

小重山

全前

香減鮫綃。淚痕綵雲長。是恨等閑心。玉笙猶記夜。
深聞湘水。杳寂寞。隔巫雲。翠被冷。重熏。做成歸夢。
了却銷魂。垂楊濃處著朱門。依然是風雨。掩黃昏。

菩薩蠻

曾蒼山 原一

淡黃斜日留汀草。簷低半露遙岑小。病眼不禁愁。闌

千無數秋 鴈聲何處落舊夢還驚覺風重葛衣單
深山吹笛寒

眼兒媚

黃東浦 簡

畫樓瀕水翠梧陰清夜理瑤琴打窓風雨逼簾烟月
種種關心 當時不道春無價幽夢費重尋難忘最
是鮫綃暈滿蟬錦香沉

四字令

劉改之

情高意真眉長鬢青小樓明月調箏寫春風
思君憶君魂牽夢縈翠銷香煖雲屏更那堪酒醒

如夢令

謝無逸

門外落花流水日煖杜鵑聲碎
蕃馬小屏風一枕盡
堂春睡如醉如醉正是困人天氣

又

王聖與

妾似春蠶抽縷君似箏弦移柱
無語結同心滿地落花飛絮
歸去歸去遙指亂雲遮處

長相思

康伯可

南高峰北高峰一片湖光烟靄中
春來愁殺儂郎
意濃妾意濃油壁車輕郎馬
驄相逢九里松

又

韓子明

郎恩深意思深祇為恩深便有
今回紋辜舊吟雲

沈沈水沈沈一點堅如百鍊金卽應知妾心

又

杜娘家謝娘家樓壓官橋柳半遮簾波漾彩霞拾
飛花怨飛花望斷卽來日又斜東風吹鬢鴉

又

夜蕭蕭夢蕭蕭又趁楊花到謝橋鳳沉明月蕭來
迢迢去迢迢枉把口牋寄寂寥飛鴻不受招

又

陳東甫

花深深柳陰陰度柳穿花覓信音君心負妾心怨
鳴琴恨孤衾細誓釵盟何處尋當初誰料今

玉樓春

徐山民

螢飛月裏無光色，波水不搖樓影直。
每憐宿粉浣啼痕，懶記舊書觀字跡。
枯荷露重時聞滴，君夢不來誰阻隔。
妾身不畏浙江風，飛去飛來方瞬息。

又

李冰壺

子酉

紗窓春睡朦朧著，相見尚懷相別惡。
夢隨城上角聲殘，淚逐樓前花片落。
東風不解吹愁却，明月幾番飛後約。
當時惟恐不多情，今日情多無處著。

又

利碧澗

夾簾不捲重堂暮，白騎少年何處去。
雲根秌藕已勝

花烟外子松今作樹 金梯月澁知無與寶瑟風驚
猶自語斜河一道界相思橫隔天心寒似霧

又

陳雲厓

瓊奴家與章臺並路遠可憐歸夢近被頭浪語臉紅
鄉鏡面頻思眉翠暈 年年花月年年病花月無情
人有恨欲將此恨寄湘流又怨湘流流不盡

陽春白雪卷第五終

陽春白雪卷第六

臨濮 趙 聞禮 立之選

六州歌頭

桃花
其尾集不載

韓南澗

東風著意先上小桃枝紅粉膩嬌如醉倚朱扉記年
時隱映新粧面臨水岸春將半雲日暖斜橋轉夾城
西草軟莎平跋馬垂楊渡玉勒爭嘶認蛾眉凝笑臉
薄拂燕支繡戶曾窺恨依依 共攜手處香如霧紅
隨步怨春遲銷瘦損憑誰問只花知淚空垂舊日堂
前燕和烟雨又雙飛人自老春長好夢佳期前度劉
郎幾許風流地花也應悲但茫茫暮靄目斷武陵溪

往事難追

又謝人送牡丹

劉後村

維摩病起兀坐等枯株
清晨裏誰來問是文殊
遣名姝奪盡羣花色
浴才出醒初解千萬態
嬌無力因相扶
絕代佳人不入金張室
却訪吾廬對茶鐺
禪榻笑殺此翁癡珠髻
金壺始消渠憶承平日
繁華事修成譜寫成圖
奇絕甚歐公記蔡公書
古來無一自京華
隔問姚魏竟何如
多應是彩雲散却
灰餘野鹿街將花去
休回首河洛邱墟漫傷春
弔古夢繞漢唐都
歌罷欹歎

摸魚兒

懷雲厓陳朱車
東甫時游湘潭

譚明之

宣子
在庵

掩朱弦住聽金縷天涯同是羈旅多情記把香羅袖
殘粉半粘荆樹還信否便忍道石臺暗寂春無主分
明間阻那睡鴨噓雲翔鴛溜月此際更休語人間
世誰識緘愁最苦輕帆重解烟雨而今翻笑周郎誤
挑別寒缸尋譜游倦處果因甚亭亭瘦影如前度無
由寄與待謝却梅花東風為我吹夢過淮浦

又梅

趙景周

與洽
慙庵

甚幽人被花勾引庭臯遙夜來去江空歲晚誰為伴
只有瓊枝玉樹愁絕處望萬里瑤臺夢斷迷歸路花

還解語更雪琢精神水相韵度粉黛盡如土 飄仙
袂曾綴蕊珠鵲驚雲茵月障千步莫教衣袖天香冷
恐怨美人遲暮更起舞任斗轉參橫翠羽曾知否塵
緣自誤終待與驂鸞乘風共去長作此花主

又

王與之

同祖
花洲

記年時荔枝香裏深紅一片成陣迎風浴露精神爽
誰似阿嬌丰韻黃昏近望翠幕玳筵粉面雲鬟映嬌
波微瞬向燭影交相歌聲間繞私語畫闌並 佳期
事好處天還慳各鶯啼燕語無定一輪明月人千里
空夢雲溫雨潤蕭郎病恨天濶鴻稀杳杳沉芳訊日

長人靜但時把好山學他媚嫵偷就眉峯印

又 瓊花

施與言

柳蒙茸暗凌波路烟霏慘淡平楚七香車駐猊環掩
遙認翠華雲母芳景莫鴛鴦悄銖衣來按飛瓊舞淒
涼洛浦漸玉漏沉沉清陰滿地乘月步虛去 銷凝
處誰說平安小杜翔螭聲斷簫鼓情知禁苑酥塵浣
羞與倡紅同譜春幾度想依舊苔痕長印唐昌土風
流千古人在小紅樓朱簾半捲香注玉壺露

芙蓉月 夫容

趙虛齋

黃葉舞碧空臨水處照眼紅苞齊吐柔情媚態竚立

西風如訴遙想僊家城闕十萬綠衣童女雲縹緲玉
娉婷隱隱彩鸞飛舞尊前更風度記天香國色曾
占春暮依然好在閑伴清霜涼露一曲欄干敲徧悄
無語空相顧殘月淡酒闌時滿城鐘鼓

三姝媚

杜子卿

花浮深岸樹迎新曦窗影細觸游塵映葉青梅記共
折南枝又及嘗新駐屐危亭烟墅香風物撩人虹外
斜陽留晚鶯遑落絮催春心事應辜桃葉但自把
新詩徧寫脩筠恨滿芳洲倩晚風吹夢暗逐江雲漫
撚輕攏幽思切清音誰聞謾有鴛鴦結帶雙垂繡巾

夜合花

孫花翁

風葉敲窓露蛩吟梵謝娘庭院
秋宵鳳屏半掩釵花
映燭紅搖潤玉暖膩雲嬌染
芳情香透鮫綃斷魂留
夢烟迷楚驛月冷藍橋
誰念賣藥文簫望仙城路
香鶯燕迢迢羅衫暗摺蘭痕
粉迹都銷流水遠亂花
飄苦相思寬盡春腰幾時重
恁玉驄過處小袖輕招

西牕燭

雨霽江行自度

譚明之

春江驟漲曉陌微乾斷雲如夢
相逐料應怪我頻來
去似千里迢迢傷心極目為楚
腰慣舞東風芳草萋
萋襯綠燕飛獨知是誰家簫聲
多事吹咽尋常怨

曲儘教衿袖香泥浣君不見揚州三生杜牧待淚華
暗落銅盤甚夜西窓剪燭

大酺 牡丹

正綠陰濃鶯聲懶庭院寒輕烟薄天然花富貴逞天
紅殷紫疊葩重萼醉艷酣春妍姿浥露翠羽輕明如
削檀心鴉翼嫩似離情愁緒萬紛交錯更銀燭相輝
玉甌微浸宛然京洛 朝來風雨惡怕傷憇低張青
油幕便好倩佳人挿帽貴客傳箋趣良辰賞心行樂
四美難并也須拚醉莫辭杯酌被花惱情無著長笛
何處一笑江頭高閣極目水雲漠漠

歸朝歡

趙白雲 漢宗

翠羽低飛簾半揭，寶葦牙牀涼似雪。牕虛雲母澹無風，隔牆花動黃昏月。玉釵鸞墜，髮盈盈，白露侵羅襪。
記逢迎，鴻驚燕婉，燈影弄明滅。蜀雨巫雲愁斷絕，羅帶同心留綰結。交枝紅豆雨中看，為君滴盡相思血。染衣香未歇，夜闌天淨，魂飛越。正銷凝，一庭秋意，烟水浸空濶。

多麗 西湖

趙雲洞 時奚

歛吳雲，翠奩推上紅晴。渺澄流，鱗光寒碎，遠峰螺紺。低凝杏香引畫船，影濕柳陰趁。驕馬蹄輕，橋限寬平。

堤橫南北去來人入繡圍行漸際晚梅粧游因十里
曳歌聲蒼烟濶飛鴻妬春一夢催醒認名園當時
宴幸纜痕猶在危亭露花濃靜迎□砌□蘚冷森護
飛甍幾對東風留連麗景□年□老越山青夜深月照
人依舊何處最關情歡娛地星換世移客恨還盈

滿庭芳

西湖

吳履齋

春水溶溶春山漠漠淡烟淺草輕籠危樓闌檻掠面
小東風又是飛花落絮芳草暗萬綠成叢閑徙倚百
年人事都在畫船中故園無恙否一谿翠竹兩逕
蒼松更有魚堪釣有林堪春底事塵驅物役空回首

社燕秋鴻功名已蕭蕭短鬢分付與青銅

滿江紅 滕王閣

全前

萬里西風吹我上滕王高閣正檻外楚山雲漲楚江
濤作何處征帆未去有時野鳥沙邊落近蘆鈞莫
雨掩空來今猶昨 秋漸緊添離索天正遠傷飄泊
歎十年心事悠悠莫莫歲月無多人易老乾坤能大
愁難著向黃昏斷送客魂銷城頭角

揚州慢 瓊花

趙虛齋

十里春風二分明月蕊僊飛下瓊樓看冰花剪剪擁
碎玉成毬想長日雲階佇立太真肌骨飛燕風流斂

羣芳清麗精神都付揚州 雨窓數朶夢驚回天外
香浮似閨苑花神憐人冷落騎鶴來游為問左淮風
景長空淡烟水悠悠又黃昏羌管孤城吹起新愁

孤鸞

四明後園石峯之下
小池之上有梅花

黃玉泉

冰心孤寂戀幾揮靈峰半泓寒碧骨瘦和衣薄清絕
成愁極蕭然滿身是雪怕人知鏡中消息獨向百花
夢外自一家春色 記羅浮幽夢渾如昔有浸眼鯨
波倚雲丹壁夜醉空山酒呌裂橫霜笛回頭洞天未
曉但迢迢江南千驛飲散東風落月正海山浮碧

宴清都

胡伯雨

翼龍
夢泉

夢雨隨春遠，征衫薄短。蓬猶逗寒淺。裁芳付葉書愁。
沁壁水、窓竹院。別來被篝梅潤，暗塵積，舊題紅，扇許
多時，開了闌干，放得蘚痕青滿。誰念杜若，還生蘋
花又綠，不堪重□山程水記。茶經硯譜，共誰閑展。湖
山省，曾游徧，不怪得、近番心懶。恰今朝、水落洲平，江
上楚帆風轉。

徵招

全前

蘋花又綠江南岸。賓鴻帶將寒去。幾許落梅愁渺暗。
香何處。一春長是雨。剝費却翠篝沈炷。冷隔簾旌潤。
銷窓紙，有人吟苦。燕壘清芹香畫堂。永闕心。去年

情緒愁壓曲屏深更小山無數濺裙前事誤□□□
□□□□□朱闌不了銷凝移損秦箏柱

齊天樂

重游番禺

丁無隱

兩株烟柳荒城外依依暮帆曾駐小扇障塵輕輿帖
岸誰料重行吟處流光暗度悵蘭渚春移葦汀秋聚
可奈清愁快呼艇子載將去中年懷抱易感甚風
花水葉猶似孤旅伴鶴幽期隨鶯樂事還是情平意
負衣塵帽土但杜鏡堪羞賀囊徧寫待報山靈莫教
雲壑妬

祝英臺近

向莘老
希尹

曉簾攏晴院宇空鴨冷沉水翠被欺寒嬌困未收起
厭厭兩點眉峯一痕酒暈正人在溫柔鄉裏甚情
味羞對釵燕筵鴻胭脂暗彈淚欲寫吳箋無處問雙
鯉倩他輕薄楊花與愁結伴直吹到那人根底

二郎神

西苑浣沙晴

周伯弼

浪花皺石甌夜月欲移還定想白苧烘晴黃蕉攤雨
人整斜巾照領剪斷鮫綃何人續黯夢想秋江風冷
空露漬藻鋪雲根苔蘚指痕環影重省五湖萬里
誰問烟艇料寶口塵侵玉瓢珠鎖羞對菱花故鏡領
畧鴉黃破除螺黛都付渚蘋汀苻春醉醒暮雨朝雲

何處柳蹊花迳

綺寮怨

官人斜帟古

石正倫

瑤林

綠野春濃停騎暖風飄醉襟漸觸目景物淒悲花無
語曲徑沉沉重檐繚垣靜鎖丹青暗斷軸塵半侵歎
絳紗玉臂封時何期掩夜泉流恨深已矣霜凋蕙
心蘭昌舊事雲容好信難尋竚立孤吟怕鳳履有遺
音今宵珮環奏月知倦客苦登臨驚飛翠禽松杉弄
碎影晴又陰

側犯

譚明之宣子

素秋漸爽倚香曲枕情依舊懷袖浸數尺湘漪簟紋

皺悲歡盡夢裏玉骨從消瘦空又思太液芙蓉未央
柳 翔鳳何在樂府傳孤奏人病酒有鴛鴦雙字情
誰繡拜月西樓幾聲滴漏應恐絢口已疎郎手

春聲碎

南浦送別自度腔

前人

津館貯輕寒脉脉離情如水東風不管垂楊無力慙
雨顰烟寐闌干外怕看燕掠文疏鼓疊春聲碎 劉
郎易憔悴况是厭厭病起蠻牋漫展便寫就新詞倩
誰將寄當此際渾似夢峽啼湘一寸相思千里

八聲甘州

鄭南谷 夢陽

大江流日夜客心愁不禁晚來風把英雄口氣興衰

餘事吹散無蹤但有山圍故國依舊夕陽中直北神州路幾點飛鴻欲問周郎赤壁歎沙沉斷戟烟鎖口口聽波聲如口空亂荻花叢甚雲間平安信少到黃昏偏映落霞紅尊鱸美扁舟歸去相伴漁翁

又送翁時可如宛陵

陸雲西

獻字景思

問纒腰跨鶴事如何人生最風流怕江邊潮汐世間歧路只是離愁白馬青衫往事贏得髻先秋目送紅橋晚幾番行舟蘭珮空餘依黯便南風吹水人也難留但從今別後我亦似浮漚敬亭上半林琴月記彈將寒影落南州秋聲裏塞鴻來後為爾登樓

又 孤山寒食

羅澗谷

甚匆匆歲月又人家揀柳記清明政南北高峯山傳
笑響水泛簫聲吹散樓臺烟雨鶯語碎春晴何所無
芳草惟此青青誰莞孤山山下任種梅月冷薦菊
泉清看人情如此沉醉不須醒問何時樊川歸去歎
故鄉七十五長亭君知否澗雲溪竹笑我飄零

又

胡蒙泉

甚年年心事占秋多芳洲亂蕪生正小山已桂東籬
又菊秋為人清腸斷洞庭葉下倚西風誰可寄芳蘅
嫋嫋愁予處欲醉還醒為問素娥飲否自謫仙去

後知與誰明耿盈盈如此分影落瑤航步高臺夜深
人靜有飛仙同跨海山鯨歸來也遠游歌罷夫却秋
聲

八六子

鄭幼霞

重初
小山

憶南洲紺波縈繞垂楊翠拂朱樓念十載風流夢覺
滿身花影人扶舊曾暗遊無言空愴離憂醉袖裏
將紅淚吟牋寫許清愁試與問楊瓊解憐郎否也應
還是舊家聲價而今艷質不來眼底柔情終在心頭
黯凝眸黃昏月沉半鉤

瑣窓寒

重游東湖

蘇才叔

雲浦口寒烟堤冪翠舊痕新漲春愁十里冉冉碧絲
搖蕩記登臨少年思高唾壺擊玉歌清壯到如今夢
裏秋風鴻陣晚波漁唱惆悵重來處望盡舫天邊
轡絲原上山陰秀句付與一聲雲響正東湖誰家柳
下午陰漠漠人蕩槳最堪憐白髮周郎為江山自賞
桂枝香

徐鼎夫 西麓

人間秋至對暮雨滿城沉思如水桐葉驚風似語怨
蛩齊起南樓月冷曾多恨怕而今夜深橫吹那堪更
聽蕭蕭槭槭透窓搖睡問楚夢閑雲何地但手約
輕綃省人深意紅樹池塘誰見宿粧凝睇舊時裘馬

行歌事合都歸汀蘋烟芷思王漸老休為明璫沉吟
洛渚

華胥引

丁無隱 書塢

論交眉語惜別心帝費情不少蕙渺溱期蘋深汜約
輕誤了幾度金鑄相思又燕歸鴻杳誰料如今被鶯
閑占春早頻把愁勾惜鴛雲嬌紅猶遠渾拚如夢
爭奈枕醒屏曉欲寄芙蓉香半握怕不禁秋惱口是
親逢片帆雙度天杪

漢宮春

趙雲洞 時奚

霜皎千林正石橋人靜春滿橫塘寒花自開自落曉

色昏黃明沙暗草對東風深鎖閑堂金漏短江南路
遠夢回雲冷瀟湘重到舊時花下按玉笙歌徹月
正西廊亭亭愛伊素影粉薄新粧經年瘦損漫誰知
心事淒涼休更聽城頭畫角一聲聲斷人腸

東風第一枝

探梅

黃玉泉

迅影彫年嫩晴貫煖意行問訊春色不知春在誰家
闌香慢攏玉勒一枝竹外似欲訴經年相憶奈情多
難剪愁來寂寞水寒烟碧吟正好悲茄喚恨酒正
殢夕陽催客殷勤片月飛來更隨暗香細索橫斜瘦
影看盡未開時消息為春來還怕春多腸斷夜闌霜

笛

渡江雲 和清真

蕭鶴皋 元之體仁

流蘇垂翠憶高低一色紅紫等泥沙香山居士老柳
枝桃葉飛梗屬誰家好音過耳任啼鳥怨入芳華心
情懶筆牀吟卷醉墨戲翻鴉堪嗟雕弓快馬數肋
追踪向夕陽坡下休更憶青絲絡轡紅袖裁紗司空
見慣渾如夢笑幾回索葦吹葭山中樂從渠恣賞鶯
花

慶清朝 木芙蓉

李敏軒 宏模希膺

碧玉雲深彤綃霧薄芳叢亂迷秋渚重城傍水中有

吹簫儔侶應是瓊樓夜冷月明誰伴乘鸞女仙游處
翠帶障塵紅綺隨步別岸玉容佇倚愛淺抹蜂黃
淡籠紈素嬌羞未語脉脉悲烟泣露絲扇何人妙筆
丹青招得花魂住歌聲暮夢入錦江香裡歸路

小重山

曾蒼山

原一
子實

薄雪初消銀月單踈踈浮竹影矮紅闌梅花夢事落
孤山禁人處霜重鼓聲寒留取曉來看斑簾低小
閣燭花殘一帆明月去滄灣空相憶雪浪月痕翻

又

黃乙山

鑄
亦顏

涼入秋欄雨意長竹深啼絡緯響虛堂一枝燈影耿

昏黃疎簾外風度木樨香 心事易成傷燕支坡下
路語如黃口仙螺子玉釵梁鴛屏夢應到舊韋郎

又

陳伯可成之

恨入眉尖熨不開日高猶未肯傍粧臺玉郎嘶騎不
歸來梁間燕猶自及時回 粉淚污香腮纖腰成瘦
損有人猜一春却識下香堦春又去花落滿蒼苔

點絳脣

宋蘭室

自道
吉甫

山雨初晴餘寒猶在東風軟滿庭苔蘚青子無人見
好客不來門外芳菲過難消遣流鶯聲轉坐看芭
蕉展

又

蘇竹里

茂一才叔

竹翠藏烟杏紅流水歸何處透簾穿戶更洒黃昏雨
織錦題書誰寄愁情去渾無緒綠楊千縷不似真
眉嫵

又

朱堯章

瑄

繡被鴛鴦寶香薰透薔薇水枕邊一紙明月人千里
宿酒初醒全不忺梳洗檯纖指微蘸玉齒百色思
量起

戀繡衾

趙叅晦

汝羌

柳絲空有千萬條繫不住溪頭畫橈想今宵也對新

月過輕寒何處小橋 玉簫臺榭春多少溜啼紅臉
霞未消怪別來胭脂滿傳被東風偷在杏梢

又

蕭大山

山則則山

倚闌閑看燕定巢舊彈箏因病久拋畫不盡殘眉黛
被東風吹在柳梢 曉來暗理傷春曲把金釵枕畔
細敲書寄與天涯去并相思紅淚一包

又梅

趙白雲

江烟如霧水滿汀早梅花偏占淺清倚翠竹寒無力
想瀟湘斜日暮雲 幾回夢斷陽春面問百花猶隔
幾塵趁月夜霜風峭約綠鸞同載玉笙

又

趙雲洞

迢迢江路日又曛為春遲長是怨春小立馬千林下
寄寒香歸贈故人相逢細說經年恨早匆匆吹散
霽雲笑惆悵芳菲事粉蝶知應自斷魂

又

全前

江南烟水幾萬重記玉人花底舊容待欲寄飛鴻信
望前山夕照冷紅塞笳月下聲淒楚怨百花春事
夢空倩誰共東君說把陽和分付朔風

伊州三臺令

楊東窓

韶父
季和

水村月淡雲低為愛寒香晚吹瘦馬立多時是誰家

芳舍竹籬 三三兩兩芳蕤未放瓊鋪雪堆只這一些兒勝東風千枝萬枝

烏夜啼

潘紫巖

坊庭堅

無端小雪廬纖入平簷金鴨旋添龍餅莫開簾尋梅約開還落可曾快合作一年春恨上眉尖

又

題月海星天觀即宋式所居故地

鄭幼霞

熏初

春江一望微茫辨梳檣無限青青麥裏菜花黃今古恨登臨淚幾斜陽不是寄奴住處也淒涼

拋毬樂

李子我肩吾

風冒鶯紅雨易晴病花中酒過清明倚窓幽夢亂於

柳羅袖淚凝似錫冷地思量著春色三停早二停

如夢令

王師錫

竹上一樓嵐翠竹下一渠春水中有隱人居破屋數間而已無事無事靜夜月明千里

又

楊季和

涼月薄陰猶殢紅豆一枝秋思門外幾重山山外行人千里歸未歸未又是菊花天氣

醉太平

徐叔柔

夢龍

冰肌玉容情真意濃小樓幾度春風醉琉璃酒鐘關山萬重何時又逢思量雨蹟雲踪似裏王夢中

憶王孫

趙君舉

日長高柳一蟬聲
翡翠簾深寶箆清
夢遠春雲不散
情曉風輕玉口花飛宿雨晴

楊柳枝

前人

浙浙西風生
莫寒繡衣單
碧梧葉落藕花殘
恨前歡
月銑虛櫺烟逗竹
夢千山
玉簫清夜憶孤鸞
鎮長閑

昭君怨

楊誠齋

昨夢扁舟花底香
滿西湖烟水急
雨打蓬聲夢初驚
却是池荷跳雨散
了真珠還聚聚
作水銀渦瀉清

波

長相思

孫肖之

雲一窩玉一梭
淡淡春衫薄薄羅
輕鬢雙黛蛾
風聲多雨聲和
窓外芭蕉三兩窠
夜長人奈何

又

譚明之

去路遙歸路遙
燈月光中立小橋
魂縈紫玉蕭
風蕭蕭雨蕭蕭
此夜相思空寂寥
梅花落麗譙

又

淨亭亭步盈盈
蟬影明綃傳體輕
水邊無限情
翠尊傾翠環傾
歸去如何睡得成
西風吹酒醒

又

楊季和 韶文

溪水清溪水渾溪上人家數畝園垂楊深閉門 青
羅裙白羅裙採盡青蘩到白蘋江南三月春

望江南

陳東甫

芳思遠南苑惜春時翠柳枝柔金笛怨碧桃花老玉
笙悲風日正遲遲

又

趙君舉

新夢斷久立暗傷春柳下月如花下月今年人憶去
年人往事夢中身

又

趙行可

時行
石洞

霜月濕人睡，接連秋驚覺。夜深兒女夢，漁歌風起白蘋洲。別岸又潮頭。

謁金門

曾子實

梅粉褪點點，雨聲春恨半吐。桃花芳意嫩，草痕青寸寸。把酒花邊低問，莫解寒深紅損。等待春風晴得穩，琵琶重整頓。

又

譚明之

銀漏滴午夜，平康巷陌雙掩。獸鐸人語寂，餘香無處覓。回首舊游蹤跡，紺碧染衣猶濕。一餉沉吟誰會得，月明春店笛。

又

人病酒生怕日高催繡昨夜新翻花樣瘦旋描雙蝶
湊閑凭繡牀呵手却說春愁還又門外東風吹綻
柳海棠花厮勾

菩薩蠻

趙君舉

閑庭草色侵堦綠瑣窓午夢人如玉拋枕出羅幃風
吹金縷衣怨春風雨惡二月桃花落雨後縱多晴
花休春不成

又

蕭體仁

斷紅流水香難覓行雲一去無蹤跡楊柳漫遮闌闌

愁付遠山 玉笋彈未了倚柱人空老青子摘來酸
酸心有幾般

又

郭□□

賣飴天氣簫聲軟午院水沈烟未斷睡起補殘眉紅
綿入鏡遲 霎時開笑靨花上看雙蝶新月上簾鉤
相思不斷頭

浣溪沙

周伯弼

撲撲精神的的香茶蘼一朵曉來粧雛鶯葉底學宮
商 著意勸人須盡醉扶頭中酒又何妨綠窓花影
日偏長

又

黃同武

時龍
野橋

雨歇花梢月正明
映簾人靜繡燈昏
鴛鴦成字便停針
笑啟玉奩明酒暈
緩尋金葉熨香心
一春情緒此時深

又過高却

譚明之

欲展吳牋咏杜娘
為停楚棹覓秦郎
藕花三十六湖香
珠顆翠藥饒宿淚
玉痕紅褪怯晨粧
小橋風月思淒涼

又

王敬子
大簡

拂面涼生酒半醒
蘆纖小雨晚初晴
過雲無定月虧

盈庭戶不闌春悄悄
闌干倚遍夜深深
幾回風竹
誤人聽

又

曾子隆

原隆
月朋

落日蒸紅山欲燒
短筇行藥過山腰
松聲隱隱晚來潮
矮樹依岩無敗葉
梅花當路少全梢
水村時有
短長橋

又

趙退齋

笑摘青梅傍綺疏
數枝花影漾前除
太湖石畔看金魚
筍指曉寒慵出袖
翠鬟春懶不成梳
為君縫狹
繡羅襦

月夜記
搗練子

無名氏

偏回戲最風流斗帳金猊暖不收
一陣蜜蜂狂絮裏
酒酣眠折玉搔頭

又

初酒醒乍衣單褪著裙兒側著冠
門外小橋寒食夜
月明人去杏花殘

棲心月

柳下爭拏畫槳搖水痕不覺透紅綃
月明相顧羞歸
去都坐池頭合鳳簫

又

手把新荷葉一枝喚來池上只愁歸流螢裏在紅紗
袖忽到持盃个个飛

又

新著生紅小舞衣案前磨墨誤淋漓含嗔逗晚不梳
洗背面牙床喫荔枝

陽春白雪卷第六終

陽春白雪卷第七

臨漢 趙 聞禮 立之選

憶舊游慢

趙虛齋

賦東湖荷花再用方時父韵

望紅蕖影裏冉冉斜陽十里隄平喚起江湖夢向沙
鷗住處細說前盟水鄉六月無暑寒玉散清水笑老
去心情也將醉眼鎮為花青 亭亭步明鏡似月浸
華清人在秋庭照夜銀河落想粉香濕露恩澤初承
十洲縹緲何許風引綵舟行尚憶得西施餘情裊裊
烟水汀

霓裳中序第一 木利咏

伊梅津

青顰粲素靨海國人偏耐熱餐盡風香露屑便萬里
凌空肯憑蓮葉盈盈步月悄似憐輕去瑤闕人何在
憶渠癡小點點愛輕艷 愁絕舊遊輕別忍重看瑣
香金蓮淒涼清夜簟席杳杳詩魂真化風蝶冷香清
到骨夢十里梅花霽雪歸來也厭厭心事自共素娥
說

花心動

得於江西歌者
而不知名氏

粉堞雲齊度清茄愁入暮烟林杪素艷透春玉骨淒
涼勾帶月痕生早江天莽蒼黃昏後依然是粉寒香

瘦動追感西園嫩約夜深人悄 記得東風窈窕曾
夜踏橫斜醉携嬌小惆悵舊歡回首俱非忍看綠牋
紅豆香銷紙帳人孤寢相思恨花還知否夢回處霜
飛翠樓已曉

江城梅花引

比世傳本差異
而不知名氏

娟娟霜月冷侵門怕黃昏早黃昏手撚梅花無語對
芳尊酒又不禁愁未醒斷魂遠一更更斷魂 斷
魂斷魂空斷魂被兒裏香半溫睡也睡也睡不穩誰
與溫存惟有窓前殘燭照啼痕深夜不眠聽畫角人
瘦也比梅花瘦幾分

又使北時和
李漢老

洪忠宣公

去年湖上雪欺梅月飛來片雲開雪月光中無處認
樓臺今歲梅開依舊雪人如月對花口還有誰一
枝兩枝三四蕊想西湖今帝里綵牋爛綺孤山外目
斷雲飛坐久花寒香露濕人衣誰作叫雲橫短玉三
弄微對東風和淚吹

又

無名氏

對花時節不曾收見花殘任花殘小約簾櫳一面受
春寒題破玉牋雙喜鵲香燼冷遠銀屏渾是山待
眠未眠事萬千也問天也恨天髻兒半偏繡裙兒寬

了還寬自取紅氍重坐暖金船惟有月知君去處今
夜月照秦樓第幾間

又

趙顥菴

單口寒引畫龍聲雨初晴月微明竹外溪邊低見一
枝橫澹月踈花三四點春尚淺早相看似有情夜
永袖冷暗香凝恨半銷酒半醒靚粧照影未忺整雪
艷冰清只恐不禁愁絕易飄零待得南樓三弄徹君
試看比從前更瘦生

蘭陵王

陳抑齋

角聲切何處梅梢弄雪還鄉夢玉井樓前千朵芙蓉

揅空碧隣翁問消息為說紅塵倦客應憐笑弓劍旌
旗底事留人未歸得 淮山舊相識記急處笙歌靜
裏鋒鏑隋堤楊柳猶春色嗟十載人事幾番碁局青
油年少已鬢白漫惆悵京國 朱墨困無力似病鶴
樊籠老驥羈勒夕陽不繫棲林翼待添竹東園種松
西陌功名休問吾老矣付俊傑

又 和清真

葉漁村 士則

大堤直嫋嫋游雲蘸碧蘭舟上曾記那回拂粉塗黃
弄春色施顰託傾國金縷尊前勸客陽臺路烟樹萬
重空有相思寄魚尺 飄零歎萍跡自懶展羅衾羞

對瑤席折釵分鏡盟難食者桃葉迎笑柳枝垂結萋
萋芳草暗水驛斷腸畫闌北寒惻淚痕積想柱鴈
塵侵籠羽聲寂天涯流水情何極悲沈約寬帶馬融
怨笛那堪燈幌聽夜雨鎮暗滴

又賦胡伯雨別業

劉賓王

此何夕天水空明一碧商量賦如此江山幾箇斜陽
了今昔荒臺步晚色沙鳥依稀曾識啼鶻外人遠未
歸江濶晴虹卧千尺殘碑蘚痕積記當日清游夫
君題墨碧瑤仙去蒼雲隔飛一鏡秋冷列屏天遠鷄
聲人語半郊邑寄情又江國愁寂怕聞笛正怨苦

溪猿飛倦汀翼陰陰翡翠迷津驛慨世事塵化吾心
形役清吟孤往渺醉影夜翠濕

玲瓏四犯

重過南樓用
白石體賦

譚在菴

宣子
明之

碧黯塞榆黃銷堤柳危闌誰料重換才情猶未減指
點驚如許當時共伊口顧為辭家怕吟鸚鵡衮衮波
光悠悠雲氣陶寫幾今古生塵每憐微步渺江空
歲晚知在何處土花封玉樹恨極山陽賦吹鄉扇底
餘歡斷怎忘得陰移庭午離別苦那堪聽敲窓凍雨

又

劉藥房

之才
賓王

幾疊雲山隔不斷闌干天外凝眺秋與愁并梧逕雨

痕先表嬌夢半握芙蓉奈曲曲翠屏深窈問愁根當年誰種漠漠淡烟衰草鴛鴦懶拂蘋花影記眉嫵
縈情多少轆轤玉虎牽絲轉聽盡秋釭曉真誰念卧雲衣冷香壓金蟾小寫新詞先寄江鴻歸去且教知道

水調歌頭

利碧澗 登

日月換飛澗風雨老孤松千巖萬壑秋重白氣接長空一笑掀髯徐起蒼珮腰間相照猶自湧晴虹桑海幾番覆人尚醉春風橫白石結綠綺送飛鴻十年夢事消歇長劍吼青龍却笑人間多事一蝨蝸涎光

景顛倒死英雄雲日空濛裏玉鶴任西東

洞仙歌

全前

弄香吹粉記前回酒困綠露沉沉轉花影翠簾深隱
隱紅霧依人荷月靜新樣雙鸞交映如今誰念省
短雨長雲曾託琵琶再三問最苦綠屏孤夜久星寒
無處頓風流心性又莫是偷香寄韓郎到漏泄春風
一枝花信

揚州慢

和趙虛齋瓊花

鄭覺齋

弄玉輕盈飛瓊淡埽襪塵步下迷樓試新粧纔了炷
沉水香球記曉剪春冰馳送金餅露濕綈騎星流甚

天中絕色被風吹夢南州
尊前相見似羞人蹤跡
萍浮問弄雪攀枝無雙亭上何日重游我欲纏腰騎
鶴烟霄依舊事悠悠但憑闌無語烟花三月春愁

念奴嬌

全前

捲簾酒醒怕無言慵理殘粧啼粉記綰同心雙繡帶
珠箔青樓花滿琢玉傳情斷金訂約總是愁根本誰
知薄倖肯於長處尋短舊日掌上芙蓉新來成刺
變却風流眼自信華年風度在未怕香紅春晚恩不
相酬怨難重合往事冰澌泮分明訣絕股釵還我一
半

洞仙歌

胡蒙泉

半欄花雨是夜來凭處夢過溪橋逢柳住亂鶯聲殘
酒醒正是闌情山枕上吟就回紋錦句歸鴻應別
浦綠漲瀾茫早近湖陰喚船路覽芳菲歌窈窕獨立
莎根剩一掬閑情淒楚□欲待折微馨寄相思又生
怕相思帶將春去

滿庭芳

全前

愁徹檐花吟枯硯海日長多費茶烟懷芳心苦持此
過年年雨外飛紅何許應流到米綠洲邊銷凝處別
離情緒正是海棠天吹花題葉事如今夢裏記得

依然料歸來鶯居春後燕占人先誰念文園倦客琴
空在懶向人彈愁何極楚天老月偏是到窓前

驀山溪

劉菊房

醉魂離夢捻合難成片惡味怕黃昏更西風梧桐深
院蟬鬆翠嫵記那日相逢情繾綣語玲瓏人靜凌波
見香雲曾約念阻題紅怨應是綠窓寒也思郎雲
衣誰換郎今銷黯步楚竹江空雲縹緲水瀾茫不抵
相思半

又

史可堂

危欄看月番做聽秋雨一滴一聲愁似相伴離人悲

苦籠香袖冷獨立倚西風紅葉落菊花殘都是闌情
處如何排遣賴有高陽侶長嘯酒壚邊且同賦秋
娘詞句山翁醉矣一笛小樓空思往事者孤雲日斷
征鴻去

聲聲慢

五日

劉藥房

湘雲織玉楚萼萼香深蘭簾幙風靜怨抑難招沈魄
當年獨醒莫唱江南古調念天涯深情誰省時暗換
最秦樓惆望歸期無定曾是榴裙誤寫怕照眼枝
頭絳綃花並巧篆盤絲午鏡綠窓闌影香蒲也應細
剪但年年斷雲愁冷迎醉面看銀蟾飛浴露井

又和陸景思黃木香

史可堂

羞朱妬粉染霧裁雲澹然蒼珮仙裳半額蜂粧莫道
梳洗家常碧羅亂縈小帶翠蛟寒一架春香清思苦
倚晴嬌無力如待韓郎密幄籠芳吟夜任露沾輕
袖月轉空梁弱骨柔姿偏解勾引詩狂遺鈿碎金滿
地恨無情風送韶光閑畫永看青青垂蔓過牆

過秦樓

曾月朋
棟子隆

曙色開晴輕颼數暖日影才經簷角倦來芳徑且倚
闌干觸地新愁粘著長日如年可堪恨雨絲絲夢雲
漠漠見鳴禽遶響乳鶯梳翅癡愁方覺凝望處初

綠呈新陳柯折舊忘了一春歸却不傷花老只怕花
開解使朱顏銷鑠寶扇輕搖亂拋花片教飛迎風低
掠忍重携素手驟覺一分瘦落

又

利碧澗

眉黛山分靨朱星合郁郁夜堂初見芙蓉寄隱豈
傳香便許翠鬟偷剪迎夜口羞欲晨先怯風流口口
未慣正流蘇帳掩綠玉屏深紅香自暖誰信道媚
口難留驚雲易散從此三橋路遠巢燕春歸剪花詞
在難寄紅題一片料想伊家如今羞傍琴窓慵題花
院但碧桃影下應對流紅自歎

齊天樂

全前

淡雲荒草秋汀莫歸心又寒烟水論檻移花量船載
酒寂寞當年情味孤蓬夜閉聽四壁松聲欲高還細
似近如遙露鴻聲亂楚天外藍橋人斷歲久舊家
曾共賞九華花事艷雪初融生香自暖消得金蓮帖
地相思破睡謾一點琴心暗闕千里愁怯潮生曉帆
風又起

又和翁時可悼故姬

曹松山 達

翠簫聲斷青鸞翼心期口釵誰表夜燭銀屏春風粉
袖猶記琵琶斜抱瑤池路香恨巫女回雲月娥沉照

謾說蓬萊玉環花貌夢難到
巖花亭院乍冷更蛩吟風碎
鴻飛烟渺綠玉彈碁紅牙按拍
樂事歡情終少劉郎未老要鬢
翼堆玄腕酥凝皓莫忘香口綠羅
裙帶草

又

柴秋堂望

淒淒楊柳瀟瀟雨情牕怎禁滴瀝
思裏傳蛩愁邊落鴈多少東吳山
色知他恨極料為我窓前強鳴刀
尺竟日西風那堪無寐更隣笛黃
花開偏未也花開應笑我年少難
覓灞上長安口口渭水都把韶華
暗擲何人碎壁尚衰草連天莫烟
凝碧怕說相思撼楓

喧夜寂

徵招 梅

李草堂

翠壺浸雪明遙夜初疑玉虬飛動莫弄紫簫吹墮寒
瓊驚夢把紅爐對擁怕清魄不禁霜重愛護殷勤待
長留作道人香供 塵暗古南州風流遠誰尋故枝
么鳳謾舉目銷凝對愁雲矇眊向霞扉月洞且嚼蕊
細開春蜜這奇絕好喚蒼髯與竹君來共

賀新郎

憶鶴

劉葯房

蒼蘚粘溪路悵山君翛然羽化夢口何許曾約秋雲
縈客袖舞傍吟臯硯塢矯清唳裂穿雲宇江碧空濛

無處問問孤山梅底人知否烟夜永耿心語 瑤華
一去成幽阻倚脩篁抱琴愁絕天寒日莫城郭悲歌
華表恨此事銷凝千古有招隱小山能賦蕙帳空兮
誰夜怨筭課騷讀易俱淒楚步深窈墮松露

賀新郎

袁宣卿

曉色明窓綺篆煙銷寒生翠幄烏啼人起昨夜西園
新雨過細草閑花似洗漾藍影柳塘春水晴晝雙飛
歸來燕正東風緩緩臨桃李還又是醉天氣 回廊
小院簾垂地恨連天芳草淒迷短長亭外愁到春來
依然在舊事還如夢裏又生怕人驚憔悴何處樓頭

吹羌笛向曲中說盡相思意三弄罷寸心醉

鳴梭

自度

譚明之

織綃機上度鳴梭年光容易過
縈縈情緒似水烟山霧兩相和
謾道當時何事流盼動層波
正影嵯峨翠屏牽薜蘿
不須微醉自顏酡如今難
怎麼燭花銷艷但替人垂淚
滿銅荷賦罷西城殘夢猶問
夜如何星耿斜河候蟲聲更多

解連環

姑蘇懷古

奚秋厓

霽鬟新掠正風回浪影時
搖城脚歎天涯春草無倫
似凝竚當時柳顰花弱步
錦珠沈謾一瞬千年如昨

信龍樓鳳閣無奈都由笑歌休却 斜陽柳邊自落
聽幽禽兩兩沙際停泊道世間多少閒愁總輸與扁
舟五湖遊樂便買蓑衣又生怕魚龍風惡把從前萬
事對酒且休問著

瑞鶴仙

曹松山

爐烟銷篆碧對院落秋千晝永人寂濃春透花骨正
長紅小白暈香塗色銅駝巷陌想遊絲飛絮無力念
繡窓深鎖紅鸞虛度禁烟寒食 空憶象牀沈水鳳
枕屏山瑞歡尤惜粉香狼籍海棠下東風急自秦臺
蕭咽漢皋珮冷斷雨零雲難覓但杏梁雙燕歸來似

曾舊識

又

余樵隱

玠義夫

怪新來瘦損對鏡臺霜華零亂鬢影胸中恨誰省正
闕山寂寞莫天風景韶裹漸冷聽梧桐聲敲露井可
無人為向樓頭試問塞鴻音信爭忍勾引愁緒半
掩金鋪雨欺燈暈家僮困臥呼不應自高枕待催他
天際銀蟾飛上喚取嫦娥細問要乾坤表裏光輝照
予醉飲

又和丁基仲

得趣居士周氏

畫樓簾捲翠正柳約東風搖蕩春霽細桃雨才洗似

粧臨寶鏡脂凝鉛水雲偏髻子墜釵梁羞有燕壘最
堪憐錦繡香中早有片紅飄砌 閑記琴彈古調曲
按清商舊年時事屏山畫裏江南信夢中寄感春濃
懷抱午醒初解淺酌依然又醉傍闌干猶怯餘寒倦
和袖倚

疎影 催梅

施芸隱 知言

低枝亞實望翠陰護曉幽夢難覓淒楚霓裳瓊闕瑤
臺經年暗鎖清逸春風似怪重門掩未許入玉堂吟
筆想壽陽却厭新粧倦抹粉花宮額 還記孤山舊
路未應便負了波冷蟾白莫寄相思惟有寒烟伴我

騷人閑寂東君須自憐疎影又何待山前雪積好試
敲口口聲催與約畝羹消息

翻香冷

鄔文伯

醉和春恨拍闌干寶香半爇倩誰翻丁寧告東風道
小樓空斜月杏花寒夢魂無夜不闌山江南千里
霎時間且留得鸞光在等歸時雙照淚痕乾

摘紅英

趙參晦

東風冽紅梅折

食列切

畫簾幾片飛來雪銀屏悄羅裙

小一點相思滿塘春草

空愁切何年徹不歸也合

分明說長安道簫聲闌去時驄馬誰家繫了

夢江南

前人

簾不捲細雨熟櫻桃
數點霽霞天又晚
一痕涼月酒初消
風緊絮花高
間處少磨盡少年豪
昨夢醉來騎白鹿
滿湖春水段家橋
濯髮聽吹簫

秋蕊香令

黃乙山

花外數聲風定
烟際一痕月淨
水晶屏小
歌醉枕院
靜鳴蛩相應
香銷斜掩
青銅鏡背
燈影寒砧
夜半和鴈陣
秋在劉郎綠鬢

夜行船

黃野橋

十四弦聲猶未斷
星月上西牆一半
却手休彈
含情

微妬報道春宵短 銀燭紗籠須早辦 不住地金蕉
催勸別院人歸小窓燈靜自把花枝看

虞美人

前人

捲簾人出身如燕燭底粉粧明艷羯鼓初催按六么
無限春嬌都上舞裙腰 畫堂深窈窕曾見宛轉楚
波如怨小立花心曲未終一把柳絲無力倚東風

鬪雞回

夾鍾商

杜龍沙

鶯啼人起花露真珠洒白苧衫青驄馬繡陌相將鬪
雞寒食下 回廊暝色惜惜應是待歸來也月漸高
門猶亞悶別銀缸漏聲初入夜

踏莎行

前人

波暖芹汀風香蘭圃清塵幾點茸茸雨畫船絲竹載
梁州綵旗繩板歡游女脩禊初三禁烟百五年華
恰到風流處一生只許百回春一回春到休輕負

又

無名氏

殢酒情懷恨春時節柳絲巷陌黃昏月把君團扇卜
君來近牆撲得雙蝴蝶笑不成言喜還生怯顛狂
絕似前春雪夜寒無處著相思梨花一樹人如削

鷓鴣天

全前

題得相思字數行起來桐葉滿紗窓秋光欲雨暮聲

瀉粉帳口容花露香 新寂寞舊疎狂玉爐消息記
錢塘小閣立偏紅蕉樹一帶殘雲起月黃

又

胡蒙泉

六曲銀屏夢隔雲半分鸞影匣生塵別來可是春愁
覺試著輕衫不貼身 風月夜短長亭也須聞得子
規聲歸時莫看花梢上但看芳洲綠口深

又

利碧澗

鳳尾鬟香再疊梳藕絲衫嫩感雙魚閑收未利熏藤
枕自揀芙蓉遶翠幙 新浴後淺粧初衛夫人帖學
行書西牕一霎黃昏雨笑問新涼飲酒無

詞金門

杜龍沙

階露重浥透尋花雙鳳
天色清明風不動薄衫金絡
縫
午枕高雲斜縱一覺風流
春夢起看翻翻簾影
弄夕陽歸燕共

又

李仲敏
好古

花過雨又是一番紅
素燕子歸來愁不語舊巢無覓
處
誰在玉闌勞苦誰在玉樓歌舞
若使□塵吹得
去東風侯萬戶

又

無名氏
趙參晦

羞說起嚼破白桃花
蕊人在夕陽深巷裏
燕兒來也

未一樣半紅半紫雙鳳同心結子分在即邊郎不
記為郎今拆碎

又

陳雲厓

春晝永接葉鳴禽相應風定落紅香一逕踈踈窓竹
影寂寞年時酒病遠笛悠悠吹醒闌上層城天又
暝雲山青不盡

又

鄭覺齋

夜秋永葉葉梧桐霜冷皓月窺人深院靜孤鴻窓外
影情是相思深井思是相思脩綆別後信音渾不
定銀瓶何處引

又

李蟾洲

花似匝兩點翠娥愁壓人又不來春且恰誰留春一
霎消盡水沉金鴨寫盡杏牋紅蠟可奈薄情如此
點寄書渾不答

菩薩蠻

劉小山

去時滿地花陰月歸來落盡梧桐葉簾外小梅殘綠
窓幽夢寒明朝口玉勒又作江南客芳草徧長亭
東風吹恨生

又

許東溪
介三

西風又轉蘆花雪故人猶隔闕山月金鴈一聲悲玉

腮雙淚垂 繡衾寒不暖愁遠天無岸夜夜卜燈花
幾時郎到家

又

黃師憲 公度

高樓目斷南來翼玉人依舊無消息愁緒促眉端不
隨衣帶寬 萋萋天外草何處春歸早無語凭闌干
笙聲生暮寒

又

留積翁 元崇

江頭日落孤帆起歸心拍拍東流水山遠不知名為
誰迢遞青 危橋來處路尚帶湘瀟雨楚尾與吳頭
一生離別愁

又

劉賓王

題花曾蘸花心露當初誤結丁香樹往事小蠻窓新
愁桃葉江 緩歌留薄醉急豎人千里梅瘦月闌干
斷雲春夢寒

訴衷情

王浪洲 蒼

補成團扇繡殘工並蒂瑞芙蓉花心欲就針折頻玉
唾殘茸 尋斷緒怨西風寂寥中兩般時候舊月新
霜曉角昏鐘

阮郎歸

無名氏

薄羅生色畫酴醾酴醾滿架時隔池貪看燕爭泥墜

雙紅荔支 銷金字晚唐詩
夾紗團扇兒自遮微雨
傍花歸個情天得知

又

宋德廣

好風吹月過樓西
樓前人影稀
杜鵑啼斷綠楊枝
行人知不知
紅葉字斷腸
詩從今懶再題
後園零落
淡胭脂似君初去時

畫堂春

朱堯章

綠窓睡起小粧殘
玉釵低墮雲鬟回
紋衾寄見伊難
心緒闌珊
翠袖兩行珠淚
畫樓十二闌干
銷磨今古
霎時間恨殺青山

南鄉子

前人

花柳隔重扃，送過秋千笑語聲。
檐鵲也嗔人起晚，天晴孤負東風。
趁踏青，細細研紅綾，小字相思寫不
成。心上可人雲樣遠，寒盟只恐恩情薄，似雲

朝中措

王寧翁

玉

楊花繞畫暖風多，晴雪點池波。
戲數翠萍幾靨，零星未礙圓荷。
軟人天氣，半如溽暑，半似清和。
說與香篝，溫火酒痕，梅却衣羅。

青門怨

月痕烟景遠，思孤影、舊夢雲飛離魂。
冰冷脉脉恨滿。

東風對孤鴻 翠銖塵冷香如霧人何許心違章臺
絮夜深酒醒燭暗獨倚危樓為誰愁

少年游

胡伯雨

曉鶯聲脆雨花乾倦枕夢初殘衣漬香留窓深紙暗
把鏡近檐看 斷雲壓損溪橋柳花遲雪闌斑深倚
屏根閑敲詩字酒醒悵春寒

柳梢青

羅子遠

倚
澗谷

萼綠華身小桃花扇安石榴裙子野聞歌周郎顧曲
曾惱夫君 悠悠羈旅愁人似飄零青天斷雲何處
消魂初三夜月第四橋春

更漏子

全前

晚潮生涼月細一抹遠山無蒂收越棹起吳檣人間
何限忙石頭城西北角杳杳天低鶻落渾不似此
波光清歌催夕陽

又

王敬子

夢期疎書約誤腸斷夜窓風雨燈暈冷漏聲遙酒消
愁未消想天涯芳草碧人與芳春俱客憑杜宇向
江城好啼三兩聲

少年游

趙君舉

曉山日薄半春陰烟暖柳昏金滿眼新晴歌聲樵影

悠蕩碧雲心 閑庭客散人歸去疎雨濕羅襟樓閣
濛濛斷虹明處十里暮雲深

採桑子

前人

春蠶昨夜眠方起閑了羅機共採桑枝桑柘陰陰三
月時 背人佯笑移金釧惆悵花期故故留遲獨自
歸來雨滿衣

一叢花令

李蟪洲

梨花隨月過中庭月色冷如銀金閨平帖陽臺路恨
酥雨不掃行雲粧褪臂閑髻慵簪却盟海浪花沉
洞簫清吹最闌情腔拍懶溫尋知音一去教誰聽再

拈起指法都生天濶鴈稀簾空鶯悄相傍又春深

江城子令

譚在菴

嫩黃初染綠初描倚春嬌索春饒燕外鶯邊想見萬
絲搖便作無情終軟美天賦與眼眉腰短長亭外
短長橋駐金鑣繫蘭橈可愛風流年紀可憐宵辦得
重來攀折後烟雨暗不辭遙

漁家傲

仝前

深意纏綿歌宛轉橫波停眼燈前見最憶來時門半
掩春不煖梨花落盡成秋苑疊鼓收聲颿影亂燕
飛又趁東風軟目力漫長心力短消息斷青山一點

和烟遠

又

石瑤林

春入桃腮生嫵媚妝成日日行雲意貪聽新聲翻歌
指工尺字窓前自品瓊簫試玉碾鸞釵珠結桂金
泥絡縫乾紅袂從把畫圖誇絕世金蓮地六朝未識
雙鴛細

眼兒媚

柳

尹梅津

煥
字惟曉

裊裊垂楊蘸清漪明綠染春絲市橋繫馬旗亭沽酒
無限相思雲梳雨洗風前舞一好百般宜不知為
甚落花時節都是顰眉

霜天曉角

范石湖

晚晴風歇一夜春堪折
脉脉花疎天濬雲來去數枝
雪勝絕愁更絕此情誰共說
惟有兩行低鴈知人倚畫樓月

又

前人

少年豪縱袍錦團花鳳
曾是京城遊子馳寶馬飛金
鞍舊遊渾似夢鬢點吳霜重
多少燕情鶯意都瀉入玻璃甕

又梅

王子知
澡

疎明瘦直不受東皇識
留與伴春應肯千紅底
怎著

得夜色何處笛曉寒無奈口飛入壽陽宮裏一點
點有人惜

又梅

樓考父

樂

月澹風輕黃昏未是清吟到十分清處也不啻二三
更曉鐘天未明曉霜人未行只有城頭殘角說得
盡我平生

又桂

趙十洲

希彭
清中

嫦娥戲劇手種長生粒寶幹婆娑千古飄芳吹滿虛
碧韵色檀露滴人間秋第一金粟如來鏡界誰移
在小亭側

陽春白雪卷第七終

陽春白雪卷第八

臨濮 趙 聞禮 立之選

瑞龍吟

翁時靜 元龍

清明近還是遞趙東風做成花訊芳時一刻千金半
晴半兩酬春未準鴈歸盡離字向人欲寫暗雲難認
西園猛憶逢迎翠紈障面花間笑隱曲徑池連平砌
絳裙曾與濯香湔粉無奈燕幕鶯簾輕負嬌俊 青
榆巷陌蹋馬紅成寸十年夢秋千弔影鞦羅塵褪事
往憑誰問晝長病酒添新恨烟冷斜陽緊山黛遠曲
曲闌干凭損柳絲萬尺不如輕鬢

寬裳中序第一

胡蒙泉

翼龍伯雨

江郊雨正歇燕子飛來人憶別未了殘梅怨結渺野
色波光春與天接相思遼闊怕柳風吹老吟髮闌情
處滿汀芳草遮莫是鷓鴣時節一餉愁絕謾料理
新翻幾闋山尊堪共誰設夢到斷橋飛絮仍雪歲華
休省閱早霍地小園花發已辨著海棠開後獨立半
廊月

又

石瑤林

憑高快醉目翠拂遙峯相對簇千丈漣漪瀉谷愛溶
漾墜紅染波芬馥何人笑掬想溫泉初卸綃縠春風

蕩六宮麗質那日賜湯沐 雙浴繡鳬飄逐恍記展
江南數幅而今鬢邊漸鵲阮洞音稀懶訪仙躅繫船
橋畔宿聽靜夜泠泠奏曲長安遠渭流香膩暗憶曉
鬟綠

沁園春

春寒

徐西麓寶之

水榭春寒梅雪漫階竹雲墮牆數花時近也採香芳
徑舊情著處看月西窓十二樓中玉妃卧冷嬾搦
脂放海棠層隄外渺歸鴻無數江樹蒼蒼 席蓆夜
禮東皇剪蕙葉為牋當綠章道杏花三月等鶯啼曉
草口萬里口鵲鳴芳九十日春三千丈髮如此愁來

白更長江南岸正柳邊無路沙雨微茫

隔浦蓮近

翁處靜

街檐揜口翠柳顚顚清明後淚蠟堆香徑一夜海棠
中酒枝上酸似豆鶯聲驟恨軟彈箏手 搵眉袖嘶
驄過盡平蕪綠襯飛繡沈紅入水漸做小蓮離藕亭
冷沈香夢似舊花瘦欲留春住時候

玲瓏四犯

同前

窗外啼鶯報數日西園花事都空繡屋專房姚魏漸
邀新寵葱翠試剪春畦羞對酒夜寒猶重誤暗期綠
架香洞月黯小階雲凍 算春將檻卸亭鞍柳成圈

記人迎送蜀魂怨染巖花色泥徑紅成隴樓上半揭
畫簾料看雨玉笙寒擁怕驟晴無事消遣日長清
夢

燭影搖紅

海棠

同前

蜀錦華堂寶箏頻送花前酒妖嬈全在半開時人試
單衣後花面圍春競秀妬紅潮玉腮微透欲甦還墜
淺醉扶頭朦朧晴晝金屋名姝眼情空貯閒眉岫
世間還有此娉婷拚盡堂珠斗真豔可人消受倩鶯
催天香共袖冷烟庭院澹月梨花空教春瘦

解連環

劉藥房

晚雲粘濕正吳峯慘澹雨迷烟接早陡頓秋事分攜
甚連苑莫牆菊荒苔匝空濶愁鄉更天外怨鴻聲點
怕吟肩易瘳料理篝衣細認香摺銀缸半明半滅
念花營柳陣何日消歇可是凝黯蘭成為情潤才鬆
麗賦多悵洛浦溟濛漫佇想明璫鈎襪告梧桐夜深
略住夢時一霎

又

黃雙溪
廷璫

乍寒簾幕愁燈花正結又還輕落弄瘦影瓶裏梅梢
為誰綴隴頭向來新萼萬古千今算惟有別情難託
把滿郎髻綠盡付鴈聲幾度寥寞扁舟暮江舊泊

記攜觴就折烟翠猶弱漫過却歌夕吟朝問天道何時素纖重握想得文姬近更苦雲衣香薄待更闌試尋夢境夢回更惡

憶舊遊

同前

乍梅黃雨過偏倚層樓時舞垂楊暗綠知誰換似烟濃霧薄望眼偏妨昔人畫鷁無數相引入橫塘縱細切香蒲重開絳蕊懶向清觴淒涼舊遊地謾賦咸蘭成才退周郎總把芳辰誤念紗窓深靜冰簟流光鳳牋試寫新句青羽碧天長又隱隱城頭隨風鉤角斜照黃

氏州第一

鄭小山

開遍來禽春事過也江南倦客心苦料理花愁銷磨
酒病還是年時意緒寒淺香輕早一霎朝來微雨柳
曲聞鶯河橋信馬旋題新句漫道而今無賀鑄儘
腸斷滿簾飛絮說似風流除非小杜妙絕誇能賦黯
相逢俱有恨空流落江山好處猛拍闌干訴天知聲
聲杜宇

一萼紅

同前

憶燕臺正倚簾吹絮小立望郎來擻管調絲塗絃綰
髻密意曾記蜂媒空恁誤蒲裙暗約最無奈好夢易

驚回想見而今淺顰雙翠沁破粧梅 沈帶悄然寬
盡恨年時行處紅糝蒼苔前事重尋幽歡難偶鈿合
空委鸞釵這一點相思清淚做心下煩惱幾時灰數
疊蠻牋怨歌忍對花裁

雨淋鈴

杜龍沙

窓影瓏璁畫樓平曉翳柳啼鴉門巷漸有新烟東風
定人掃桐花峭寒斗減看旅鴈爭起簾葭迤斷雲多
少悲鳴數行又下遠汀沙 應是故園桃李謝送清
江一曲闌干下染翰為賦春羈嗟雙髻客舍成華繡
鞭綺柏強攜酒來覓吳娃聽扇底悽惋新聲醉裏翻

念家

塞翁吟

陳行簡坦之

遠碧秋痕瘦。楚玉恨賦。淒涼荷雨碎。泣殘粧繫愁在。
垂楊秋衣拂。疊仙艸露裁雲刀尺。猶香詩錦字。獻明
璫。肯容易相忘。思量空掩抑。分宵緩枕。終不敵涼
譙。漏長自解珮。蘭皋去後。漸消滅。香梅醞藉小杜踈。
狂年華駛水髻。影西風都付清觴。

畫錦堂

孫花翁

薄袖禁寒。輕粧媚晚。落梅庭院春妍。映戶盈盈回倩。
笑整花鈿。柳裁雲翦腰支小。鳳蟠鴉聳髻偏東風。

裏香步翠搖藍橋那日因緣
嬋娟留慧盼渾當了
匆匆密愛深憐夢過闌干猶認冷月秋千杏梢空闌
相思眼燕翎難繫斷腸牋銀屏下爭信有人真个病
也天天

風流子

木樨

翁處靜

天濶玉屏空輕陰弄澹墨畫秋容正涼挂半蟾酒醒
窓下露催新鴈人在山中一片好秋花占了重換却
西風簫女夜歸帳棲青鳳鏡娥粧冷釵墜金蟲西
湖花深窈閨庭砌曾占席地歌鐘載取斷雲歸去幾
處房櫳恨小簾燈暗粟肌消瘦帶爐烟減珠袖玲瓏

三十六宮清夢還與誰同

又

李嶺洲

雙燕立虹梁東風外烟雨濕流光望芳草雲連怕經
南浦蒲萄波漲怎博西涼空記省淺粧眉暈軟胃袖
唾痕香春滿綺羅小鶯捎蝶夜留弦索么鳳求凰
江湖飄零久頻回首無奈觸緒難忘誰信溫柔牢落
翻墮愁鄉仗玉牋銅爵花間陶寫珰釵金鏡月底平
章十二主家樓苑應念蕭郎

又

利碧澗

梨園花柳地扶殘醉曾記問妖嬈歎惹住輕烟柔絲

未改霏零疎雨膩粉先飄更低道花無三日艷柳有
一年嬌春翠未遲醉紅易失共偎香影同賞良宵
如今知何處三山遠雲水一望迢迢旁砌青鸞好在
誰送歸颿但花下紅雲尚通夕照柳邊白月自落寒
潮最是無端子規啼破寒梢

風入松

同前

斷蕪幽樹際烟平山外又山青天南海北知何極年
年是匹馬孤征看盡好花成子暗驚新笋抽林歲
華情事苦相尋弱雪髻毛侵十千斗酒悠悠醉斜河
界白日雲心孤鶴盡邊天濶清猿咽處山深

宴清都

黃雙溪

陸葉窺檐語風簾薄遞來幽恨無數牙籤倦展銀缸
細剔悄然歸旅聲傳漏閣偏長更奈向瀟瀟亂雨想
近日舞袖翻雲吟牋度雪誰顧當時翠縷吹花東
城繡陌雙燕何許香羅唾碧暗晴沙印粉甚綠重覩
藍橋鎮隔芳夢念騎省悲秋漫賦待倚闌或遇賓鴻
殷勤寄與

蘭陵王

同前

絮花弱吹滿斜陽院落秋千外無數小舟綠水溶溶
帶城郭流光漫暗覺辜却鶯呼無諾權遊地都在夢

中雙蝶翩翩度簾幕 憑誰問康樂又粉過新梢紅
褪殘萼闌干休倚東風惡憐瑟韻空在鑑容偷改青
青洲渚偏杜若故交半寥寞 漂泊鎮如昨念玉指
頻彈珠淚還閣孤燈隱隱平雲薄奈別遽無語恨深
誰託明朝何處夜漸短聽畫角

念奴嬌 菊

安晚

楚天霜曉看老來秋圃寒花猶在金闕栽培端正色
全勝東籬風采雅韻清虛幽香淡泊惟有陶家愛由
他塵世落紅愁處如海 多少風雨飄搖夫君何素
晚節應難改休道三閭曾舊識輕把

同盟索梅為友不復嬌春態年年秋後笑觀芳草蕭
艾

又

李清照

蕭條庭院又斜風細雨重門須閉寵柳嬌鶯寒食近
種種惱人天氣險韻詩成扶頭酒醒別是閒滋味飛
鴻過盡萬千心事誰寄棲上幾日寒濃簾垂三面
閒拍闌干倚被冷香消清夢斷不許愁人不起清露
晨流疎桐初引多少遊春意雲高烟斂更看明日晴
未

夜飛鵲

胡蒙泉

星橋度情處地久天長塵世無此匆忙纖雲淡蕩涼
蟾小家家瓜果口唐愁人獨無那歎紫簫易斷青翼
難將返魂何在漫空留荀令餘香忍記穿針兒女
篝塵想都暗疊損衣裳誰念才情未減老來何遜少
日盧郎柳風荷露黯銷凝羅扇練囊更銀河曲曲玉
籤點點都是淒涼

又 荷花

張船窓 艾

霓裳按歌地涼影參差還是珮解江湄滄波正洗襪
塵恨流霞空沁鉢衣盈盈半輸笑向朱闌凝佇欲訴
心期碧筒喚酒恐嬌娥來下瑤池未許西風吹斷

環步障千重鎮護金猊落晚文禽點鏡分香竊翠却
念幽羈綠雲驚散暗傷情不似芳時待清歌招些憐
心問的水香舟移

解語花

同前

輕雷殷殷小枕驚回簾影搖口庭戶嫩涼遙度江雲
墮結作西窓暗雨閒堦靜佇歎疎袂愁寬一縷憑畫
闌潤葉鳴條總是安秋處因喚扁舟晚渡漸聞歌
招得采菱儔侶臨平歸路花無數應識汀洲倦旅飛
紅怨莫長趁得斷鴻南浦閒枕食誰更無聊應最憐
紈素

瑣窓寒

黃雙溪

駐馬林塘還尋舊迹雨收秋晚殘蕉映牖強把碧心
偷展記相逢畫堂宴開亂花影入簾初倦正小池漲
綠絲綸曾試事隨鴻遠淒斷情何限料素扇塵深
怨娥碧淺清宮麗羽漫有苔牋題滿問低牆雙柳尚
存幾時艷燭親共剪但凝眸數點遙峯春色青如染

齊天樂

同前

十年漠上東風夢依然淡烟鶯曉繫馬橋空維舟岸
易誰識當時蘇小籌花闌草任波斜陽絮迷芳島
笑底歌邊黛娥嬌聚怕歸早京塵衣袂易染舊遊

隨霧散新恨難表燕子朱扉梨英翠箔留得春光多
少暗絲漫繞料帶角香銷扇陰詩香口倚秋千片雲
天共渺

齊天樂

庚戌元夕都下遇趙立之

丁元隱默

倦雲休雨風還作交相醒花蘇柳字滿吟仄痕添坐
席贏得新愁癡守歸期未有負小院移蘭故園嘗韭
謾道春來沈腰惟覺似秋瘦燒燈時候是也楚津
留野艇曾趁芳友問口賒晴憑春買夜明月添香解
酒知別久悵帝陌論心客塵侵首戲鼓聲中舊情猶
在否

真珠簾

徐

落紅幾陣清明雨，憶花期半被晴慳。寒阻新柳著春
濃，早翠池波妬粉。雨香雲消息遠，漫舊日秋千庭宇。
凝佇正春醒，簾外一聲鶯語。塵鎖寶箏弦柱，自眉
峯惹恨六么慵舞。深院不成粧，有淚彈誰與記得。踏
青歸去後，細共說花陰深處。心忡怕當時飛燕知人
分付。

蘭陵王

雨中登龜谷
乾元寺閣賦

曹松山

杏花坼烟柳，藏鴉翠陌。蘇堤上人正踏青，嫩草茸茸
祠襯羅袂。遊絲挂晴塔，千里酣紅艷。白秋千外，嬌靨

笑春一片笙簫綺霞碧 阿香妬傾國把鏡口深奩
絲雨愁織崇桃積李無顏色但蝶粉香清燕泥芹冷
紫錢芳暈翳寶瑟悵還近寒食 岑寂恨無極更酒
驛孤烟暮院長日梨花滿地春狼籍望鳳闕波渺燕
樓雲隔凭闌干晚吟袖濕但笑拍

祝英臺近

蘇竹里

結垂楊臨廣陌分袂唱陽關穩上征鞍目極萬重山
歸鴻若到伊行丁寧須記寫一封書報平安 漸春
殘是他紅褪香收綃淚點斑枕上盟言都做夢中看
銷魂啼鴉聲中楊花飛處斜陽下愁倚闌干

又木樨

張東之 謫

寶熏濃雲幄重瑤葉麗金蕊黛綠蜂黃秋態未憔悴
繡簾深院黃昏著香無處人欲睡為花重起 月如
水別有天外樓臺玲瓏異塵世翠袖生寒祇欠素娥
倚何如倩取西風吹將歸去為添在廣寒宮裏

鶯啼序

徐西麓 昴夫

荼蘼一番過雨洒殘花似雪向清曉步入東風細拾
苔砌餘靨有數片飛霑翠柳紫迴半著雙歸蝶悄無
人共立幽禽昵昵能說 因念年華最苦易失對春
愁暗結歎自古曾有佳人長門深閉脩潔寄公弦千

言萬語悶滿眼欲彈難傲靠珠櫳風雨微收落花時
節春工漸老綠草連天別浦共一色但暮靄朝烟
無際盡日目極江北江南杜鵑叫裂此時此意危魂
默默渭城客舍青青樹問何人把酒來看別思量怎
向遲回獨掩青扉夕陽猶照南陌春應記得舊日
踈狂等受今磨折便永謝五湖烟艇只有吟詩曲瑤
煎茶小窓眠月春還自省把融和事長留芳畫人間
世與羈臣恨妾銷離惻自題蕙葉回春坐聽蓬壺漏
聲細咽

應天長

蕙堤春晚

張梅深

梁成子

曙林帶暝晴靄弄霏鶯花未認遊客草色舊迎雕輦
蒙茸暗香陌秋千架間曉索正露洗繡鴛痕窄費人
省隔夜濃歡醒處先覺重過湧金樓畫舫紅旌催
向段橋泊又怕晚天無準東風妬芳約垂楊岸今勝
昨水院近占先春酌恁時候不道歸來香斷燈落

又 平湖秋月

候蛩探暝書鴈寄寒西風暗剪綃織報道鳳城催鑰
笙歌散無蹟冰輪駕天緯逼漸款引素娥游歷夜粧
靚獨展菱花淡綯秋色人在湧金樓漏迴繩低光
重袖香滴笑語又驚棲鵲南飛傍林闌孤山影波共

碧向此際隱逋如識夢仙遊倚遍霓裳何處聞笛

又 斷橋殘雪

麓澌涸曉篙水漲漪孤山漸卷雲簇又見岸容舒臘
菱花照新沐橫斜樹香未北倩點綴數梢疎玉斷腸
處日影輕消休怨霜竹 簾上湧金樓酒灩酥融金
縷試春曲最好半殘鴉鵲登臨快心目瑤臺夢春未
足更看取洒窓填屋滿橋外柳下吟鞭歸趁遊燭

又 雷峯夕照

磬圓樹杪舟亂柳津斜陽又滿東角可是暮情堪剪
平分付烟郭西風影吹易薄認滿眼晚紅先落真惟

有塔起金輪千載如昨 誰信湧金樓此際憑闌人
共楚天約準擬換樽陪月繒空卷塵幕飛鴻倦低未
泊門倒指數來還錯笑聲裏立盡黃昏剛道秋惡

又 麴院荷風

換橋度舫添柳護隄坡仙題欠今續四面水窓如染
香波釀春麴田田處成暗綠正萬羽背風斜矗亂鷗
去不信雙鴛午睡猶熟 還記湧金樓共拊雕闌低
度浣紗曲自與故人輕別榮枯換涼燠亭亭影驚艷
目忍到手又成輕觸悄無語獨撚花鬚心事曾卜

又 花港觀魚

岸容浣錦波影墮紅纖鱗巧避鳬
唼禹浪未成頭角吞舟膽猶怯湖
山外江海巾怕自有暗泉流接楚
天遠尺素無期枉誤停楫四望湧
金樓帶草帶烟縹緲際城堞漸見
莫柳敲月輕舫亂如葉濠梁興歸
未
悵記舊伴袖携留口指魚水總是
心期休怨三疊

又南屏晚鐘

翠屏對晚烏榜占堤鐘聲又飲春
色幾度半空敲月山南應山北歡
娛地空浪迹謾記省五更聞得洞
天曉夾柳橋疎穩縱香勒前度湧
金樓笑傲東風鷗鷺半相識暗數
院僧歸盡長虹卧深碧花間悵猶
記

憶正素手暗攜輕折夜深後不道人來燈細窓隙

又 柳浪聞鶯

翠迷倦舞紅駐老粧流鶯怕與春別過了禁園寒食
東風顫鑲鐵遊人眼柔帶結更喚醒羽喉宮舌畫橋
遠不認緡蠻晚棹空歇 爭似湧金樓燕燕歸來鈎
轉莫簾揭對語畫梁消息香泥砌花屑昆明事休更
說費夢繞建章宮闕曉啼處穩繫金狔雙鐙籠月

又 三潭印月

桂輪逼采菱沼漾金潛虬暗動鮫室水路乍疑霜雪
明眸洗春色年時事還記憶對萬頃葑痕龜圻舊遊

處不認三潭此際曾識 今度湧金樓素練紫窓頻
照庾侯席自與影娥人約移舟弄空碧宵風悄蠹漏
滴早未許睡魂相覓有時恨月被雲妨天也拚得

又 兩峯掉雲

暮屏翠冷秋樹赭疎雙峯對起南北好與霽天相接
浮圖現西極宮堯處雲共碧漫費盡少年遊屐故鄉
近一望空遙水斷烟隔 閒凭湧金樓漱灩波心如
洗夢淹筆喚醒睡龍蒼角盤空壯商翼西湖路成倦
客待倩寫素練千尺便歸去酒底花邊猶自看得

滿庭芳 西湖

陳月堦

嵐影浮春雲。客客雨澄泓。碧展玻璃高低。棲觀窓戶。
舞連漪。別有輕盈水面清。謳起舟葉如飛沙隄上垂。
鞭信馬柳重綠。交枝漸殘紅。倒影金波。潏灩弦筦。
催歸看。飄香陳粉滿路。扶攜不盡湖邊風月。孤山下。
猿鳥須知東風裏。年年此水貯盡是和非。

又送春

同前

榆英拋錢桃英胎。子楊花已送春歸。未成萍葉水面。
綠紋肥。沙暖溪禽行哺。忘機處。雛母相隨。重簾靜銅。
壺晝歇。聲度竹間。碁人生如意。少樂隨春。減恨為。
情離。怕牽愁勾怨。漸近金徽。浮世更相代謝。江頭明。

月渡口斜暉闊情處摩挲釣石莫遣上苔衣

梅子黃時雨

張梅深

雲宿江樓愛留人夜語頻斷鐙炷奈倦情如醉黑甜
清午謗道迎薰何曾是葦紋成浪衣成雨茶甌注新
期竹院殘夢蓮渚應誤重簾淒佇記并刀剪翠秋
扇留句信那回輕道而今歸否十二曲闌隨意凭楚
天不放斜陽暮沈吟處池草暗喧蛙鼓

繞佛閣

張船窓

渚雲弄濕烟縷際晚江國遙碧鴻過無迹怕聞野寺
孤鐘動淒惻小橋路窄疎袖暗拂衰草愁聽蛩語還

寂可堪過了。龜紗負瑤席。萼萼露華白。一夜秋牕。
驚曉色。柳影孤危。殘輝空抱葉。想搖落闌情。歸夢頻
折。物華消歇。盡倒斷寒塘幽香先減。怨紅供拒霜啼
頰。

魚遊春水

青樓臨遠水。樓上東風飛燕子。玉鈎珠箔。密密鎖紅
藏翠。剪勝裁幡。春日戲簇柳。替梅元夜醉。閒憶舊歡
暗彈新淚。羅帕啼痕未洗。愁見同心雙鳳翅。長安
十日輕寒春衫未試。過盡征鴻。知幾許不寄。蕭娘書
一紙。愁腸斷也。那人知未。

風入松

昔年心醉杜韋娘，曾格外踈狂。綠牋預約西湖上，共幽深、竹院松窓。愁夜黛眉顰翠，惜歸羅帕分香。重來一覺熟黃粱。空烟浪茫茫。如今眼底無姚魏，舊遊處都是淒涼。入扇柳風殘酒，點衣花雨斜陽。

摸魚兒

朱雪崖

對西風、鬢搖烟碧，參差前事流水。紫絲羅帶鴛鴦結，的的鏡盟釵誓。渾不記、謾手織迴紋，幾度欲心碎。安花著蒂，奈雨覆雲翻，情寬分窄。石上玉簪脆。朱樓外，愁壓空雲欲墜。月痕猶照無寐。陰晴也只隨天意。

枉了玉銷香悴君且醉君不見長門青草春風淚一
時左計悔不蚤釵荆暮天修竹頭白倚寒翠

桂枝香

施翠岩

西風滿目漸院落悄清愁近銀燭多少蟲書墮翠又
隨波穀姮娥半露扶疎影向虛檐似知幽獨浦鴻聲
斷枝烏漏永芳夢難續記舊日離亭細囑早歸趁
香邊頻泛醺醺誰遣而今對景黛蛾雙蹙玉鞭但共
秋光遠漫空憐如許金粟露零襟冷蕭蕭更魚數竿
脩竹

念奴嬌

續雪谷

砌紅慵掃問東風應念西園寥落簾捲垂楊鶯轉巧
才見還口飛却撚指光陰闕心節序總在秋千索翻
翻雙蝶傍人爭趁行樂 曾記步月歸來秦箏彈徧
共倚闌干角別後池亭誰闌草多少芳游搭閣世事
升沈人生聚散俯仰空如昨餘香猶在繡幃清曉寒
薄

沁園春

陳行簡

睡起聞鶯捲簾微雨黃昏遞愁正青翰音斷離懷幾
摺碧雲莫合十里雙眸思發花前人歸鴈後誤記歸
帆天際舟渾無據但餘香繞夢頻到西樓 風流翻

是花讐謾長遣眉山翠不流想哀箏繞指鴻移鳳咽
殘燈背泣玉沁春柔夜月精神朝陽微艷何處瑤臺
輕駐留愁無際被東風吹去綠黯芳洲

醉蓬萊

會稽蓬萊閣懷古

吳秋厓

又扁舟東下水樹青圓雨榴紅薄燕子愁多在重重
簾幕杖屨山陰而今休更問月失眉約雙杏盟寒七
香珠墜歌塵飄泊莫倚危闌怨深黃竹一鶴歸來
亂峯飛落笑色凌波任霧抽烟邈飄渺生香地冷湘
水外片雲如削昨夜離人遊仙夢遠天風吹覺

永遇樂

同前

一鴈斜陽亂蛩衰草天淨秋遠獨立西風星星鬢影
疑被渠霜染宜修何處秋深湘水隱約數峯青淺想
而今亭亭皓月共誰倚闌淒惋 瑤箱翠襲玉奩共
剪暗裏淚花偷濺一日思量十年瘦削春色回眸減
凋鸞好在文簫重許壘酒試香庭院正銷魂餘霞散
碧暮鴉數點

宴瑤池

神仙詞

同前

紫鸞飛舞又東華宴罷歸步凝碧縹緲天風吹送處
泠泠珮聲清逸青童兩兩爭笑撚琪花半折羽衣寒
露香披翠幢珠輅去雲疾 西真還又傳帝勅霞城

檢校問學仙消息玉府高寒有不老丹容自然瓊液
人間塵夢應誤認烟痕霧跡洞雲依約開時丹華飛
素白

西江月

徐桃渚 儼夫

曲折迷春院宇參差近水樓臺吹簫人去燕歸來空
有落梅香在花底三更過雨酒闌一枕驚雷明朝
飛夢隔天涯腸斷流鶯聲碎

又

翁處靜

山色低銜小苑春雲暗宿空庭秋千無月冷雙繩閒
去盡闌人靜 一夜海棠如夢半窓銀燭多情好花

留不到清明日日陰晴無定

又

王花洲

往事星移物換舊游雨冷雲沈真娘墓草幾回青問
著寒潮不應何處芙蓉別館依前楊柳離亭東風
吹淚入重局為喚香魂教醒

又

胡蒙泉

水霽芹香燕背林深風暖鶯吭一春心事錦機傍忘
却尋芳模樣柳絮池塘盡午梨花院落昏黃闌干
曲曲是回腸倚到西廂月上

踏莎行

同前

合數冰蓮注情金葉臂痕猶記嗔時迹小樓幾個月
黃昏荷香柳影都知得問字燈深學書窓黑衣襟
詩卷留殘墨相思不抵藕絲長夢雲斷處吳山碧

又

照恨菱花剪情菰葉彩雲散後無蹤跡聽郎言語識
郎心當時一點誰消得柳暗花明螢飛月黑臨窓
滴淚研殘墨合歡帶上舊題詩如今化作相思碧

憶秦娥

翁處靜

三月時楊花飛盡無花飛無花飛不教春去爭得春
歸高樓望斷黃金羈綠窓眉黛傷新離傷新離好

將別後長做歸時

戀繡衾

同前

獸爐烟重火半焦捲簾時雪意又銷過數點殘鴉外
想梅花寒在灞橋謝娘春恨深如柳未東風先道
絮飄且莫把冰絲剪有燈球紅繡未描

南歌子

胡蒙泉

山枕鶯聲曉羽觴花片飛昨朝猶道未成歸不記春
衫襟上舊題詩愁眼垂楊見苦心紅燭知翻成怕
見別離時只寄一聲將息當相思

又

續雪谷

眼媚雙波溜腰柔一搦纖問伊何事放珠簾笑道篆
香銷盡要重添數日寬金釧梳雲拂翠奩梅妝依
舊落虛檐題起一春心事兩眉尖

柳梢青

陳行簡

綠弱紅臞暖雲沁雨乍有還無破曉幽禽平渠流水
春響庭除梅酸初著花跗似滴滴新愁未紓幾信
花風一痕青燒萬里秦吳

謁金門

同前

歸未卜頻倒金瓶纖玉明月綃窓停剪燭搦愁題蠹
綠秋水娟娟魚目腰素幾分綃縮接得雲牋無意

讀雕鞍何處宿

又

姚雪蓬 鐫

吟院靜遲日自行花影熏透水沈雲滿鼎晚妝窺露
井飛絮遊絲無定誤了鶯鶯相等欲喚海棠教睡
醒奈何春不肯

長相思

徐徑畝 霽

聽鶯聲惜鶯聲客裏鶯聲最有情家山何處青
問歸程數歸程行盡長亭又短亭征衫脫未成

又題甘棧

胡蒙泉

南山鐘北山鐘一聽鐘聲百念空古今昏曉中望

秋風數秋風等得秋來等過鴻燈前書一封

又

續雪谷

心悠悠恨悠悠誰剪春山兩點愁
笙寒燕子棲曉星稀暮雲飛
織就迴文不下機
花飛人未歸

陽春白雪卷第八終

陽春白雪外集

臨濮 趙 聞禮 立之選

賀新郎 寄李伯紀

張仲宗

曳杖危樓去斗垂天滄波萬頃月流烟渚掃盡浮雲
風不定未放扁舟夜渡一鴈落寒蘆深處悵望闕河
空弔影正人間鼻息鳴鼉鼓誰伴我醉中舞 十年
一夢揚州路倚高寒愁生故國氣吞□□□□□
三尺劒遺恨琵琶舊語漫暗澹銅花塵土喚取謫仙
平章看過苔溪尚許垂綸否風浩蕩欲輕舉

又 送胡邦衡謫新州

夢繞神州路。張西風連營畫角。故宮離黍。底事崑崙
傾砥柱。九地黄流亂注。聚萬落千村狐兔。天意從來
高難問。況人情易感。悲如許。更南浦。送君去。涼生
岸柳。催殘暑。耿銀河疎星淡月。斷雲微霧。萬里家山
知何處。回首對牀夜雨。鴈不到。書成誰與。目盡青天
懷今古。肯兒曹恩怨相爾汝。舉大白。唱金縷。

又寄公甫

稼軒

把酒長亭說。愛淵明風流酷似。卧龍諸葛。何處飛來
林間鵲。戲踏松梢殘雪。要破帽多添華髮。水殘山
無態度。被疎梅料理成風月。兩三鴈也。蕭瑟。佳人

重約還輕別，悵清江、天寒不渡。水深冰合，路斷車輪生四角。此地行人銷骨，問誰使、君來愁絕。鑄就而今相思錯，料當初、費盡人間鐵。長夜笛、莫吹裂。

又

許深甫及之

舊俗傳荆楚，正江城、梅炎藻夏。做成重午，門艾釵符闕。何事付與癡兒，駿女耳不聽湖邊鼉鼓。獨炷爐香薰衣潤，對瀟瀟、翠竹都忘暑。時展卷、誦騷語。新愁不障西山雨。問樓頭、登臨倦客，有誰懷古。回首獨醒人何在，空把清尊酹與。漾不到、瀟湘江渚。我又相將湖南去，已安排、吊屈嘲漁父。君有語，但分付。

又 六月十五日夜西湖月下

史邦卿

同住西山下是天地中間愛酒能詩之杜船向西陵
佳處放塵世必無知者暑不到雪宮風榭楚竹忽然
呼月上被東南幾葉雲紫惹雲散去笑聲罷 清尊
莫為婵娟瀉為狂吟醉舞無失晉人風雅踏碎橋邊
楊柳影不聽漁樵閑話便欲舉空杯相謝北斗以南
如此幾想吾曹便是神仙也問今夜是何夜

又

吳中韓氏滄浪亭和吳夢窓韻

吳履齋

漢畫征衫氣小夷猶尊壘杖屨踏開花事邂逅山翁
行樂處何似烏衣舊里歎荒草舞臺歌地百歲光陰

如夢斷算古今興廢都如此何用洒兒曹淚 江南
自有漁樵隊想家山猿愁鶴怨問人歸未寄語寒梅
休放盡留取三花兩葉待老子領些春意皎皎風流
心自許儘何妨瘦影橫斜水煩翠羽伴醒醉

又雪堂弔東坡

宋謙甫

喚起東坡老問雪堂幾番興廢斜陽衰草一月有錢
三十塊何苦抽身不早又底用北門攜藻儋兩蠻烟
添老色和陶詩翻被淵明惱畢竟是忘言好 周郎
英發人間少漫依然烏鵲南飛山高月小歲月堂堂
留不住此世何時是了算不滿英雄一笑我有豐淮

千斗酒把新愁舊恨都傾倒醉吹笛到天曉

滿江紅

稼軒

茄鼓歸來舉鞭問何如諸葛人盡道忿忿五月渡瀘
深入白羽風生貔虎嘯青溪路斷猩鼯泣早紅塵一
騎落平岡捷書急三萬卷龍頭客渾未得文章刀
把詩書馬上笑驅鋒鏑金印明年如斗大貂蟬却自
兜鍪出待勒公勲業上磨崖浯溪石

又

劉後村

金甲瑤戈記當日轅門初立磨盾鼻一搗千紙龍蛇
猶濕鏃馬曉嘶營壁冷樓船夜渡風濤急有誰憐猿

臂故將軍無功級 平戎策從軍什零落盡慵收拾
把茶經香傳時時溫習生怕客談榆塞事且教兒誦
花間集歎臣之壯也不如人今何及

又

王東卿

八十歸來方畧下幾竿脩竹柴門外沙鋪軟路水流
清王栽接新來桃與李安排舊日松和菊過小橋作
箇看山樓千峯綠 收筆硯藏碁局酒莫飲經須讀
但平平放下頓超凡俗獨睡已無年少夢閑吟不唱
他家曲算人生萬事苦無多相將足

又 送李御帶珙

吳履齋

紅玉階前問何事翩然引去湖海上一汀鷗鷺半帆
烟雨報國無門空自怨濟時有策從誰吐過垂虹亭
下繫扁舟鱸堪煮拚一醉留君住歌一曲送君路
遍江南江北欲歸何處世事悠悠渾未了年光冉冉
今如許試舉頭一笑問青天天無語

又赤壁懷古

戴式之

赤壁磯頭一番過一番懷古想當時周郎年少氣吞
區宇萬騎臨江貔虎噪千艘列炬魚龍怒卷長波一
鼓困曹瞞今如許江上渡江邊路形勝地興亡處
覽遺踪勝讀史書言語幾度東風吹世換千年往事

隨潮去問道傍楊柳為誰春搖金縷

又

潘紫巖

坊庭堅

築室依崖春風送一簾山色沙鳥外漁樵而已別無
閑客醉後和衣眠憤背醒來淪茗尋泉脉犯心情分
付隴頭雲溪邊石身未老頭先白人不見山空碧
約釣竿共把自慚鉤直相蜀吞吳成底事何如只抱
隆中膝漫長歌歌罷悄無言看青壁

又

循視江興水
備舟中賦

陳可齋

萬里長江天與限東南吳楚何人者提英口口指鞭
欲渡孟德舳艫煙赤壁口口口口口口問波濤說

盡幾英雄今猶古 中原地紛□□□□□□□□

□□□□□□□□□□□□□□□□□□□□

□□□□□□□□□□□□□□□□□□□□

□□□□□□□□□□□□□□□□□□□□

又 和陳漕佐仙湖韵

蕭大山

莫是西湖分一派殘波騰碧閑問著鶯仙丹事老榕
知得符水帶長鷗踏損柳風絮暖魚吞入只前山依
舊漢時青晴還濕 亭疎好何消密花少好無多植
聽黃鸝三請要詩翁出消渴泉斟寒玉液留題石剝
蒼苔色歎而今翻美口南春乾坤窄

又烏衣園作

吳履齋

柳帶榆錢又還過清明寒食天一笑滿園羅綺滿城
簫笛花樹得晴紅欲染遠山過雨青如滴問江南池
館有誰來江南客烏衣巷今猶昔烏衣事今難覓
但年年燕子晚烟斜日抖擻一春塵土債悲涼萬古
英雄迹且芳尊隨分趁芳時休虛擲

又

泛舟武夷十炊仙
游館次呂居仁韵

留雲麓

元剛

風送清篙汭流沂武夷九曲回首處虹橋無復慢亭
遺屋翠壁雲屏臨釣石銀河雪瀑飛寒玉想當年鐵
笛倚林吹秋空綠
蓼荇帶摺節竹披荷菱餐椒菊

問丹崖碧嶺底堪重辱青笈不妨娛老眼烏髯未許
污吾足恰仙游一枕夢醒來胡麻熟

念奴嬌

程滄洲

中秋玩月 山谷共倒金荷家萬里難
得尊前相屬之句悵然有懷借韵作一

首

晚涼散策恨西風不貸一池殘綠誰與冰輪攜玉斧
恰好今宵圓足樹杪譙光莎庭轉影零亂崑崙玉盞
曾清露閒須澆下醺醺 休問湖海飄零老人心事
似倚巖枯木萬里親知應健否脉脉此情誰屬世慮

難平天高難問倚遍闌干曲不妨隨寓買園催種松竹

小梅花

賀方回

城下路淒風露今人犁田昔人墓岸頭沙帶蕪葭漫漫昔時流水今人家黃埃赤日長安道倦客無漿馬無草開函關掩函關千古如何不見一人閑六國擾三秦掃初謂商山遺四老馳單車致緘書裂荷焚芟接武曳長裾高人端得酒中趣深入醉鄉安穩處生忘形死忘名誰論二豪却不數劉伶

又

同前

縛虎手懸河口車如鷄栖馬如狗白綸巾撲黃塵不
知我輩不是蓬蒿人衰蘭送客咸陽道天若有情天
亦老作雷顛不論錢誰問旗亭美酒斗十千酌大
斗起為壽青鬢常青古無有笑嫣然舞翩然當壚秦
女十五語如弦遺音能記秋風曲事去千年猶恨促
攬流光繫扶桑爭奈愁來一日即為長

又

思前別記時節美人顏色如花發美人歸天一涯娟
娟姮娥三五滿還虧翠眉蟬鬢生離訣遙望青樓心
欲絕夢中尋卧巫雲覺來珠淚滴向湘水深愁無

已奏綠綺歷歷高山與流水妙通神絕知音不知暮
雨朝雲何山岑相思無計堪相比珠箔雕闌幾千里
漏將分月窓明一夜梅花忽開疑是君

右三闋隳括唐人詩歌為之是亦集句之
義然其間語意聯屬飄飄然有豪縱高舉
之氣酒酣耳熱浩歌數過亦一快也

沁園春 寄稼軒

劉改之

斗酒藏肩風雨渡江豈不快哉被香山居士約林和
靖與蘇公命駕勒吾回坡謂西湖正如西子濃抹淡
粧臨照臺二公者都掉頭不顧只筦銜杯 白云天

竺去來圖盡裏崢嶸樓觀開者東西一澗縱橫水遶
兩山南北高下雲堆通曰不然暗香疎影且向孤山
先探梅須晴去訪稼軒未晚且此徘徊

又御閣上郭帥

玉帶猩袍遙望翠華馬去似龍擁貂蟬爭出千官鱗
集貌貅不斷萬騎雲從細柳營開團花袍窄人指汾
陽郭令公山西將算韜鈴有種五世元戎旌旗蔽
滿寒空魚陣整從容虎帳中想刀明似雪縱橫脫鞘
箭飛如雨霹靂鳴弓□□□□□□□慘淡塵沙
飛北風中興事看君王神武駕馭英雄

又夢方孚若

劉後村

何處相逢登寶釵樓訪銅雀臺命廚人所就東溟鯨
鱠圍人呈罷西極龍媒天下英雄使君與操餘子誰
堪共酒杯車千兩載燕南趙北劍客奇才酒酣畫
鼓如雷又爭信鄰鷄輕喚回數年光過盡功名未立
書生老去機會方來使李將軍遇高皇帝萬戶侯何
足道哉披衣起但淒涼念舊感慨興衰

又官滿作

雷春伯

問訊故園今如之何還勝昔無想舊耘蘭蕙依然蔥
蒨新栽楊柳亦已扶疎韭本千畦芋根一畝雨老烟

荒誰為鉏難忘者是竹吾愛甚梅汝知乎 茅亭低
壓平湖有狎鷺馴鷗尚可呼把絳紗準擬新官到也
寒氈收拾賤子歸歟略整柴門更芟草徑惟有幽人
解枉車丁寧著與做漆碁局砌換茶壚

又用履齋多景樓韵

程滄洲

萬里飄萍送江入海過古潤州正羈懷無奈憑高縱
覽濛濛烟雨簇簇漁舟南北區分江山形勝憂憤令
人扶上樓沈凝久任斜飛雪片急洒貂裘 英風追
想孫劉似黑白兩奩碁未收把烟霞饒與坡仙米老
丹青難覓摩詰營邱斗野號風海門殘照長與人間

莞領愁憑誰問借天河一挽洗甲兵休

水龍吟 荅沈莊可

蕭鶴皋

人生何必求名身閑便是名高處卧雲衣袂何因自
染脩塗塵土世路羊腸人情狙賦翻雲覆雨把從前
舊夢倚闌重省休更錯添牋注 况是吾廬江上也
抵得封侯千戶高眠閑聽隣舟漁唱倚闌農語休望
當年溪邊俱載隆中三顧怕羣鷗微覺見人欲起背
人飛去

水調歌頭

甄龍友

西風新葉墮南國九秋初周天三百六十五度片雲

無上有迢迢河漢下有滔滔江水橫載洞庭湖一葉
放流去人在渾儀圖 滿虛空張寶蓋綴明珠琉璃
為地游戲乾象駕坤輿爛醉蓬萊方丈遍入華嚴法
界試問夜何如北斗轉魁柄東海欲飛鳥

又送陳 之歸鎮州

蔡伯堅

東垣步秋水幾曲冷玻璃沙鷗一點晴雪知我老忘
機共約經營五畝臥看西山烟雨窓戶舞連漪雅志
易華髮歲晚羨君歸 月邊梅湖底石入新詩飄然
東晉奇韵此道賞音稀我有一峯明秀尚戀三升春
酒辜負綠蓑衣為寫倦游興說與水雲知

又 寄浩然

雲間貴公子玉骨秀橫秋十年流落冰雪香藹紫貂
裘燈火春城咫尺曉夢梅花消息蠟紙寫銀鈎老星
黃塵眼如對白蘋洲世間物唯有酒可忘憂蕭閑
一段歸計佳處著君侯翠竹江村月上但要綸巾鶴
氍來往亦風流醉墨薔薇露洒遍酒家樓

又

榮樵仲

既難求富貴何處沒溪山不成天也不容我去樂清
閑短褐寬裁疎葛柱杖橫拖瘦玉著个竹皮冠弄影
碧霞裏長嘯翠微間醉時歌狂時舞困時眠翛然

自得了無一點俗相干擬把清風明月剪作長篇短
闌留與世人看待倩月邊女歸去借青鸞

水調歌頭

帥蜀作

崔菊坡

與之正子

萬里雲間戍立馬斂門闕亂山極目無際直北是長
安人苦百年塗炭鬼哭三邊鋒鏑天道久應還手寫
留屯奏炯炯寸心丹對青燈搔白首漏聲殘老來
勲業未就妨却一身閑蒲澗清泉白石梅嶺綠陰青
子怪我舊盟寒烽火平安夜歸夢繞家山

又和吳秀晶韵

程滄洲

馳褐倚禪榻絲鬢飈茶烟誰知老子方寸歷歷著千

年試問汗青餘幾一笑腰黃榮夢我自樂天全出處
兩無累羸取日高眠 八千里西望眼斷霞邊并蒼
苔碧隨分風月不論錢執手還成輕別何日歸來投
社玉海得同編經世付時傑覓个釣魚船

又

不能煩惱得掉臂便歸休前度風檣這回潦轍幾悠
悠幸得有雲一谷更自有書萬卷著甚麼來由月采
混魚目霜檠浣蠅頭 相山中侯醉境將詩流情知
薄命个樣勲業也須收辟邏世間萬事推放那邊一
壁百尺卧高樓日月草頭露天地水中漚

又飲蕪湖雄觀亭

魏句濱 庭王

壁月掛銀漢冷侵一江秋天公付我清賞仙籍桂香
浮極目江山如畫際晚雲烟凝紫秋色豁羈愁領首
上雄觀波影動簾鉤鴈排空漁唱晚楚天幽湖陰
一曲千載成敗倩誰籌試問謫仙何處喚起于湖同
醉小為作遨頭老子欲起舞擺脫利名休

賀新涼

送上官尉罷
官歸吳中

趙虛齋

滿酌蓬萊酒最苦是中年作惡送人時候一夜朔風
吹石裂驚得梅花也瘦更衣袂嚴霜寒透卷起潮江
高似屋甚扁舟泊在三江口明月冷載歸否分攜

欲折無垂柳但重樓倚徙兩眉重皺浪濶天高無處
問萬事不堪回首况望斷孤鴻歸後玉樣尊絲今正
美想李鷹已自先招手須破戒飲一斗

又送靈山馮可久通守海陽

陸象澤象一作東

笛喚春風起向湖邊臘前折柳問君何意孤負梅花
立晴晝一舸淒涼雪底但小閣琴棋而已佳客清朝
留不住為匡廬只在家窓裏湓浦去兩程耳草堂
舊日談經地更從容南山北水庾樓重倚萬卷心胸
幾千古仰首駸駸紫氣正江上風寒如此且趁霜天
鱸魚好把貂裘換酒長安市明夜去月千里

又贈送行諸客

魏句濱庭玉

暮雨初收霽凭闌干一江新綠遠山凝翠漠漠春陰
添客思悵望天涯無際又猛省平生行止楚尾吳頭
多少恨付吟邊醉裏消磨矣浮世事只如此陽關
三疊徒勞耳也何須琵琶江上掩青衫淚一斗百篇
乘逸興要借青天為紙兒輩詫龍蛇飛起今夜月明
呼酒處待明朝酒醒帆千里且為我唱新製

又用俞國寶韵

洪平齋

誰識昂昂鶴且隨緣剝水殘山東村西落世事幾番
新局面看底却高三著况轉首西山日薄雪意壓檐

梅索笑任柄長柄短隣家約芻小甕動孤酌 見花
憶得年時昨正微醺獨步黃昏被花迷却冷月吹香
春弄影么鳳梢頭先覺恍夢斷羅浮山脚欲寄心期
無驛使想凌寒不奈腰肢約空凭暖畫闌角

玲瓏四犯

被召賦茶蘼

曹松山

一架幽芳自過了梅花獨占清絕露葉檀心香滿萬
條晴雪肌素淨洗鉛華似美玉乍離瑤闕看翠蛟白
鳳飛舞不筦暮烟啼鴂 酒中風格天然別記唐宮
賜樽芳列玉蕤喚得餘春住猶醉迷飛蝶天氣乍雨
乍晴長是伴牡丹時節夜散瓊樓宴金鋪深掩一庭

香月

惜餘妍

被召賦二色木香

同前

同根異色看錢玉雕檀芳艷如簇秀葉玲瓏嫩條下
垂脩綠禁華深鎖清妍香滿架風梳露浴輕盈便似
覺醺醺格調粗俗蜂黃間塗蝶粉疑舊日二喬各
樣粧束費却春工闌合靚芳穠馥翠華臨檻清賞飛
鳳竿休辭醉玉晴晝鎖貯春瑤臺金屋

宴山亭

被召賦玉繡球

同前

香月玲瓏柔風鏤刻嫩綠枝頭圓膩飛梭艷字絮柳
池塘獨立萬紅塵外戲舞千團訝粉羽留連春媚非

是看滾雪拋瓊鏡鸞相倚 唐昌仙觀風流有霞洞

藏花紺鬟玉蕊雕闌占賞禁苑承恩難比太平瑤卉
遍揀金瓶更移近寶猊烟翠堪愛只少箇鶯鶯繡帶

桂枝香

過漂水感羊角
哀左伯桃遺事

菊花翁

丁丁起處在縱收九京經燒殘樹時見烏鳶飢噪鵲
鷗妖呼數椽老屋團荒堵算何人辦香來炷淡烟斜
照閑花野棠杳杳年度 世事幾番雲覆雨獨此道
嫌人拋棄塵土眼裏長青誰也解如山否三三五五
騎牛伴望前村吹笛歸去柳青梨白春濃月淡蹋歌
椎鼓

沁園春 夜登白鷺亭

施翠崑

披紫菟裘上白鷺亭看吹洞簫望長庚鯨過江橫素
練回仙鶴度月在青霄依約淮山清冷風露如到瀛
洲聽海濤浮圖近更玉鈴金鐸初奏琅璈 人間夢
境寥寥問故國繁華能幾朝有千年枯井龍沈鳳怨
數邱黃壤兔走猿啼莫問榮華不如歸去短棹孤蓬
乘夜潮翠岩下耕白雲二頃賸種仙苗

水調歌頭

甲辰皖山寄
治中秋拈客

鄭雲巖

甫營亭子小花柳斬新栽衰翁餘暇何妨領客少徘徊
堪歎人生離合恰似燕鴻來往光景暗中催蘆荻

晚風起明月滿沙堤
去年秋如此夜有誰陪
欲挽天河無路滿眼總塵埃
未了癡兒官事行止從來難
定又趣到蘇臺不作別離句
共醉十分盃

陽春白雪外集終

詞
源

江蘇古籍出版社



四庫未收書提要

琴經室外集卷三

詞源二卷提要

宋張炎撰炎有山中白雲詞四庫全書已著錄是編
依元人舊鈔影寫上卷詳論五音十二律律呂相生
以及宮調管色諸事釐析精允間系以圖與姜白石
歌詞九歌琴曲所記用字紀聲之法大畧相同下卷
歷論制曲句法字面虛字清空意趣用事詠物節序
賦情離情令曲雜論五要十四篇並足以考見宋代
樂府之制自明陳仲醇改竄炎書刊入續祕笈中而
又襲用沈伯時樂府指迷之名遂失其真徵此幾無

以辨其非蓋前明著錄之家自陶九成說郭廣錄偽
書自後多踵其弊也

詞源卷上

西秦玉田張炎叔夏編

五音相生

宮屬土君之象為信徵所生其聲濁生數五成數十

宮中也中央暢四方唱
始施生為四聲之綱

商屬金臣之象為義宮所生其聲次濁生數四成數

九商章也物成
就可章覆也

角屬木民之象為仁羽所生其聲半清半濁生數三

成數八角觸也物觸地
而我芒角也

徵屬火事之象為禮角所生其聲次清生數二成數


大徵而祉繁也物盛也

言

羽屬水物之象為智商所生其聲最清生數一成數

羽字也物聚
藏宇覆之也

陽律陰呂合聲圖




聲生於日律生於辰日為十母甲乙角也丙丁徵也
戊巳宮也庚辛商也壬癸羽也辰為十二子六陽為
律一曰黃鍾六陰為呂亢間大呂二曰太簇二間夾
鍾三曰姑洗三間仲呂四曰蕤賓四間林鍾五曰夷
則五間南呂六曰無射六間應鍾此陰陽聲律之名
也

律呂隔八相生圖

自黃鍾律為宮從本律數八至林鍾為徵
林鍾數八至姑洗為角姑洗數八至應鍾
為閏宮應鍾數八至蕤賓為閏徵謂之七

調



黃鍾所以宣養六氣九德也又曰黃者中也鍾者種也又曰黃者中和之氣太簇所以金奏贊揚出滯也又曰言萬物簇生也又曰陽氣既大奏地而達出也顏氏曰奏進也又曰萬物始大奏地而出之也

姑洗所以脩潔萬物考神納賓也又曰萬万洗生又
曰姑必也洗潔也言陽氣洗物必使之潔也又曰姑
者故也洗者鮮也萬物去故就新莫不鮮明也蕤賓
所以安精神人獻酬交酢也又曰陰氣幼少故曰蕤
姜陽不用事故曰賓又曰蕤繼也賓導之陽始導陰
氣使萬物也又曰蕤者下也賓者敬也言陽陰上極
陰氣始賓敬也

夷則所以詠歌九則平民無貳也又曰言陰氣之賊
萬物也又曰則法也言陽氣正法度使陰氣夷當傷
之物也又曰夷傷也則法也萬物始傷被刑法也

言
無射所以宣布哲人之令德示民軌儀也

大呂助宣物也又曰呂旅也言陰氣大旅助黃鍾宣氣而牙物也

夾鍾出四隙之細也又曰言陰陽相夾厠也又曰言陰氣夾助大簇宣四方之氣而出種物也

中呂宣中氣也又曰言萬物盡旅而西行也又曰言微陰始起未成著於其中旅物姑洗宣氣齊物也又曰言陽氣將極中充大也

林鍾和展百事俾莫不任肅純恪也又曰林君也言陰氣受任助蕤賓君主種物使長大楸盛也又曰言


萬物就殞氣林林然又曰林者衆也言萬物成就種類多也

南呂贊揚秀也又曰言萬物之旅入藏也又曰言陰氣旅助夷則任成萬物也又曰南任也言陽氣尚任包大生薺麥也

應鍾均利器用俾應復也又曰陽氣之應不用事也又曰言陰氣應无射該藏萬物於十二子為疚疚者該也言萬物應陽而動下藏也

氣始於冬至律本於黃鍾或損或益以生商角徵羽陽下生陰陰上生陽下生者倍其實三其法上

生者四其實倍其法故黃鍾長九寸倍之為十八三
 之為六而生林鍾之長林鍾長六寸四之為二十四
 三之為八而生太簇之長此律呂損益相生之說也



律呂隔八相生

黃鍾為父陽律三分損一下生林鍾

欠

林鍾為母陰呂三分益一上生太簇

人又

太簇為子陽律三分損一下生南呂

又リ

南呂為子妻陰呂三分益一上生姑洗

フ、

姑洗為孫陽律三分損一下生應鍾

一ハ

應鍾為孫妻陰呂三分益一上生蕤賓

ハレ

蕤賓為曾孫陽律三分損一下生大呂

上又

大呂為曾孫妻陰呂三分益一上生夷則

又㊦

夷則為元孫陽律三分損一下生夾鍾

㊦㊦

夾鍾為元孫妻陰呂三分益一上生无射

㊦㊦

无射為來孫陽律三分損一下生仲呂

㊦フ

仲呂為來孫妻陰呂三分益一上生黃鍾 么么

律生八十四調

宮徵商羽角閏宮閏徵宮

黃林太南姑應蕤

大夷夾無仲黃林

太南姑應蕤大夷

夾无仲黃林太南

姑應蕤大夷夾無

仲黃林太南姑應

蕤大夷夾无仲黃

林太南姑應蕤大

夷夾无仲黄林太

南姑應蕤大夷夾

无仲黄林太南姑

應蕤大夷夾无仲

土火金水木 太陰 太陽

古今譜字

黄大太夾姑仲蕤林夷南无應 黄清太清太清夾清

合下四四下一上勾尺王工下凡凡六下五五 一五

四宮清聲

今雅俗樂色管色並用寄四宮清聲煞與古不同

五音宮調配屬圖



② 五字太簇清聲

③ 高五字夾鍾清聲

十二律呂各有五音演而為宮為調律呂
之名總八十四分月律而屬之今雅俗祇
行七宮十二調而角不預焉

黃鍾宮

俗名

下宮同

正黃鍾宮

厶

黃

大雪中聲
子之氣

黃鍾商

大石調

マ

黃鍾角

正黃鍾宮角、

鍾

么么

二字
同用

黃鍾變

正黃鍾轉徵厶

黃鍾徵

正黃鍾宮正徵フ

宮

十一月陽律
冬至正聲

黃鍾羽

般涉調

人

黃鍾閏

大石角

ハ

大吕宫 俗名 高宫

㊦

大 小寒中聲
丑之氣

大吕商 高大石調

①

大吕角 高宫角

ㄣ

吕 ㊦ ㊦ 二字
同用

大吕變 高宫變徵

人

大吕徵 高宫正徵

㊦

宫 十二月陰吕
大寒正聲

大吕羽 高般涉調

㊦

大吕閏 高大石角

ム

太

太簇宫 俗名 中管高宫

マ

太

立春中聲
寅之氣

太簇商

中管高大石調

、

太簇角

中管高宮角

、

簇

③ ③ 二字
同用

太簇變

中管高宮變徵

②

太簇徵

中管高宮正徵

フ

宮

正月陽律
雨水正聲

太簇羽

中管高般涉調

ハ

太簇閏

中管高大石角

②

夾鍾宮

俗名

中呂宮

①

夾

京繫中聲
卯之氣

夾鍾商

雙調

ム

夾鍾角

中呂正角

人

鍾①

夾鍾變

中呂變徵

フ

夾鍾徵

中呂正徵

ハ

宮

二月陰呂
春分正聲

夾鍾羽

中呂調

ム

夾鍾閏

雙角

又

姑洗宮

俗名

中筦中呂宮

一

姑清明正聲
辰之氣

姑洗商

中管雙調

ニ

姑洗角

中管中呂角

㊦

洗一

姑洗變

中管呂變徵

㊧

姑洗徵

中管中呂正徵

ハ

宮

三月陽律
谷雨正聲

姑洗羽

中管中呂調

㊦

姑洗閏

中管雙角

㊧

仲呂宮

俗名

道宮

ㄥ

仲

立夏中聲
巳之氣

仲呂商

小石調

人

仲呂角

道宮角

ㄣ

呂

仲呂變

道宮變徵

ㄣ

仲呂徵

道宮正徵

ㄣ

宮

四月陰呂
小滿正聲

仲呂羽

正平調

マ

仲呂閏

小石角

一

蕤賓宮

俗名

中管道宮

ㄣ

蕤

芒種中聲
午之氣

蕤賓商

中管小石調

ㄟ

蕤賓角

中管道宮角

ㄠ

賓

蕤賓變

中管道宮變徵

ㄡ

蕤賓徵

中管道宮正徵

ㄣ

宮

五月陽律
夏至正聲

蕤賓羽

中管正平調

ㄥ

蕤賓閏

中管小石角

ㄤ

林鍾宮

俗名

南呂宮

ㄥ

林

小暑中聲
未之氣

林鍾商

歇指調

フ

林鍾角

南呂角

リ

鍾人

林鍾變

南呂變徵

㊦

林鍾徵

南呂正徵

マ

宮

六月除呂
大暑正聲

林鍾羽

高平調

一

林鍾閏

歇指角

人

夷則宮

俗名

仙呂宮

㊧

夷

立秋中聲
申之氣

夷則商

商調

㊨

夷則角

仙呂角

ム

則 ㊦

夷則變

仙呂變徵

又

夷則徵

仙呂正徵

㊦

宮

七月陽律
處暑正聲

夷則羽

仙呂調

ㄣ

夷則閏

商角

人

南呂宮

俗名

中管仙呂宮

一

南

白露中聲
酉之氣

南呂商

中管商調

リ

南呂角

中管仙呂角

㊦

呂

南呂變

中管仙呂變徵

㊦

南呂徵

中管仙呂正徵

、

宮

八月除呂
秋分正聲

南呂羽

中管仙呂調

人

南呂閏

中管仙角

㊦

無射宮

俗名

黃鍾宮

㊦

無

寒露中聲
戌之氣

無射商

越調

厶

無射角

黃鍾角

乙

射

㊦

無射徵

黃鍾變徵

幺

無射變

黃鍾正徵

一

宮

九月陽律
霜降正聲

無射羽

羽調

人

無射閏

越角

フ

應鍾宮

俗名

中管黃鍾宮

川

應

立冬中聲
午之氣

應鍾商

中管越調

㊦

應鍾角

中管黃鍾角

㊧

鍾川

應鍾變

中管黃鍾變徵

㊨

應鍾徵

中管黃鍾正徵

㊩

宮

十月陰呂
小雪正聲

應鍾羽

中管羽調

㊪

應鍾閏

中管越角

㊫

管色應指字譜

么

六

凡

工

尺

夕

上

一

四

勾

ム

合

少

五

ハ失一 紗 尖上 尖凡 大住 小住 折 大凡 打
ハ 妙 尖上 尖凡 大住 小住 折 大凡 打

宮調應字譜

七宮

黃鍾宮リ 仙呂宮リ 正宮ム 高宮ハ 南呂宮人

中呂宮一 道宮ク

十二調

大石調又 小石調人 般涉調ム 歇指調フ 越調ム

仙呂調ム 中呂調ク 正平調マ 高平調一 雙調ク

黃鍾羽人 商調リ

律呂四犯

宮犯商

商犯羽

羽犯角

角歸本宮

黃鍾宮

無射商

夾鍾羽

無射閏

大呂宮

應鍾商

姑射羽

應鍾閏

太簇宮

黃鍾商

仲呂羽

黃鍾閏

夾鍾宮

大呂商

蕤賓羽

大呂閏

姑洗宮

太簇商

林鍾羽

太簇閏

仲呂宮

無射商

夷則羽

夾鍾閏

蕤賓宮

姑洗商

南呂羽

姑洗閏

林鍾宮

仲呂商

無射羽

仲呂閏

夷則宮

蕤賓商

應鍾羽

蕤賓閏

南吕宫

林鍾商

黄鍾羽

林鍾閏

無射宫

夷則商

大吕羽

夷則閏

應鍾宫

南吕商

太簇羽

南吕閏

以宫犯宫為正犯以宫犯商為側犯以宫犯羽
為偏犯以宫犯角為旁犯以角犯宫為歸宫周
而復始

姜白石云凡曲言犯者謂以宫犯商商犯宫之類如
道調宫上字住雙調亦上字住所住字同故道調曲
中犯雙調或雙調曲中犯道調其他準此唐人樂書
云犯有正旁偏側宫犯宫為正宫犯商為旁宫犯角

為偏宮犯羽為側此說非也十二宮所住之字各不同不容相犯十二宮特可以犯商角羽耳

結聲正訛

商調是川字結聲用折而下若聲直而高不折則成幺字即犯越調

仙呂宮是一字結聲用平直而微折而下則成川字即犯黃鍾宮云

正平調是マ字結聲用平直而去若微折而下則成么字即是仙宮調

道宮是么字結聲要平下莫太下而折則帶人一雙

聲即犯中呂宮

高宮是ㄅ字結聲要清高若平下則成ㄣ字犯大石
徵高則成ㄠ字是正宮

南呂宮是人字結聲用平而去若折而下則成一字
即犯高平調

右數宮調腔韻相近若結聲轉入別宮
調之走腔若高下不拘乃是諸宮調矣

謳曲旨要

謳曲令曲四指勻
官拍艷拍分輕重

破近六均慢八均
七敲八指鞞中清

大頓聲長小頓促

頓都
昆切

小頓才斷大頓續

大頓小住當韻住

丁住无牽逢合六

慢近曲子頓不疊

歌颯連珠疊頓聲

反掣用時須急過

折拽悠悠帶漢音

頓前頓後有敲指

聲拖字拽疾為勝

抗聲特起直須高

抗與小頓皆一指

腔平字側莫參商

先須道字後還腔

字少聲多難過去

助以餘音始繞梁

忙中取氣急不亂

停聲待拍慢不斷

好處大取氣留連

拘則少入氣轉換

哩字引濁囉字清

住乃哩囉頻唆喻

大頭花拍居第五

疊頭艷拍在前存

舉末輕圓无磊砢

清濁高下縈縷比

若無含搢強抑揚

即為叫曲念曲矣

詞源卷上

詞源卷下

西秦玉田張炎叔夏編

古之樂章樂府樂詞樂曲皆出於雅正粵自秦漢以聲詩間為長短句至唐人則有尊前花間集迄于崇寧立太晟府命周美成諸人討論古音審定古調淪落之後少得存者由此八十四調之聲稍傳而美成諸人又復增演慢曲引近或移宮換羽為三犯四犯之曲按月律為之其曲遂繁且美成負一代詞名所作之詞渾厚和雅善於融化詩句於音譜猶且間有未諧可見其難矣作詞者多效其體製失之軟媚而

无所取此惟美成為然不能學也所可做之詞是一美成而已舊有刊本六十家詞可歌可誦者指不多屈中間如秦少游高竹屋姜白石史邦卿吳夢窗此數家格調不侔句法挺異俱能特立清新之意刪削靡曼之詞自成一家各名于世作詞者能取諸人之所長去諸人之所短精加玩味象而為之豈不能與美成輩爭雄長哉余踈陋謏才昔在

先人侍側聞楊守齋毛敏仲徐南溪諸公商確音律嘗知緒餘故生平好為詞章用工瑜四十年未見其進今老矣嗟古音之寥寥慮雅詞之落落僭述管見

類列于后與全志者商畧之

音譜

詞以協音為先音者何譜是也古人按律製譜以詞定聲此正聲依永律和聲之遺意有法曲有五十四大曲有慢曲若曰法曲則以陪四頭管品之即篳篥也其聲清越大曲則以倍六頭管品之其聲流美即謠者所謂曲破如望瀛如獻仙音乃法曲其源自唐來如六么如降黃龍乃大曲唐時鮮有聞法曲有散序歌頭音聲近古大曲有所不及若大曲亦有謠者有譜而无曲片數興法曲相上下其說亦在歌者稱停緊

慢調停音節方為絕唱惟慢曲引近則不同名曰小唱須得聲字清圓以啞筆簾合之其音甚正簫則弗及也慢曲不過百餘字中間抑揚高下丁抗掣拽有大頓小頓大住小住打指等字真所謂上如抗下如墜曲如折止如槁木偃中矩勾中鉤累累乎端如貫珠之語斯為難矣

先人曉暢音律有寄間集旁綴音譜刊行于世每作一詞必使歌者按之稍有不協隨即改正曾賦瑞鶴仙一詞云捲簾人睡起放燕子歸來商量春事芳菲又無幾減風光都在賣花聲裏吟邊眇底被嫩綠移

紅換紫甚等間半委東風半委小橋流水 還是苔
痕滿雨竹影留雲做晴猶未繁華迤邐西湖上多少
詞吹粉蝶兒撲定花心不去閑了尋香兩翅那知人
一點新愁寸心萬里此詞按之詞譜聲字皆協惟撲
字稍不協遂改為守字始協迺知雅詞協音雖一字
亦不放過信乎協音之不易也又作惜花春起早云
瑣窓深深字不協改為幽字又不協再為改明字歌
之始協此三字皆平聲胡為如是蓋五音有唇齒喉
舌鼻所以有輕清重濁之分故平聲字可為上入者
此也聽者不知宛轉遷就之聲以為合律不詳一定

不易之譜則曰失律矧歌者豈特忘其律抑且忘其聲字矣述詞之人若只依舊本之不可謫者一字填一字而不知以訛傳訛徒費思索當以可謫者為式雖有小疵亦庶幾耳

拍眼

法曲大曲慢曲之次引近輔之皆定拍眼蓋一曲有一曲之譜一均有一均之拍若停聲待拍方合樂曲之節所以衆部樂中用拍板名曰齊樂又曰樂句即此論也南唐書云王感化善歌謳聲振林木繫之樂部為謫板色後之樂棚前用歌板色二人聲與樂聲

相應拍與樂拍相合按拍二字其來亦古所以舞法
曲大曲者必須以指尖應節俟拍然後轉步欲合均
數故也法曲之拍與大曲相類每片不同其聲字疾
徐拍以應之如大曲降黃龍花十六當用十六拍前
袞中袞六字一拍要停聲待拍取氣輕巧然袞則三
字一拍蓋其曲將終也至曲尾數句使聲字悠揚有
不忍絕響之意似餘音繞梁為佳惟法曲散序无拍
至歌頭始拍若唱法曲大曲慢曲當以手拍纏令則
用拍板嘌吟說唱諸公調則用手調兒亦舊式耳慢
曲有大頭曲疊頭曲有打前拍打後拍拍有前九後

十一內有四艷拍引近則用六均拍外有序子與法曲散序中序不同法曲之序一片正合均拍俗傳序子四片其拍頗碎故纏令多用之繩以慢曲八均之拍不可又非慢二急三拍與三臺相類也曲之大小皆合均聲豈得死拍歌者或領袖或揜扇殊亦可哂唱曲苟不按拍取氣決是不勻必死節奏是說非習於音者不知也

製曲

作慢詞看是甚題目先擇曲名然後命意命意既了思量頭如何起尾如何結方始選韻而後述曲最是

過片不要斷了曲意須要承上接下如姜白石詞云
曲曲屏山夜涼獨自甚情緒於過片則云西窓又吹
暗雨此則曲之意脉不斷矣詞既成恐前後之意不
相應或有重疊句意又恐字面麤疎即為修改改畢
淨一本展之几案間或貼之壁少頃再觀必有未穩
處又須修改至來日再觀恐又有未盡善者如此改
之又改方成無瑕之玉倘急於脫藁倦事修擇豈無
病辭不惟不能全美抑且未協音聲作詩者猶且旬
鍛月鍊況於詞乎

句法

詞中句法要平妥精粹一曲之中安能句句高妙只
要拍搭襯副得去於好發掬筆力處極要用工不可
輕易放過讀之使人擊節可也如東坡楊花詞云似
花還似非花也無人惜從教墜又云春色三分二分
塵土一分流水如美成風流子云鳳閣繡幃深幾許
聽得理絲簧如史邦卿春雨云臨斷岸新綠生時是
落紅帶愁流處燈夜云自憐詩酒瘦難應接許多春
色如吳夢窓登靈巖云連呼酒上琴臺去秋與雲平
閨重九云簾半捲帶黃花人在小樓姜白石楊州慢
云二十四橋仍在波心蕩冷月無聲此皆平易中有

句法

字面

句法中有字面蓋詞中一箇生硬字用不得須是深加煅煉字字敲打得響歌誦妥溜方為本色語如賀方回吳夢窗皆善於鍊字面多於溫廷筠李長吉詩中來字面亦詞中之起睇處不可不留意也

虛字

詞與詩不同詞之句語有二字三字四字至六字者若堆疊實字讀且不通況付之雪兒乎合用虛字呼喚單字如正但甚任之類兩字如莫是還又那堪之類

三字如

更能消最無端又却是之類

此等虛字却要

用之得其所若能善用虛字句語自活必不質實觀者無揜卷之誚

清空

詞要清空不要質實清空則古雅峭拔質實則凝澁晦昧姜白石詞如梵雲孤飛去留無迹吳夢窓詞如七寶樓臺眩人眼目碎拆下來不成片段此清空質實之說夢窗聲聲慢云檀藥金碧婀娜蓬萊游雲不蘸芳洲前八字恐亦太澁如糖多令云何處合成愁離人心上秋縱芭蕉不雨也颼颼韻道晚涼天氣好

有明月怕登樓 前事夢中休花空烟水流燕辭歸
客尚淹留垂柳不繫裙帶住謾長是繫行舟此詞踈
快却不質實如是者集中尚有惜不多耳白石詞如
踈影暗香揚州慢一萼紅琵琶仙探春八歸淡黃柳
等曲不惟清空又且騷雅讀之使人神觀飛越

意趣

詞以意為主不要蹈襲前人語意如東坡中秋水調
謠云明月幾時有把酒問青天不知天上宮闕今夕
是何年我欲乘風歸去又恐瓊樓玉宇高處不勝寒
起舞弄清影何事在人間 轉珠簾開繡戶照無眠

不應有恨何事長向別時圓人有悲歡離合月有陰
晴圓缺此事古難全但願人長久千里共嬋娟夏夜
洞仙詞云冰肌玉骨自清涼無汗水殿風來暗香滿
綉簾開一點明月窺人人未寢欹枕釵橫鬢亂起
來携素手庭戶無聲時見疎星度河漢試問夜如何
夜已三更金波淡玉繩低轉但屈指西風幾時來又
不道流年暗中偷換王荊公金陵桂枝香云登臨送
目正故國晚秋天氣初肅千里澄江似練翠峯如簇
征帆去棹殘陽裏背西風酒旂斜矗綠舟雲淡星河
鷺起畫圖難足嘆往昔豪華競逐悵門外樓頭悲

恨相續千古憑高對此謾嗟榮辱六朝舊事隨流水
但寒烟衰艸凝綠至今商女時時尚詞後庭遺曲

姜白石暗香賦梅云舊時月色是幾番照我梅邊吹
笛喚起玉人不管清寒與攀摘何遜而今漸老韻忘
却春風詞筆但恠得竹外疎花香冷入瑤席江國
政宋宋嘆寄與路遙夜雪初積翠尊易泣紅萼無言
耿相憶長記曾攜手處千樹陸西湖寒碧又片片吹
盡也幾時見得疎影云苔枝綴玉有小小翠禽枝上
同宿客裏相逢籬角黃昏死言自倚脩竹昭君不慣
胡沙遠但暗憶江南江北想佩環月夜歸來化作此

花幽獨猶記深宮舊事那人正睡裏飛近蛾綠莫似
春風不莞盈盈早與安排金屋還教一片隨波去又
却怨玉龍哀曲等恁時重覓幽鄰已入小窓橫幅此
數詞皆清空中有意趣無筆力者未易到

用事

詞中用事最難要體認着題融化不澁如東坡永遇
樂云燕子樓空佳人何在空鎖樓中燕用張建封事
白石疎影云猶記深宮舊事那人正睡裏飛近蛾綠
用壽陽事又云昭君不慣胡沙遠但暗憶江南江北
想珮環夜月歸來化作此花幽獨用少陵詩此皆用

事不為事所使

詠物

詩難於詠物詞為尤難體認稍真則拘而不暢模寫
差遠則晦而不明要須收縱聯密用事合題一段意
思全在結句斯為絕妙如史邦鄉東風第一枝詠春
雪云巧翦闌心偷粘艸甲東風欲障新煖謾凝碧瓦
難留信知暮寒較淺行天入鏡做弄出輕鬆纖軟料
故園不捲重簾悞了乍來霍燕 青未了柳回白

眼紅欲斷杏開素面舊游憶著山陰厚盟遂妨上苑
寒爐重煖便放慢春衫針線恐鳳韉挑菜歸來萬一

言
一
灞橋相見綺羅香詠春雨云做冷欺花將烟困柳千
里偷催春暝盡日冥迷愁裏欲飛還住驚粉重蝶宿
西園喜泥潤燕歸南浦最妨他佳約風流鈿車不到
杜陵路 沉沉江上望極還被春潮晚急難尋官渡
隱約遙峯咏淚謝娘眉嫵臨斷岸新綠生時是落紅
帶愁流處記當日門揜梨花剪燈深夜語雙雙燕詠
燕云過春社了度簾幙中間去年塵冷差池欲住試
入舊巢相並還相雕梁藻井又軟語商量不定飄然
快拂花稍翠尾分開紅影 芳徑芹泥雨潤愛貼地
爭飛競誇輕俊紅樓歸晚看足柳昏花暝應自棲香

正穩便忘了天涯芳信愁損玉人日日畫闌獨凭白

石暗香疎影詠梅云

前意趣門

齊天樂賦促織云庾

郎先自吟愁賦淒淒更聞私語露濕銅鋪苔侵石井
都是曾聽伊處哀音似訴正思婦无眠起尋機杼曲
曲屏山夜涼獨自甚情緒西窓又吹暗雨為誰頻
斷續相咏碁杵候館吟秋離宮弔月別有傷心无數
幽詩謾舉笑籬落呼燈世間兒女寫入琴絲一聲聲
更苦此皆全章精粹所詠瞭然在目且不留滯於物
至如劉改之沁園春詠指甲云銷薄春冰碾輕寒玉
漸長漸彎見鳳鞋泥污偎人強剔龍涎香斷撥火輕

翻學撫瑤琴時時欲剪更掬水魚鱗波底寒纖柔處
試摘花香蒲縷棗成班時將粉泪偷彈記切玉曾
教柳傳看筭恩情相著搔便玉體歸期捲數劃遍闌
干每到相思沉吟靜處斜倚朱唇皓齒間風流甚把
仙郎暗掐不放春閑又詠小腳云洛浦凌波為誰微
步輕塵暗生記踏花芳徑亂紅不損步苔幽砌嫩綠
無痕襯玉羅慳銷金窄樣載不起盈盈一段春嬉游
倦笑教人款捻微退些根有時自度詞聲悄不覺
微光點拍頗憶金蓮移換文鴛得侶繡相催袞舞鳳
輕分懊恨深遮牽情半露出沒風前烟縷裙知何似

似一鉤新月淺碧籠雲二詞亦自工麗但不可與前
作同日語

節序

昔人詠節序不惟不多付之詞喉者類是率俗不過
為應時納俗之聲耳所謂清明折桐花爛熳端午梅
霖初歇七夕炎光謝若律以詞家調度則皆未然豈
如美成解語花賦元夕云風銷焰蠟露浥烘爐花市
光相射桂華流瓦纖雲散耿耿素娥欲下衣裳淡雅
看楚女纖腰一把簫鼓喧人影參差滿路飄香麝
因念帝城放夜望千門如畫嬉笑游冶鈿車羅帕相

逢處自有暗塵隨馬年光是也惟只見舊情哀謝清
漏移飛蓋歸來從舞休歌罷史邦卿東風第一枝賦
立春云草脚愁蘇花心夢醒鞭香拂散牛土舊歌空
憶珠簾綵筆倦題繡戶粘鷄貼燕想立斷東風來處
暗惹起一掬相思亂若翠盤紅縷今夜覓夢池秀
句明日動探花芳緒寄聲酤酒人家預約俊游伴侶
憐他梅柳怎忍潤天街酥雨待過了一月燈期日日
醉扶歸去黃鍾喜遷鸚賦元夕云月波疑滴望玉壺
天近了无塵隔翠眼圈花冰絲織練黃道寶光相直
自憐詩酒瘦難應接許多春色最無賴是隨香趁燭

曾伴狂客 蹤跡謾記憶老了杜郎忍聽東風笛柳
院燈疎梅廳雪在誰與細傾春碧舊情拘未定猶自
學當年游歷怕萬一悞玉人夜寒窓際簾隙如此等
妙詞頗多不獨措辭精粹又且見時序風物之盛人
家宴樂之同則絕无詞者至如李易安永遇樂云不
如向簾兒底下聽人笑語此詞亦自不惡而以俚詞
歌於坐花醉月之際似乎擊缶韶外良可嘆也

賦情

簾弄風月陶寫性情詞婉於詩蓋聲出鶯吭燕舌間
稍近乎情可也若隣乎鄭衛與纏令何異焉如陸雪

溪瑞鶴仙云臉霞紅印枕睡覺來冠兒還是不整屏
間麝煤冷但眉山蹙翠泪珠彈粉堂深晝永燕交飛
風簾露井恨无人說與相思近日帶圍寬盡重省
殘燈朱幌淡月紗窗那時風景陽臺路遠雲雨夢便
无準待歸來先指花梢教看却把心期細問問因循
過了青春怎生意穩辛稼軒祝英臺近云寶釵分桃
葉渡烟柳閨南浦怕上層樓十日九風雨斷腸片片
飛紅都無人筦憑誰勸啼鶯聲住鬢邊覷試把花
卜歸期纔簪又重數羅帳燈昏哽咽夢中語是他春
帶愁來春歸何處却不解帶將愁去皆景中帶情而

存騷雅故其燕酣之樂別離之愁回文題葉之思峴
首西州之泪一寓於詞若能屏去浮艷樂而不淫是
亦漢魏樂府之遺意

離情

春艸碧色春水綠波送君南浦傷如之何矧情至於
離則哀怨必至苟能調感愴於融會中斯為得矣白
石琵琶仙云雙漿來時有人似舊曲桃根桃葉歌扇
輕約飛花蛾眉正愁絕春漸遠汀洲自綠更添了幾
聲啼鴂十里楊州三生杜牧前事休說 又還是官
燭分烟柰愁裏匆匆換時節把一襟芳思與空階榆

笑千萬縷藏鴉細柳為玉尊起舞回雪想見西出陽
關故人初別秦少游八六子云倚危亭恨如芳草萋
萋剗盡還生念柳外青驄別後水邊紅袂分時愴然
暗驚無端天與娉婷夜月一簾幽夢春風十里柔
情怎柰向歡娛漸隨流水素絃聲斷翠綃香減那堪
片片飛花弄晚濛濛殘雨籠晴正銷凝黃鸝又啼數
聲離情當如此作全在情景交煉得言外意有如勸
君更盡一杯酒西出陽關無故人廼為絕唱

令曲

詞之難於令曲如詩之難於絕句不過十數句一句

一字閑不得末句最當留意有有餘不盡之意始佳
當以唐花間集中韋莊溫飛卿為則又如馮延巳賀
方回吳夢窓亦有妙處至若陳簡齋杏花疎影裏吹
笛到天明之句真是自然而然大抵前輩不留意於
此有一兩曲膾炙人口餘多隣乎率易近代詞人却
有用工於此者倘以為專門之學亦詞家之射雕手

雜論

詞之作必須合律然律非易學得之指授方可若詞
人方始作詞必欲合律恐死是理所謂千里之程起
於足下當漸而進可也正如方得離俗為僧便要坐

言 詞 一
禪守律未曾見道而病已至豈能進於道哉音律所
當參究詞章先宜精思俟語句妥溜然後正之音譜
二者得兼則可造極元之域今詞人纔說音律便以
為難正合前說所以望望然而去之苟以此論製曲
音亦易諧將于于然而來矣

詞之語句太寬則容易太工則苦澁如起頭八字相
對中間八字相對卻須用工着一字眇如詩眼一同
若八字既工下句便合少寬庶不窒塞約莫寬易又
着一句工緻者便覺精粹此詞中之關鍵也

詞不宜強味人韻若倡者之曲韻寬平庶可賡歌倘

韻險又為人所先則必牽強賡咏句意安能融貫徒費苦思未見有全章妥溜者東坡次章質夫揚花水龍吟韻機鋒相摩起句便合讓東坡出一頭地後片愈出愈奇真是壓倒今我輩倘遇險韻不若祖其元韻隨意換易或易韻答之是亦古人三不和之說大詞之料可以歛為小詞小詞之料不可展為大詞若為大詞必是一句之意引而為兩三句或引他意入來捏合成章必死一唱三嘆如少游水龍吟云小樓連苑橫空下窺繡轂雕鞍驟猶且不免為東坡見誚近代詞人用工者多如陽春白雪集如絕妙詞選亦

言
自可觀但所取不甚精一豈若周草牕所選絕妙好
詞之為精粹惜此板不存恐墨本亦有好事者藏之
難莫難於壽詞倘盡言富貴則塵俗盡言功名則諛
佞盡言神仙則迂闊當總此三者而為之无俗忌之
辭不失其壽可也松椿龜鶴有所不免却要融化字
面語意新奇近代陳西麓所作製本平正亦有佳者
詞欲雅而正志之所之一為物所役則失其雅正之
音矣耆卿伯可不必論雖美成亦有所不免如為伊
淚落如最苦夢魂今宵不到伊行如天便教人霎時
得見何妨如又恐伊尋消問息瘦損容光如許多煩

惱只為當時一餉留情所謂淳源日變成澆風也
詩之賦梅惟和靖一聯而已世非无詩不能與之齊
驅耳詞之賦梅惟姜白石暗香疎影二曲前无古人
後无來者自立新意真為絕唱太白云眼前有景道
不得崔顥題詩在上頭誠哉言也

姜成詞只當看佗渾成處於軟媚中有氣魄採唐詩
融化如自己者乃其所長惜乎意趣却不高遠所以
出奇之語以白石騷雅句法潤色之真天機雲錦也
東坡詞如水龍吟詠楊花咏龍笛又如過秦樓洞仙
詞卜算子等作皆清麗舒徐高出人表哨遍一曲櫟

括歸去來辭更是精妙周秦諸人所不能到

秦少游詞體製淡雅氣骨不衰清麗中不斷意脉咀
嚼无滓久而知味

晁無咎詞名冠柳琢語平帖此柳之所以易冠也

近代楊守齋精於琴故深知音律有圈法周美成詞
與之游者周草窗施梅川徐雪江奚秋厓李商隱每
一聚首必分題賦曲但守齋持律甚嚴一字不苟作
遂有作詞五要觀此則詞欲協音未易言也

辛稼軒劉改之作豪氣詞非雅詞也於文章餘暇戲
弄筆墨為長短句之詩耳元遺山極稱稼軒詞及觀

遺山詞深於用事精於鍊句有風流醞藉處不減周秦如雙蓮雁邱等作妙在模寫情態立意高遠初无稼軒豪邁之氣豈遺山欲表而出之故云爾

康柳詞亦自批風抹月中來風月二字在我發揮二公則為風月所使耳

楊守齋作詞五要

作詞之要有五第一要擇腔腔不韻則勿作如塞翁吟之哀颯帝臺春之不順隔浦蓮之寄煞鬪百花之无味是也

第二要擇律律不應月則不美如十一月詞須用正

宮元宵詞必用仙呂宮為宜也

第三要填詞按譜自古作詞能依句者已少依譜用字者百无一二詞欲諧韻不協奚取焉或謂善諧者能融化其字則無疵殊不知律製轉折用或不當即失律正旁偏側凌犯它宮非復本調矣

第四要隨律押韻謂如越調水龍吟商調二郎神皆合用平入聲韻古詞俱押去聲所以轉摺恠異成不祥之音昧律者反稱賞之是真可解頤而啓齒也第五要立新意若用前人詩詞意為之則蹈襲无足奇者須自作不經人道語或翻前人意便覺出奇或

祇能鍊字誦纔數過便無精神不可不知也更須忌
三重四同始為具美

詞源卷下終

言

二

乙卯歲余以公事留杭數月而玉田張君來寓錢塘縣之學舍時主席方子仁始余交道玉田來所自且憐其才而不知余與玉田交且舊也因相從歡甚玉田為况落寞似余其故友張伯雨方為西湖福真費脩主聞之遂挽去子仁與余買小舟並湖同為道客伯雨為設茗具饌盤旋日入而歸玉田嘗賦臺城路詠歸杭一詞錄此卷後其詞云當年不信江湖老如今歲華驚晚路改家迷花空蔭落誰識重來劉阮殊鄉頓遠甚猶帶羈懷鴈悽蛩怨夢裏忘歸亂蒲烟浪片帆轉 閑門休歎故苑杖藜遊冶處蕭艾都遍雨

色雲西晴光水北一洗悠然心眼行行漸嬾快料理
幽尋酒觀詩卷賴有湖邊舊時鷗數點丁巳正月江
村民錢良祐書

詞與辭字通用釋文云意內而言外也意生言言生
聲聲生律律生調故曲生焉花間以前無襍譜秦周
以後無雅聲源遠而派別也西秦玉田張君著詞源
上下卷推五音之數演六六之譜按月紀節賦情詠
物自稱得聲律之學於守齋楊公南溪徐公淳祐景
定間王邸侯館詞舞升平居生處樂不知老之將至
黎園白髮漢宮娥眉餘情哀思聽者汨落君亦因是

棄家客游無方三十年矣昔柳河東銘姜祕書憫王
孫之故態銘馬淑婦感謳者之新聲言外之意異世
誰復知者覽君詞卷撫几三歎墻東叟陸文圭跋

皆至順改元季夏六月謄于起善
齋菊節三日裝

吳

二

